

يا من أحببت
رنا أحمد

يا من أحببت
رنا أحمد
تدقيق لغوي : عبدالله أبو الوفا
تصميم الغلاف : عمرو علاء
رقم ايداع: ٢٠٢٠/٣٦٨٩
ترقيم دولي: ٩٧٨-٩٧٧-٦٥٩٤-٩٤-٤

دار فصله للنشر والتوزيع
العزيزيه - منيا القمح - مصر
٠٠٢٠١٠٦٧٠٠٠٧٠١

fasla.pub@gmail.com
Www.FaslaPub.Com



جميع حقوق الطبع و النشر محفوظة
الطبعة الأولى يناير ٢٠٢٠



جميع حقوق النشر محفوظة لدار فصله للنشر و التوزيع
إن أي تصوير أو إعادة طبعه أو نشر بشكل ورقي أو الكتروني أو ترجمته أو تسجيله
صوتيا بدون إذن كتابي مسبق من الدار يعرض صاحبه للمسائلة القانونيه

يا من أحببت

رنا أحمد



فصلة

للنشر والتوزيع

Fasla Publishing & Distribution

إهداء

- إلى أسرتي التي كانت مصدرًا للدعم والمساندة كثيرًا.
- إلى من هو قدوتي بالكتابة، من تعلمتُ منه الكثير، من أحيا القراءة بين الكثير مِنَّا، الكاتب الدكتور أحمد خالد توفيق - رحمه الله -.
- وأخيرًا وليس آخرًا، إلى من كانت مثل النور في دروبى المظلمة، من كانت مثل النسيم العليل، هى ليست فقط من أكثر الكُتاب المُفضلين لدى بل أيضًا تعجز الكلمات عن التعبير عنها.
- شكر خاص لكل من ساندنى مُنذ أن بدأت هذا الطريق.

المقدمة

الفتاتان يخرجان في وقت مُتأخر من أحد المنازل بمنطقة مصر الجديدة، وهما تتصببان من العرق وتنظران حولهما من شدة الفزع، كانتا تركضان وتسرعان في سيرهما خشية أن يراها أحد، أدركتا السيارة السوداء وبدأتا في السير بها مُسرعتين بعيدًا عن المنزل.

وقالت إحدى الفتاتين في خوف وفزع:

«إيه اللي احنا عملناه ده؟!»

«بقول لك إيه أنا ملومة على أعصابي بالعافية من ساعة اللي حصل، ومش قادرة أستوعب أنا كمان!»

«خلاص كدا مات؟! أنا مش مصدقة إزاي عملنا كدا!»

وبدأت الدموع تسيل من مُقلتيها وهي في غاية الفزع، ولم تستطع التقاط أنفاسها بسهولة، بينما أجابتها الأخرى بإيماءة تعني الإيجاب وهي تنظر لها حتى أثناء القيادة، لكنها سُرعان ما انتبهت للطريق، كاد الفزع أن ينفجر برأسيهما ويحولهما لفتات.

«إنما الحب ما ثبت»

- محي الدين بن عربي

الفصل الأول - كان يا ما كان...

أربعة أعوام في الكلية قد مضت، وها هي السنة الخامسة أوشكت على الانتهاء.

قد خرجت كل من كارما، وعد، شيرى من الامتحان.

وإذ بوعد تقول: «بنات إيه رأيكوا نروح cilantro café كمان شوية».

كارما: «لا أنا النهارده ماليش مزاج».

وأخذت الدموع تتساقط رويدًا على وجنتيها وسابحة بخيالها قليلاً فور تذكرها والدها المتوفي منذ ما يقرب من خمسة أشهر، الذى كان بمثابة صديقها المقرب وأخيها الأكبر، فهو لم يشعرها قط أنها فقط ابنته، بل كانت أميرته المدللة أيضًا. وهى قد جزعت تحمل هذا الشعور، ودومًا ما تشعر بالذعر والوحدة بالرغم من وجود والدتها بجوارها، كانت صورة والدها تطاردها في كل صوب.

وعد: «كارما، والدك الله يرحمه لو شاف حالتك هيزعل عليك جدًا».

شيرى: «أيوه يا حبيبتي، خلاص هو بإذن الله يكون في مكان أحسن».

وبدأت الابتسامة ترتسم على وجهها وهى تزيل دموعها بالمنديل الورقى،
فهى تعتقد أن لا أحد يشعر بصراعها بالداخل أو أنها لا تستطيع وصفه،
لذلك قررت التوقف عن الحديث فى هذا الأمر وتثبت لهما أنها بخير.

بعد ذلك ركب سيارة كارما الـ Mercedes «، فى الحقيقة هى سيارة
والدها، وعلى الرغم من أنها قديمة بعض الشيء، إلا أنها رفضت بيعها
وشراء سيارة أحدث، فكل ركن بالسيارة هو مثل مخزون الذكريات.

فى التو حينما أمسكت بالمقبض اعترتها رجفة فى قلبها، إذ تذكرت والدها
وهو يُمسك المقبض، وأخذت تتحسس المقبض بتهيدة ثم ركبت،
وحينها أيضاً تذكرته وقت جلوسه على كرسى القيادة وأناملها تتحسس
المِقوَدَ، وحبست دموعها حتى لا يلاحظها أحد.

شيرى: «أشغل إيه يا جماعة؟»

كارما: «الى أنتوا عايزينه عادى».

تقول كارما تلك العبارات وهى تشتاط فكراً وجزعاً، على أهبة الاستعداد
أن تحرم نفسها من كل مُتَع الحياة؛ فهى ببساطة لا تشعر بسعادة حقيقة
مع أحد سوى القليل منهم، والدتها وهى فى المقدمة، وخطيبها شريف
الذى جمعتهم قصة حب منذ الطفولة ويحبها حباً جمّاً، وصديقتها شيرى
وواعد.

وما حَرَكَ بداخلها نهضة المعافى هو معرفة أن لديها شقيقة من أم ثانية تُسمى رنيم، وكانت لا تعلم شيئًا عن هذا الأمر سوى بعد وفاة والدها، فهي لم ترها بعمرها قط سوى مرة ومن بعدها لم ترها مجددًا.

لاحظت كارما أن شيرى تسرح بعيدًا من حين لآخر، فهي تشعر بعض الأحيان أن شيرى لديها سر تحبّه عن الجميع، وترى حزن في عينيها دون أن تشعر أحد، فهي ليست صديقتها منذ زمن مثل وعد، فقد تعرفت على شيرى منذ شهر وأصبحت علاقتهما بها نوع بسيط من الكذب. ترى دومًا أن شيرى تحمل همًا ثقيلًا لا تستطيع منه الفرار، فهو يدركها دومًا ويقيدها وفي نفس الوقت لا تريد به الانتشار أو البوح.

وعد: "بقول لك إيه، شغلى حاجة لأم كلثوم كدا، (القلب يعشق كل جميل)".

شيرى: "يا سيدى على الروقان".

"القلب يعشق كل جميل،

وياما شوفتى، وياما شوفتى جمال يا عين،

واللى صدق فى الحب قليل، قليل،

وإن دام يدوم يوم، ولا يومين، ولا يومين،

واللى هويته اليوم، دايم وصاله دوم،

لا يعاتب الى يتوب، ولا بطبعه اللوم،

واحد مفيش غيره، ملا الوجود نوره،

دعاني لبيته، لحد باب بيته،

وأما تجلى لى، بالدمع ناجيته.

وكارما تبتستم؛ لأنها تذكرت أن والدها هو أول من أسمعها تلك المقطوعة
المذهلة، وكانت المفضلة لديه، لا تستطيع الفرار من شلال الذكريات
الذى هو أصعب جزء بحياتها!

صفت سيارتها وترجلن منها، ثم دخلن.

سأل النادل عما يطلبن فأجابت شيرى:

"عايزة (hot chocolate)، بعد إذنك".

وتبعتها كارما: " cappuccino ، لو سمحت".

وختامًا أجابت وعد وخطفت نظرة عابرة من النادل: " latte' ، من
فضلك".

وقبل أن يغادرهن ابتسم ابتسامة خفيفة لوعده بالأخص، وطلب من
صديقه أن يذهب هو؛ ليقدم لهن ما طُلب، أما عنها فلم تبادله إياها،
وشعرت بالخجل واحمر وجهها بعد مغادرته.

وقف النادل نفسه عند المطبخ وهو يلقي بنظراته عليها من حين لآخر،
فهو في حياته لم يشعر تجاه فتاة أنها

كالمغناطيس ويشعر بهذا من قبل، وهي أيضاً لم يتسلل ذاك الشعور داخل
قلبها، هو في الحقيقة ليس شعور حب، ولكنه مجرد ارتياح، اطمئنان،
أو ربما إعجاب.

ورن هاتف كارما إذ يتصل بها شريف؛ كي يطمئن عليها: «إيه يا جميل،
عملت إيه النهارده؟»

«الحمد لله كان كويس».

«طب حلو، وأنت أخبارك إيه؟»

«تمام، وأنت؟»

«تمام، بقول لك فاضية النهارده بالليل؟»

«آه، اشمعنا؟»

«كنت عايز أجيلك أنا وماما ونشوف مامتك عشان نتفق على الفرح
ونتكلم بس في موضوع مهم».

«شريف، أنت بتقول إيه؟! بابا مأكملش سنة حتى على وفاته وبتقول لى
جواز!»

"يا سلام، مش عارفة احنا كام سنة مخطوبين وبعد الأيام عشان نبقى
سوا وتخلصى جامعة، وخلاص أنتِ هتتخرجى يعنى، وباباك أكيد لو
كان موجود كان هيفرح جدًا يعنى، يا حبيبى دى سنة الحياة، أنا مُقدر
موقفك طبعًا بس احنا أجلنا الموضوع ده قبل كدا من كام شهر عشان
وفاته فخلاص مش هتزعلى طول حياتك".

قالت فى جزع:

"لما تيجى بس يبقى ربنا يحلها".

"ماشى، سلام".

وبعدها أغلقا الهاتف، كانت تشتاط فكرًا وجزعًا من قوله، كانت تتمنى
منه أن يتحمل هذا الأمر أكثر، ويكون اهتمامه مُنصبًا عليها وحالتها
النفسية، ولكنه كان يعتقد أن بهذه الطريقة يُمكنه إخراجها من دوامة
الحزن المُنغمسة بها، ولكن هذا ليس ما كانت تتمناه أن يحدث فى ذلك
الوقت.

قد انتهت الفتيات من شرب المشروبات الساخنة، وقد جاء النادل نفسه
الذى يُدعى باسم، وهو يخبرهن بالمبلغ المطلوب دفعه مقابل المشروبات
الساخنة، والغريب هنا أنه ألقى نظراته على وعد مجددًا، بنفس الابتسامة
التي كانت تراها منه، وهى تتظاهر بأنها غير مكترثة بما يفعله وأنها لم
تَرَ ابتسامته.

بينما هي قد رأت تلك الابتسامة بنظرة جانبية من نظارتها الطبية، وكلما ترى ابتسامته أو تتذكرها تشعر برياح من النور والحبور تستولى عليها، ورحيق الارتياح ناحيته بدأ في النضوج.

كل فتاة رجعت لمنزلها وكل منهن تحمل ذكرى مختلفة عن الأخرى، فهي كارما تتذكر مكالمتها الهاتفية مع شريف وأنه سيأتي الليلة، فقررت أن ترتدى الثوب المفضل لديها الذي به أشكال الزهور في صورة غاية في الرقة والجمال، ووضعت القليل من مساحيق التجميل بغير إفراط، ومشطت شعرها حتى أصبح على ما يُرام، وأيقظت والدتها لتستعد لاستقبال شريف الذي أوشك على الوصول.

قالت سمر والدة كارما في تحشرج وهي تنظر لصورة جماعية تجمعها هي وابنتها وزوجها حينما كانوا بباريس في العطلة:

«عارف بالرغم من المشاكل التي كانت ما بيننا، كان نفسي يبجي الوقت التي اعتذر لك فيه لو ضايقتك من غير قصد، كان نفسي تعرف إن مهما حصل أنا مابطلتش أحبك، كنت محتاجة منك بس إنك تفهمني، استحملت إنك تتجوز عليا عشان مش قادرة أسيبك وقولت يمكن تلاقى سعادتك مع حد غيري واستحملت وكل يوم وأنا بموت مليون مرة من كتر الوجدع التي مكنتش حاسس بيه وكنت بتعتمد إنك ماتحسش بزعلي عشان ماكنتش عايزة حاجة غير إني أشوفك فرحان وبس، حتى

لو على حسابي، آه مش هنكر إني اتغيرت شوية بعد الجواز بس أنت كمان
اتغيرت وحسيت إنك مش بتحبني زى زمان خالص، ومش بس اتغيرت
فى طباعك لأ أنت كمان اتغيرت فى طريقك معايا، وكان لازم تتفاهم
معايا أكثر ونصلح من بعض".

وبعدها أغرورقت عيناها بالدموع:

"أيا كان، ربنا يرحمك، فراقك صعب قوى وبتنك هاتتجوز وهبقى لوحدى،
نفسى تبقى معايا النهارده ويوم فرحها وكل لحظة تبقى وسطنا".

ثم تحسست الصورة وخاصة عند وجهه ولمسته برقة بأناملها، وشرعت
فى ارتداء ملابسها على الطراز الكلاسيكى لاستقبال ضيوفها.

ها هى خانة ذكرى وعد التى لا طالما تتذكر ذلك النادل وابتسامته، فهى
قد لاحظت فى عينيها لمعة الغبطة وتقول لنفسها: "لا، لا، إيه ده! مفيش
حاجة خالص يعنى".

ثم تبتسم وقد ذابت الحروف حين أرادت أن تعبر عما يدور بداخلها،
فهى تعلم أنه كيف لها أن تحب شخصاً غير مألوف عليها بهذه السرعة.
أخذت تدون بمذكراتها بعض الأشياء المتعلقة بالحب خاصة فى أمرها
هذا:

«ليست كل خفقة قلب تعنى الحب الحقيقي، ليست كل سعادة فريدة تعنى الحب الحقيقي، الإعجاب لا يعنى الحب الحقيقي!»

ها هي شيرى تحمل ذكرى مختلفة من يومها هذا أو إن ذكرى شيرى تطاردها منذ فترة ولا تستطيع منها الفكك، ونظرت للشرفة المجاورة لها المطلة على منظر غروب الشمس وخيوط أشعة الشمس الجامعة بين اللونين الأصفر الداكن والبرتقالى الغامق وهى تنسدل على الأسطح فى صورة أشبه بالشحفة الفنية، وهى تحدث نفسها:

«محدث يعرف أنا بموت إزاي كل يوم، أنا عارفة إنى أستاها لى حصل لى بس يا رب أنا مليش حد غيرك».

أغمضت عينيها لُبْهة، ثم فتحتها لتجعل الدموع تتحرر على وجنتيها كعادتها.

أخذ شريف يُهذب لحيته، وارتدى قميصه أبيض اللون وسرواله الأسود الداكن، ووضع عطرًا زكيًا على قميصه.

ركب السيارة مع والدته، وذهبا لمنزل كارما بمنطقة التجمع الخامس، صف سيارته وترجل منها وهو شديد بالسعادة.

رن جرس منزل كارما، وفتحت هى الباب، دخلت والدته أولاً ثم دلف وراءها.

رحبت بهما كثيراً وهى تُبادلته الابتسامات.

وصلت كارما لغرفة والدتها وأخبرتها أن شريف

ووالدته قد وصلا للتو، تنهدت الأم فى فرحة ممزوجة بالحزن ثم ذهبت الأم لهما وصافحتهما ورحبت بهما كثيراً، حاولت والدته شريف أن تُلقى بعض الكلمات بشأن موضوع تعجيل الزواج.

انتهت كارما من عمل بعض المشروبات وصفته على الصينية بشكل جميل ومُنسق، أخذت نفساً عميقاً ثم انفرجت أساريرها، وضعته نصب أعينهم وارتشف منه شريف رشفة بسيطة، ثم قال: "تسلم إيديك، عقبال ما تعملية فى بيتنا سوا"، وبعدها ابتسمت فى خجل.

ساد الصمت قليلاً وبعدها قالت والدته شريف:

"ها يا سمر، ها يا عروسة؟"

أردفت كارما فى تنهيدة:

"طب مش هنتكلم عن موضوع الشغل وأكمل دراسات عليا؟"

"هنقف لحد هنا يا كارما".

أردفت سمر في نبرة تنم عما بداخلها من حنق:

"يعنى بنتى تتعب السنين دى كلها فى صيدلة عشان فى الآخر ماتتغلش ولا تحضر ماجستير ودكتوراة، ده كان حلمها يا شريف وأنت أكثر واحد عارف!"

"يا طنط الى هى اتعلمته أكيد هيفيدها فى البيت ومع الولاد فيما بعد، بس هى مش بحاجة للشغل، أنا مش هخليها محتاجة حاجة، وبعدين عشان مفيش حاجة تشغلها، كمان مش مستاهلة تعمل ماجستير ودكتوراة".

"يا حبيبى أنا بعترك زى ابنى، بس أنت ماترضاش إن بنتك يحصل لها كدا، خليها تحقق كيان لنفسها، صدقنى هى هتعرف توفق بين البيت والشغل كويس، يا ابنى الشغل مش زى ما أنت فاهم، الشغل مش فلوس وتعب ومجهود وبس، الشغل إنك تحب الى بتعمله، وتفيد غيرك، حاجة تشغلها بردو، وصدقنى لو قصرت فى أى حاجة أنا بنفسى الى هخليها تقعد عشان مارضاش بالظلم".

"يا طنط بيتها وجوزها أولى من الشغل".

قالت والدته فى تودد:

"طب بصى يا سمر، خلينا نجرب لو بنتك ما ارتاحتش أو زهقت مثلاً وعد منى إنها هتشتغل، ابنى بس عايز يريحها".

بين كل هذا الزحام، كارما تعرف عن ظهر قلب أن والدتها تتحدث

بالصواب، فالعمل أيضًا مأخوذ عنه صورة خاطئة، ولكنها لا تريد أن تسبب الذعر والغضب لشريف وقررت أن توافقه، فهي - كما تعتقد - واثقة أنه يخاف عليها من أى تعب ويحبها، فلا تريد فقدها، وحلمها الأكبر هو استمرار علاقتها مع شريف، كان يشغل حيز أولويتها أكثر من حلمها الآخر.

"وأنت رأيك إيه فى الكلام ده يا كارما؟"

"مش عارفة، أنا هجرب بس توعدى يا شريف إنك تخلىنى اشتغل لو زهقت أو احتجت".

"حاضر، أوعدك".

يقول تلك العبارات، وهو ليس لديه أية نية لجعلها تلتحق بالعمل.

وسمر قد اعتراها الغضب والفوران من الداخل بسبب ابنتها حين وافقت ألا تعمل إلا إذا أرادت، وهى على يقين أنها لن تطلب ذلك أبدًا؛ لأنها تعلم أن ما يهم ابنتها هو حبيبها ورضاه ولا تريد فقدها، وأردفت:

"خلاص أنتوا أحرار".

وهى من داخلها تشفق على ابنتها، ولكنها لا تريد إفساد فرحتها، فهى قد حزنّت بالنذر الكافى على فقدان والدها، ولا تريد إطفاء حبورها، فاضطرت أن توافق.

حاولوا جعل الأجواء أكثر لطفاً، وبدأوا يتطرقون لمواضيع أخرى، وبعد فترة وجيزة أرادا الرجوع لمنزلهما واستأذنا، ثم توجهنا للسيارة.

دار بين شريف ووالدته حواراً بعد أن تحركت السيارة قليلاً:

"ألف مبروك يا حبيبي، أخيراً هشوفك عريس".

"حبيبتي تعيشي وتفرحي كدا على طول، بس حضرتك عايزة تقولي حاجة؟"

"بصراحة آه، بص أنا مش مقتنعة فكرة الرفض للشغل دى، أنا حاولت أمشى الأمور عشان اليوم يعدى".

"هى آه كانت عايزة تشتغل بس أنا مش موافق، ده تعب ليها على الفاضى، وكمآن أنا شايف الموضوع مش مستاهل، أنا فهمتها براحه".

"أنا مش معاك فى النقطة دى خالص، أنت اللى بتصور فى دماغها إن الشغل من الحاجات اللى مالهاش لازمة فى حياتها، بلاش تحط حجج فارغة، أنت عارف إن حاجة زى كدا هتسعددها وأنا واثقة إنها هتعرف توفق بين الشغل والبيت كويس جداً كمان، بس أنت اللى مش عايز تخلوها تجرب حتى".

"ماما أنا مستحيل أرجع فى قرارى ده، أنا آسف".

أردفت والدته فى نبرة من الحنق مما قاله:

"وايه المشكلة لما تغير رأيك للحاجة الأصح؟! الكون مش هيمشى على

مزاجك، أنت اللى بتقنعها برأيك حتى لو هى مش عايزة وبتستغل إنها مش هتعارضك الرأى عشان بس ماتخسر كرش".

"الى فيه الخير هيحصل، مانعرفش إيه اللى هيحصل بعد كدا".

تنهدت والدته طويلاً، فهمى علمت أنها فشلت فى تغيير نمط تفكير ولدها الذى لا يهتم بأحد سوى نفسه، هو يعتقددها مثل الأميرة التى هى فى انتظار أميرها المغوار، ولكنه لم يعلم أن هذا سيكون بداية النهاية.

قبل أن تتوجه سمر لغرفتها، أوقفتها ابنتها فى لينٍ وأردفت:

"ماما كنت بس عايزة أقول حاجة".

"خير يا حبيبتي؟"

"أنا عارفة إن حضرتك يهكم مصلحتى ودى حاجة مافيهاش شك، بس..."

"بس إيه يا كارما؟ بس أنت بتجبي شريف، وحبك ليه مخليكي مش عايزة تزعليه عشان ماتخسريهوش، يا حبيبتي أنا حاسة بيك وفهماك، أنا بس كل اللى كنت عايزة أفهمه لك أنت وشريف إن الشغل مش هياثر على حياتكم ولا حبكم لبعض، أنا مش هاممنى فى الكون كله غيرك يا كارما، ومش عايزاك تاخدى قرار تندمى عليه بعد كدا، لو راحتك وسعادتك فى كدا

خلاص أكيد هفرح لك، بس افتكرى دايماً إنك بلاش تعلقى سعادتك كلها على حاجة واحدة زى بالظبط معاكى لترين مايه مينفعش تحطيمهم كلهم فى ازازة لتر واحد، لازم تجيبى ازازة تانية وكل واحدة تعوض التانية لو حصل خلل، لكن ماتحطيش لتر واحد من اللترين فى الازازة اللتر وترمى اللتر التانى عشان لو الازازة ضاعت أو حصل لها حاجة ساعتها مش هتطولى الازازة ولا اللتر الى رمتيه، الازازة التانية دى يا كارما مش شرط يبقى شغلك ممكن يبقى الحاجات الى بتفرحك، حاجة تبعدك عن الروتين اليومي، خلى دايماً عندك إحساس الهدف الى لازم أحققه، كل ده صدقيني هيشحنك طاقتك اليومية فى حياتك".

قالت كارما فى ابتسامة بسيطة تنم على أنها تعلم أن والدتها تتحدث فى الصواب:

"فاهمة قصد حضرتك طبعاً".

ثم تنهدت والدتها وهى على يقين أن كارما لن تفعل ما قالته لها للتو، فهى تعلم ما يشغل حيز الاهتمام برأسها، وفى الوقت ذاته هى عاجزة عن فعل شىء بهذا الأمر.

أخذ شريف يدعو أقرباءه وأصدقاءه مثلما تفعل كارما لحفل زفافهما الذى تم تحديد ميعاده.

كان سارحًا بخياله وهو مُبتسم، تنتابه قشعريرة وكأن المكان لا يفسح لسعادته ويريد الفضاء ليتحمل كم السعادة بداخله، وأفسد عليه كل هذا صوت طرق الباب من زميله بالعمل الذى أذن له بالدخول.

- "مبروك يا عريس".

= "الله يبارك فيك يا حبيبي، عقبالك".

ثم أخبره بأن هناك مُهندسة جديدة ستنضم لهذه الشركة وتُدعى رنيم.

■ "شوفت آخر الأخبار؟"

= "إيه يا عم خير؟"

- "واحدة اسمها رنيم هتشتغل معانا جديد ودرست هندسة برا مصر وكدا".

= "طب كويس، فعلاً الشركة محتاجة ناس عندها خبرة كافية".

وأردف فى مزاح:

- "احنا هنغلط ولا إيه؟ بس بصراحة زى القمر".

= "يا ابني أنت جاي تعاكس هنا! ما تحترم نفسك وخليك فى شغلك".

- "خلاص يا عم نسيت إنك هتتجوز، أيام العزوية راحت بقى".

= "يا عم سواء عزوبية أو لأ احترم نفسك فى الحالتين، عقبالك أنت كمان".

ثم ترجل صديقه من المكتب بعد فترة طويلة من المزاح بينه وبين شريف، وهما يتذكران سوياً بعض ذكرياتهما القديمة التى لا تفعل بهما شيئاً سوى إضفاء السعادة بداخل ثنايا قلوبهما.

الفصل الثانى - شعاع من حبور.

قد حان يوم الزفاف الموعود وها هى التجهيزات التى تم الاتفاق عليها من مقاعد وأنظمة الضوء ومقطوعات موسيقية وغير ذلك.

كارما تجلس مع والدتها وصديقتها وعد التى هى بمثابة شقيقتها داخل إحدى غرف الفندق؛ للاستعداد للعرس.

ارتدت كارما فستانها الأبيض وكأنها حورية البحر أو فراشة عارمة فى الجمال الذى يسترسل كالأمواج الرقيقة أو كالمقطوعة الموسيقية الهادئة التى تُعزف فى رقة، والقليل من الحلى يُضفى على فستانها نوعًا فريدًا من الجمال والرقّة.

فحقًا كان الفستان من شدة جماله جعل الكلمات عاجزة عن وصفه، كان شعرها يداعب أكتافها فى لطف ورقة.

وقد تم الانتهاء من وضع بعض مساحيق التجميل بدون إفراط وأصبحت كالنجمة فى وسط الظلام الحالك.

= "أخيرًا جه اليوم الى أشوفك فيه زى البدر المنور، ربنا يسعدك يا بنتى".

وكانت عين والدتها الحانية مغرورة وتسيل منها الدموع.

- "ربنا ما يحرمينش من وجود حضرتك فى حياتى يا أحسن أم فى الدنيا".

- "لا لا يا جدعان مش ناقصة عياط وعواطف، دا أحلى يوم فى حياتك يا كارما وماتعيطيش عشان المكياج ما يتمسحش".

- "أيوة فعلاً، أنا قررت أرجع لحياتى وأفرح تانى، وبعدين كل حاجة حصلت خلاص أهم حاجة اللى جاي، مش دا كلامك يا وعد؟ عقبال ما أحضر يومك كدا يا قمر".

- "فى حياتك يا رب يا جميلة، تربيتى يا ناس أيوة كدا".

وفى الوقت ذاته كان شريف يستعد أيضاً لهذا اليوم؛ فقد ارتدى حُلته السوداء مع قميصه الأبيض الناصع، وقد نَمَقَ لحيته بلطف، وصفف شعره جيداً، ووضع بعض العطور الزكية على ملابسه وارتدى حذاءه الداكن لونه، وكان على أهبة الاستعداد لاستقبال أميرته كارما.

انتظر شريف أميرته حتى تُنْهِى تجهيزاتها وبعد لحظات لم يُصدق ما رآه من جمال، حتى أن لسانه انعقد ولم يستطع الكلام، انفرجت أساريرهما سويًا وأراحت يدها على يده وسارا سويًا.

دلفت أميرته إلى القاعة كأنها تخطو على بساط رقيق وهو يتخيل أن أقصى مرمى لبصره هو كارما فقط فى القاعة الفسيحة، وهو يهمس لها: "إيه الحلوة دى كلها مجد!"

"في مكان ما، أنت صدفة جميلة بانتظار أن تحدث لأحدهم".

-أسامة المغاوري

بين الأغاني الصاخبة والأصوات العارمة من شدة الفرحة يحدث شيئاً يفوق التوقعات ولا يخطر على بال أحدٍ قط، شيء يختلف كثيراً عن المؤلف، شيء ما هو إلا مزيج من خيوط مُعقدة غير مفهومة، اصطدمت وعد بشاب في القاعة وبعدها أردفت:

"معلش أنا آس..."

لم تستطع التفوه بشيء آخر من أثر الدهشة، فها هو الشاب الذي قد رأيته من قبل داخل (cilantro) ويعمل كنادل به، وهو نفسه الذي قد رأيته يبتسم لها كلما يراها، وقد كررها مجدداً بعد موقف الاصطدام، "مش أنتِ الي كُنتِ..."

"اممم، عن إذنك معلش، وبعذر عن الموقف".

كانت تقول تلك العبارة وهي في اضطراب شديد وتوتر مما حدث، تسارعت نبضات قلبها حتى كاد أن ينفجر من بين ضلوعها، انعقد لسانها في حالة لم تشهدها من قبل بحياتها.

هي لم تكن تتوقع رؤيته بعد تلك الفترة، ولم تتوقع أنه سيستمر على هذا الشعور بالرغم من عدم سبق معرفته بها، ودار برأسها العديد من التساؤلات عن تلك الصدفة غير المألوفة، ولكنها في الوقت نفسه قد

شعرت بشعاع من حبور تخطاها.

وبعد فترة، توجه باسم لشريف في تفاؤل وفرحة، وهو يقول:

= "شريف، بقول لك إيه؟"

- "خير يا باسم؟"

= "في واحدة كدا هنا في الفرح عايز أسأل لو تعرفها".

- "واحدة! مين دى اسمها إيه؟"

= "ماعرفش اسمها، بس لو شفتها هعرفها استحالة أنساها".

- "طيب لما تشوفها قل لى".

ثم بدأ يُلقى نظرة سريعة على جميع الحاضرين في هذا اليوم، وإذ به يراها كالسحابة الرقيقة وسط الغيوم، أو كأنها الوردة الحية الوحيدة بأرض دمار.

= "شايف اللى واقفة مع عروستك بتكلمها دى، هى دى بقى".

- "آه دى صاحبة كارما قوى وزى أختها".

= "طب حلو قوى، يعنى تعرف عنها معلومات كتيرة؟"

- "بسيطة إني أعرف لك".

- "كارما فيه حاجة غريبة حصلت يا بنتى، فاكدة الجرسون اللى كان موجود

أيام ما كنا في (cilantro)؟ الى كان يبتسم دا كل ما يشوفنى".

= "تقريبًا، ما له؟ إيه الى فكرك بيه؟"

- "شوفته من شوية وشكله واحد من المعازيم، وابتسم لى تانى وكأنه ما صدق إنه شافنى".

= "مش عارفة بصراحة، بس فعلاً إيه الى جابه، ولو هو هنا يبقى أكيد تبع شريف مش أنا".

- "ما اعرفش، اتوترت لما شوفته قوى وماعرفتش أقول حاجة، أنا عمري ما حصل لى كدا!".

ابتسمت كارما ابتسامة لطيفة؛ لأنها أدركت ما شعرت به وعد.

- "أنتِ بتبصيلي كدا ليه؟"

= "مفيش، بس فرحانة عشان أنتِ باين فى عنيكى الى مش عايزة تقوليه".

- "اسكتي يا كارما أحسن".

= "طيب".

كانت تنظر لصديقتها بنفس النظرة التى تنم عن مغزى معين، فهى اعتادت أن تعرف ما يدور بداخل صديقتها حتى وإن لم تتفوه بأى شىء.

ثم أجابتها وعد بنفس نبرة توترها:

- "يووه! أنا راجعة الطرابيزة أحسن".

يجلس الضابط حسين داخل مكتبه وهو يحمل سيجارته بين إصبعيه بعد أن أشعلها كعادته وقتما يفكر في شيء ما.

وهذه المرة يعتقد أن الأمر مُعقد بشدة وهو يحاول تجميع الخيوط بتلك القضية، يحاول أن يجد أية ثغرة تُساعده أن يصل للقاتل، ولكن بعد ذلك علم أنهما فتاتان اللتان قاما بتلك الجريمة الشنيعة ويمتلكان من ذكاء ما جعلهما لا تتركان أثراً واحداً وراءهما، كان يُراجع بداخل ذاكرته كل ما سمعه من الشهود ويعاود النظر لفيديو كاميرا المراقبة الموجودة بالمحل الذي هو أمام العمارة مُباشرة، ولكن وجهيهما كان مُغطى بحرص كأنهما يعرفان الشارع عن ظهر قلب، حصر المُشتبه بهن في من كن يعرفهن ذلك الرجل، خاصة أنها لم تكن قضية سرقة، بل إن المنزل بأكمله على حالته، وقُتل الرجل بالزرنِيخ بسبب جُرعة مُفرطة.

قرر أن يُكمل الطريق حتى نهايته ويعثر عليهما.

أرادت وعد الجلوس بإحدى المقاهي؛ لاستكمال كتاباتها مع مشروبها المفضل ('Latte')، وها هي تكتب فصلها الخامس عن طوق النجاة: "ربما سيخطر ببالك كيف لحياتنا أن يوجد بها طوقٌ للنجاة؟! إن مجرد

جبر الخواطر هو طوق للنجاة، من يأتى لك ليغيثك من ظلامك، من يؤمن بك ويشجعك خاصة وسط شعورك باليأس وانهيار حائط الأمل نصب عينيك، من يتسبب فى نقش ثغرات الابتسامة، من يزيل خنجر الحزن من جسدك، من يزيل ذلك السيف الباتر من الخذلان وتخبطات أيامك، من يفضلك بالرغم من مشاكلك وعيوبك، من يختارك حين يتركك الكثيرون، من يستمر فى حبك على الرغم من كثرة النزاعات بينكما، هم جميعهم من يستحقون كل الحب، وطوق النجاة الأكبر فى حياتنا.

لم تكمل وعد كتابتها إذ هى رأت باسم ثانية، وهى تسمعه قائلاً:

- «إيه بس المواعيد دى مش ممكن! قولنا نيجى بدرى شوية، إيه دا طلبى ('Latte) وماستنتيش لما أجى حق؟!»

عاودها شعور الارتباك مُجدداً وهى تقول بنبرة من الحنق:

= «إيه دا!! أنت إيه الى جابك هنا؟!»

- «خلينا بس فى المهم».

ثم ابتسم لها نفس الابتسامة التى ابتسمها لها منذ أول لقاء بينهما وهو يقول:

«عجبك المشروب؟»

ابتسمت ابتسامة غاية فى البساطة والرقّة حتى أنها لم تُلاحظ، وفى الوقت

ذاته بدأت تتذكر جملته حين قالها في أول لقاء بينهما والذي لفت انتباهها هو تكرار ذاك المشهد مثلما حدث فعليًا من قبل، وبداخلها تشعر بتلك الفتاة الصغيرة التي تسعد بأقل كلمة وأبسط العبارات، وهي لم تستطع إبعاد عقلها عن تلك الدوامة المتشابكة غير المفهومة، قائلة: "ملكش دعوة وقوم من هنا بعد إذنك!"

- "مش عايز أرخم عليك، أو أكون ثقيل أو حاجة، تسمحي لي أقعد أتكلم معاك في موضوع مهم بجد، وأوعدك إنك لو مش عايزة تشوفيني تاني، هعمل كدا، بس اديني فرصة لو سمحت؟"

= "لو سمحت أنت بلاش تطلع لي في كل مكان، بجد دي مش طريقة! أنت تعرفني منين عشان تتكلم معايا؟ مش عشان شوفتني كام مرة يبقى هتبقى عايز تتكلم معايا، فاهمني؟"

ثم قال لها بسخرية: "لأ، مش هبطل على فكرة، وتبطل أنتِ الي بتعليمه دا!"

= "أنت الي بدأت، محدش قال لك تروح ورايا في كل مكان كدا، حتى لو مش بتتكلم معايا بتفضل تبص عليا وأنا في المكان".

- "وأنت عرفت منين إن أنا بقى باصص عليك، ومركز معاك قوى كدا، وإني بمشي وراك في كل مكان؟"

أخذت تُفكر سريعًا محاولة أن تجد شيئًا لتقوله، وراودها التوتر قليلًا

فُجِدًا:

= «ها! ما أنا... أنا بشوفك غصب عني، مش قاصدة أكيد، ومش ببقى واحدة بالي قوى، وبعدين بقول لك إيه ماتخرجناش برا الموضوع، أنت لازم يبقى فيه حدود للى بتعمله بجدة، مايصحش تروح ورايا كل حنة والشغل دا».

- «ما أنا مش هبطل أروح وراك كل مكان لحد ما تبطل عني وتسمعي أنا عايزك في إيه».

= «مش هسمع حاجة، وهتقوم دلوقتي حالاً».

- «طيب خيلنا قاعدين من هنا لبكره بقي».

= «قوم دلوقتي، لو سمحت!»

- «قلت مش هقوم غير لما تسمعي».

= «يا عم أنا دماغى ناشفة، وقلت لك مش هسمع، ولا ليا كلام معاك أصلاً، أنا مبحبش الطريقة دى وأظن عيب قوى اللى بتعمله دا».

- «طيب».

قال هذه الكلمة وهو ما زال جالساً أمامها، وأردفت:

= «أقول لك، أنا اللى ماشية أسهل».

- «طب استنى طيب!»

بدأت خطواتها السريعة تتجه صوب الباب؛ كي لا يدركها، وخرجت من الباب ولكنها لم تستطع السير أكثر بعد خروجها، فحين أدركها وقف أمامها، وقال برفق:

«خلاص أنا آسف، بس أنا مش فاهم أنتِ ليه على طول بتصدىنى، أنا مش قصدى حاجة على فكرة».

«أنا همشى ولو جيت ورايا مش هيحصل لك كويس».

لم تسمح له أن يتفوه بكلمة أخرى، أخذت تسرع في سيرها وتظاهر أنها لا تكثرث بما يفعله، فلأول مرة لا تفهم نفسها، لا تفهم ما تشعر به وكأنها لا تعرف نفسها، توقف عقلها عن التفكير مثل المغيب عن الوعي.

كانت شيرى تستعد لمقابلة جاراها طارق بإحدى المقاهى، ترددت كثيراً قبل أن تذهب وتريد الابتعاد لأن ليس لديها أية طاقة للحب، لا تريده أن يحبها أكثر حتى لا يرتطم بالواقع الذى لن يفعل شئ سوى تعذيبهما، كثيراً ما كانت تتظاهر أنها لا تهتم بشأنه، لا تعباً حتى بوجوده، ولكنها أدركت أن ما كانت تفعله هو بالضبط كالستار الذى يُخفى الحقيقة الواضحة نصب أعيننا، وقفت أمام المرأة وهى تنظر لنفسها فى ارتباك وتقول:

"يا ترى هتعمل إيه لو عرفت حقيقتي؟ يا ريتنى ما حببتك!"

أغمضت عينيها للحظة ثم فتحتها مُجددًا لتحاول أن تنسى بعض همومها تلك الليلة.

وبعد ساعة وجدها أمامه.

= "إزيك يا طارق؟ معلش آسفة على التأخير."

- "لا ولا يهملك عادى، تحبى تشربى إيه؟"

= "شأى ممكن".

ثم جاء النادل وأخبره طارق بطلبهما، وبعد انصرافه أراد التحدث مع شيرى ولكنه لا يعلم ماذا سيقول، كيف له أن يساعدها وهو يرى حالتها على علتها دون بصيص من الأمل أن تتحسن، كان واثقًا أن ما هى عليه ليس بسبب المشكلات التى دوماً تذكرها للناس بوجه عام حين يسألونها عن حالتها، يعلم بأن ثمة شئ ما تخفيه وتكتمه بجوفها، فى ثنايا قلبها ولا تريد به الإفصاح، كل ما يريده هو أن ينتزع شوك الهم والكرب والحزن من بستان قلبها، وبالرغم من الصعوبات التى مرت بها، فهو يؤمن بأن قلبها أشبه بالبستان المتدفق بالنعيم.

- "ها، اتفضلى اتكلمى بقى".

= "أنا عن نفسى مش عايزة أتكلم فى حاجة، أنت الى قلت لى نازل".

-«شيري، أنتِ عارفة كويس إني نازل عشانك وعشان تطلعي كل اللي مضايقتك، يمكن أقدر أساعدك».

= «تساعدني؟! صدقني أنت بتضيع وقتك، محدش هيعرف يخرجني من اللي أنا فيه، والموضوع اللي مزعلني هيفضل معايا لحد ما أموت كمان، صدقني أنت مش عارف حاجة».

-«أنا بحب أضيع وقتي يا ستي، ومش عايز حاجة غير إنك تكوني مرتاحة وبس، ومفيش مشكلة بتدوم يعني كله بيعدي».

قالت في هدوء وكأن فيضان الشجون يخنقها ويجعل لسانها معقودًا عن الحديث، كان الحديث أيضًا فيه ثقل بداخلها، فحين تُشارك بأي حديث يعني أنها ستستنزف كل طاقتها الكامنة بداخلها:

= «مشكلتي أنا دائمة، وفعلًا استحالة تتحل، مش هقدر أتكلم عنها خصوصًا قدامك، عشان مش عايزة أخسرك ولا أخسر أقرب الناس ليا، أرجوك بلاش تضغط عليا أكثر من كدا عشان أنا مش مستحيلة».

-«شيري، حتى لو مش هتقولي على اللي مضايقتك عشان مش فكرة إني عندي فضول وعايز أعرف، لا أنا مش قادر أشوفك كدا ومش عارف أعمل لك إيه، مش عارف أبطل تفكير في إني إزاي أخرجك من اللي أنتِ فيه».

= «تعرف؟! أنا كنت قبل الموضوع دا كنت فاكدة إن حياتي صعبة ومش

هعرف أعيشها، خصوصًا بعد ما حاجات كثير راحت مني، أنا عمر ما كان عندي أم أو أب، هما الاتنين ماتوا وأنا صغيرة قوى، أو حتى عمرى ما حسيت إن عندي صحاب، حاسة إنى كل ما أقرب من الناس بيعد أكثر! كان دايماً ييقيدنى شعور الوحدة، حتى الست الوحيدة اللى ربتنى ماتت! وما كنتش عندي أمل فى حياتى، كان أملى الوحيد إنى أدخل صيدلة وأحقق حاجة فى حياتى، بس ما كنتش أعرف إن اللى كنت فيه زمان أحسن مليون مرة من اللى أنا فيه دلوقتى، كنت دايماً بقول إن اللى أنا فيه مسبب لى مشكلة كبيرة فى حياتى، بس بعد اللى حصل حسسنى إزاي أنا كنت فى نعمة ما كنتش بيها غير بعد اللى حصل، ما كنتش أعرف إن مجرد مشكلة عندي هتوقفنى عن تحقيق حلمى، أو إنى أضيع كل حاجة حلوة بنفسى، أنا حتى ما عنديش طاقة لأى حاجة، ولا عارفة أبقي مرتاحة مع حد عشان اللى أنا فيه مش محسسى براحة خالص".

ثم غيم الصمت لبرهة وأكملت:

"طارق، هو ينفع حد يسامحك على حاجة أنت عملتها قبل كدا وسببت له أذى كبير بس أنت ندمان بكل ما تعنيه الكلمة وأنت ما كنتش تقصد تعمل كدا؟"

- "حسب اللى عملته يا شيرى أكيد".

= "لو على كلامك يبقى عمرى ما هعرف أعيش بسبب إنى واثقة من الإجابة اللى هسمعها من الشخص اللى عملت فيه كدا".

- "يا بنتي ليه مش للدرجة دى يعنى!"

ثم ابتسمت ابتسامة سخرية وقالت:

"مش بقول لك مش عارف حاجة!"

- "شيري، أنت ليه محسسانى إنك عاملة مصيبة، هتموتى نفسك من كتر الضغط والتفكير، ما تقولى وهساعدك فعلاً، جربى طيب؟"

= "هو أنا ممكن أسألك سؤال كمان معلش؟"

- "أكيد، اتفضل".

= "هو أنت ليه بتحبينى رغم اللى أنا فيه دا، بتحب واحدة مالهاش طاقة حتى إنها تحب، لا وتممسك بيا كمان ومهتم تحل مشاكل، وليه شاغل نفسك بكل اللى أنا فيه، وإزاي مازهقتش بجدة؟!"

- "هقول لك على حاجة يا شيري، أنا ممكن أكون سألت نفسى نفس الأسئلة فعلاً، بس اللى متأكد منه إن أنا مش فارق معايا كل حاجة غير بس إني أشوفك مرتاحة وفي أحسن حال حتى لو بعيد عني، مستعد أعمل أى حاجة تسعدك حتى لو على حسابي، حابب عيوبك قبل مميزاتك، حاولي دايماً تكوني واثقة إن مفيش مشكلة مالهاش حل، دا في حد ذاته كفيلاً جداً إنه يطمئنك وماتإذيش دماغك بأفكار غلط، بلاش تترجمي كل حاجة لمضمونها الوحش، بلاش تفتكري إن مثلاً وفاة والدتك ووالدك سبب إنه يوقف حياتك ويحسسك بخيبة الأمل وحزن يسيطر عليكى، دا قضاء الله

هتعملى إيه، حزنك لا هيقدّم ولا يأخر، أكيد كنت محتجّاهم فى حياتك ومفيش حد يستبدلهم، بس أكيد كان ربنا معوضك بمحاجات تانية وربنا مش بيغفل عن حد ولا بينسى حد، ربنا دايماً فاكّرنا ومدبرلنا حياتنا، فليه تموتى من اكتئاب أو زعل وأنت عارفة إن الفرج هيجى أكيد عاجلاً أم آجلاً، ماتعذيبش نفسك يا شيرى، اتعلمى من أخطائك وصلحيتها وتوبى وقربى من ربنا أكثر وأكيد هيساعدك، ومشكلتك هتتحل".

= "معاك حق جدّاً، نفسى أعمل بيه بجد عشان خلاص تعبت".

كانت تقول تلك العبارة بابتسامة بسيطة، تعمدت أن تتوقف عن الكلام بعد هذا، فلا أحد يشعر بما يطوف بها، لا أحد يشعر بصراعاها الداخلى أو أنها لا تستطيع وصفه، فلزمت الصمت وابتسمت حتى تؤكد أنها ستتحسن وتكون على ما يُرام.

رن هاتفها ولم تجبه بعد أن اتستعت مُقلّتها قليلاً لرؤية اسم المُتصل، ثم أخبرت طارق فى ارتباك وهى ترتعد قليلاً بداخلها:

"معلش أنا لازم أمشى حالاً".

- "ماشى مفيش مشكلة، حصل حاجة؟ أصلك أتوترتى كدا وقررتى فجأة تقومى تمشى".

= "لأ مفيش حاجة عادى، عن إذنك".

ثم نهضت سريعاً، واتجهت صوب منزلها حتى قبل أن يعرض عليها

توصيلها لمنزلها، لم يُصدق عبارتها الأخيرة وكان يعتقد أن ثمة شيء ما قد حدث.

- «كارما، أخبرك إيه يا حبيبتي؟»

= «بخير، أنت عامل إيه؟»

- «تمام يا حبيبتي طول ما أنتِ بخير».

= «عامل إيه في الشغل؟ كله تمام؟!»

- «آه يعني تمام، بس فيه شوية مشاكل كدا بس هتتحل ماتقلقيش، هبقى أحكي لك عليها لما أرجع بس».

= «ماشي ترجع بألف سلامة».

- «بقول لك إيه، تيجي نزل بعد الغدا؟»

= «تمام ماشي».

- «لا لا أنا مرتاح مش تعب، بصي هنخرج نتعشى برا بس ندخل السينما قبلها».

= «تمام جدًّا».

- «ماشى، محتاجة حاجة؟»

= «لا، لا شكرًا».

- «سلام».

= «سلام».

بعد أن أغلق هذه المكالمة الهاتفية، أرادت رنيم أن يُسمح لها بالدخول، وأذن لها.

- «أهلاً، إزى حضرتك عاملة إيه؟»

= «إيه حضرتك دى! ناديني باسمى عادى، أخبارك إيه؟»

- «تمام، حضرتك عاملة إيه؟»

= «بردو حضرتك! عامّة أنا بخير يا عم».

- «مرتاحة معانا فى الشغل؟!»

= «آه جدًّا».

- «طب كويس».

= «مش عايزة أكون بعطلك عن شغلك أو حاجة».

- «لا، لا، مفيش حاجة عادى».

صمتت بعد ذلك وهو لم يعلم سبب مجيئها بغتة، فحاول أن يكون لطيفًا نوعًا ما، كان الفاصل بين كل جملة والأخرى هو الصمت لفترة وجيزة ثم الاستكمال في الحديث.

= «أنت درست هندسة فين بقي؟»

- «في جامعة القاهرة».

= «كويس قوى».

- «أنا سمعت إنك كنت برا مصر صحيح؟»

= «آه فعلاً بقالى سنين برا».

- «درستى فى جامعة إيه؟»

= « Harvard ».

- «هايل جدًّا».

= «هو أنت ماعرفتنيش؟»

- «نعم؟»

= «لا بجد إزاي! دا أنا بقالى فترة بشتغل هنا، المفروض تبقى أكثر واحد عارفنى هنا، أنا رنيم».

- «ما أنا عارف بس مين بردو مش واخد بالى؟!»

= «أنا أخت كارما».

رفع حاجباه فى تعجب، وأردف:

«إيه دا مجد! أنا كنت فاكر إنها قايلة لى إن ليها أخت اسمها رنيم، بس ماجاش فى بالى إن الدنيا صغيرة قوى كدا وأنا وأنتِ نبقى زمايل فى الشغل، حاجة كويسة».

= «فعلاً أنا بردو لما عرفت استغربت شوية».

- «هتستقرى هنا خلاص؟»

= «آه، ما أنا خلصت الدراسة هناك وهعيش هنا».

- «لازم كارما تعرف إنك هتستقرى فى مصر، دى هتفرح قوى».

ثم أردفت فى نوع من الاستهزاء الذى لم يلاحظه:

= «آه فعلاً، هتفرح قوى، هستأذنك بس عشان عندى شغل، وفرصة سعيدة جداً».

ترجلت من غرفة المكتب خاصته لتذهب لغرفتها، وهى تقول بداخلها فى شىء من الخبث: «كدا نبتدى!»

ثم تحدث شريف مع صديقه باسم هاتفياً بعد أن ترجلت من الغرفة

وأدرك تلك الصدفة الغريبة التي جعلته معقودًا في لسانه لوهلة، فصديقه كان يأخذ قسطًا من الراحة ذلك اليوم فقط لمرضه.

- "إيه يا باشا أخبارك إيه؟ صحتك عاملة إيه دلوقتي؟"

= "تمام يا حبيبي، مانترمش من سؤالك، ادعيلي بس".

- "بقول لك إيه، أنت ليك عندي عزومة لما تقوم بالسلامة كدا، واحنا عندنا كام باسم يعني".

= "يا باشا مش مستاهلة عادي ماتتعبش نفسك، مش مستاهلة".

- "يا عم مفيش تعب، تعب إيه بس! دا بيت أخوك يا ابني، وبعدين أنت هتعمل بلقمتك أصلاً كمان".

وأردف في نبرة فُكاهة ومزاح:

= "إيه أجيب معايا أكل أسهل ولا همسح السلم، يا نهار أبيض على الزمن يا جدعان!"

- "إيه دا ونبيه كمان!"

اعتدل باسم في جلسته وأردف في فرحة:

= "طب بقول لك إيه؟"

- "اشجيني يا باسم".

= "سيبك من اللى اتقال دا دلوقتى وعائزك فى طلب كدا، بص هو طلب
مش لطيف أنا عارف، بس محدش هيساعدنى غيرك أنت".

- "خير؟!!"

= "فاكر البنت اللى شوفتها فى الفرح وكنت بكلمك عنها؟"

- "طبعا عايزنى أعزمها بمناسبة جوازي، بس أنت عايزها تيجى عشان
تكلمها عشان حضرتك ماعرفتش تتصرف".

= "فاهمنى كدا من قبل ما أتكلم، بس ينفع تعزمها هى وباباها ومامتها
كمان لو يسمح".

- "بص هو والد البنت دى أنا أعرفه كمان وطلع صاحب بابا من زمان
فتمام هيوافقوا يجوا عادى".

= "شكراً يا حبيبي مانتحرمش منك، عارف إني تعبتك معايا من ساعة
ما عرفتني".

- "يا ابني أنت أخويا، هو أنا أطول أشوفك مبسوط كدا على طول، بس
ماطولش فى غيابك عن الشغل أكثر من كدا، ماوحشكش المكتب؟"

- "أكيد طبعا يا باشا، هرجع تانى قريب قوى".

مزح مع صديقه قليلاً ثم أغلق المكالمة؛ ليكمل عمله المتبقى قبل أن
يغادر الشركة.

سُرعان ما أتم عمله، وعاد لمنزله.

أعدت كارما الطعام، ووضعتَه على المنضدة في شكل منظم، وجلسا سوياً لتناوله، كانا يتحدثان عن بعض الأمور المتعلقة بما حدث في يومهما، والمواقف التي مرّا بها طوال اليوم.

= "ماقولتليش هنشوف فيلم إيه بقي؟"

- "هنشوف لما نروح طيب عشان مش حافظ أسماء الأفلام أساساً".

= "تمام، بقول لك إيه، أنت شكلك عايز تقول حاجة".

- "آه فعلاً، بعد الفيلم بس ولما نروح نتعشى هقول لك كل حاجة".

وبعد أن انتهيا من مُشاهدة الفيلم.

- "ياه! الفيلم كان جميل قوى".

لم يُكمل عبارته وأردف:

"أنتِ كويسة؟!!"

= "بقي حد يدخل مراته فيلم رعب، وأنت عارف إني بخاف من خيالي

أصلاً!

ثم هزق في الضحك وقال: «معلش لازم تتجرأى وتتعودى».

= «تعالى ناكل طيب».

- «آه أنتِ هطلعى خوفك بقى فى الأكل مش كدا؟»

= «آه بقى، أنت السبب هعمل إيه، وبالمرّة تبقى تحكى لى اللى كنت عايز تقوله».

- «تمام، يلا بينا».

.....

- «أهو يا سقى عوضتهالك فى الأكل أهو».

أردفت فى مزاح:

«ما كفاية الفيلم».

افتقر عن أسنانه ضاحكاً، ثم أردف:

- «كارما، ممكن أتكلم معاك فى حاجة؟»

= «أكيد طبعاً».

- «إيه رأيك لو نعمل عزومة بسيطة كدا لواحد صاحبي كان عيان قوى

وهو زى أخويا وتعزى كمان صاحبك دى الى اسمها وعد؟

= "مفيش مشكلة عادى، بس عايزنى أعزم وعد ليه؟"

- "لأ ما أنتِ هتعزميةا هى وباباها ومامتها يعنى لو مش هتقل عليكِ
عشان نضمن إنها تيجى".

= "لأ مش هتقل عليا ولا حاجة عادى، بس ماتقنعينش إن العزومة دى
عشان هو كان عيان، أنتِ مخبي حاجة تانية؟"

- "هو الصراحة آه، مش عشان كدا بس فعلاً، من الآخر كدا هو معجب
بصاحبك وعد وعايز يتعرف عليها، وهو حاول كذا مرة يتعرف عليها
بس ماعرفش بردو".

= "قول كدا بقى، بس هو مين صاحبك دا؟"

- "باسم الى شوفتيه فى الفرع مش فاكراة؟!"

= "آه افكرت، تانية واحدة أنا نسيت أسألك عن حاجة، هو إزاي
صاحبك أساساً؟ قصدى تعرفه منين؟"

- "عادى، كان معايا فى نفس الكلية، وصاحبى قوى يعنى، حالياً هو
بيشتغل معايا فى نفس الشركة".

قالت فى تعجب، واعترتها الدهشة التى كانت جليّة على وجهها:

= "هو مهندس زيڪ؟!"

- "أيوة إيه المشكلة؟!"

= "إزاي مجد مهندس! أصل أنا فاكدة إن وعد كانت بتحكي لي على نفس الموضوع وأنا كنت معاها اليوم الي شافت فيه الراجل دا أول مرة بس هو كان جرسون".

- "أيوة هو فعلاً كان شغال جرسون، بس هو اتظلم وما اتعينش معيد ووالده أتوفى وكان محتاج شغل ضروري فاشتغل مؤقتاً في cilantro عشان الي حصل له، وكان في نفس الوقت بيدور على شغل في مجاله خصوصاً إن هو شاطر جداً، فكلمت المدير بتاعى عنه وعينه بعد ما أتأكد إن شاطر فعلاً وبقي معايا في الشركة، وهو يستاهل مكانه الحالى وأكثر كمان".

= "طب كويس قوى، فعلاً تحس إن قصته ملهمة كدا".

- "أيوة فعلاً، يا ريت بس الموضوع يكمل على خير".

= "ما تقلقش، الموضوع بسيط".

خيّم السكون عليهما لفترة، ثم تنحنح واستطرد:

- "في حاجة غريبة حصلت عايز أقول لك عليها".

= "خير؟!"

قال في تردد: «أختك».

= «ما لها؟!»

- «هتستقر في مصر وبتشتغل معايا في نفس الشركة».

اختلطت مشاعر الصدمة والحبور بداخلها، وتسمر وجهها دون أى تعبير، دوى صوت دقات قلبها فى المكان بأكمله، وظلت شاردة من هول الخبر، ازدردت ريقها فى صعوبة محاولة أن تستوعب ما قاله للتو: «أحقًا ما يقوله؟ أسترى أختها بعد كل هذه الفترة؟ لطالما حُرمت من هذا الشعور، كانت تتمنى أن تراها كثيرًا فيما بعد».

سمعت كارما دقات باب المنزل، ثم هرولت إليه فى حبور.

- «يا قمر، أهو يا ستي جينا فى ميعادنا زى ما اتفقنا».

= «منورين كلكم، حضراتكم عاملين إيه؟»

- «إزيك يا حبيبتي؟ احنا بخير».

- «إزيك يا بنتي؟ أخبارك إيه؟»

= «أنا تمام، اتفضلوا».

جلسوا على أريكة متسعة لثلاثة أشخاص، ثم أردفت كارما: «عشر

دقايق بس والأكل يبقى جاهز حالاً".

-«اتفضلى يا حبيبتي، خدى وقتك براحتك خالص».

وقبل أن تتجه كارما صوب المطبخ، رن جرس الباب، وغيرت كارما مسارها ناحية الباب، وإذ هى تجد زوجها وصديقه باسم يدخلان، واندھشت وعد حين رأت باسم مجدداً، قد شعرت ببعض القشعريرة والخجل والتوتر، وفي الوقت ذاته شعرت بالقليل من السعادة، وعندما تلاقت أعينهما للحظة فور دخوله قد شعر بنفس الشيء، فكلاهما كان يخفى بعض الكلمات التى كانت عالقة بداخل فمه.

ألقي شريف وباسم التحية على وعد وأسرتهما، وبالرغم من هذا كله إلا أنها تعجبت من وجوده داخل المنزل، فحين وجدته أيضاً يوم الزفاف شعرت بنفس الدهشة التى تسلت بداخلها، ولكن المفاجأة التى جعلتها تراه قد شغلته عن التفكير فى صلته بكارما

وشريف.

بعدها اتجهت وعد سريعاً ناحية كارما التى كانت داخل المطبخ بعد فتح الباب.

-«كارما، إيه دا؟ أنت جيبانى هنا عشان كدا؟!»

وقالت كارما فى ارتباك:

= «لأ خالص دا...دا... شريف عزمه عشان كان عيان بس، وبعدين
بقي سيبيني أخلص الغدا بسرعة».

ثم نظرت وعد لكارما من أعلى حافة النظارة وقالت لها في شك:

-«يا كارما!! مش أنا اللي تضحكي عليا بكلمتين، طبعًا مش مصدقة إنه
هنا عشان السبب دا، بس هعديها بمزاجي عشان عارفة أنتوا جايينه ليه».

افترت كارما عن أسنانها ضاحكة، فهي تعتاد ذكاء وعد وفهمها دومًا لما
يدور بداخلها حتى وإن لم تتفوه به، وأخبرتها:

= «ما خلاص يا وعد بقي، مش أنتِ فاهمة بتسألني ليه؟»

-«عشان كدا ماقولتليش إنه هيجي لما عزميتنا؟»

= «أحلى حاجة إنك بتفهميها وهي طيارة، يلا خلاص الأكل جهز، هروح
أحضر السفرة بقي».

-«استنى، هو أنتوا تعرفوه منين أصلًا؟»

= «هو زميل شريف في الشغل وصاحبه جدًّا».

-«دا اللي هو إزاي يعني معلش؟!»

= «لا دى حكاية طويلة هبقى أحكيك عليها بعد الأكل بقي، مش وقته
عشان سايبينهم لوحدهم كل دا».

-«خلاص ماشى».

وفى الوقت ذاته كان باسم وشريف يتحدثان مع والد وعد.

-«إزيك يا شريف؟ أخبارك إيه يا حبيبى؟ وعامل إيه فى شغلك؟»

= «كله تمام، آه صحيح نسيت أعرفكوا، دا صاحبي

وزى أخويا بالظبط باسم، صحاب من أيام الجامعة، وبنشغل سوا».

-«أهلاً إزيك يا ابنى، مبسوط إنى اتعرفت عليك».

أجابه باسم بابتسامة: «أنا بخير وكله تمام، أنا سعيد أكثر إنى اتعرفت على حضرتك».

وضعت كارما ووعد الطعام على المائدة فى نظام ثم شرعوا فى الأكل، جلسوا جميعاً حول المنضدة فى صورة بسيطة لكن مُنظمة، وكان من حين لآخر يختلس النظرات لها كما يفعل دوّمًا.

بعد الانتهاء من تناول الطعام قام شريف بالتحدث مع والد وعد مجددًا على انفراد قائلًا له فى تردد:

«بقول لحضرتك... كنت محتاج أتكلم فى موضوع كدا يعنى».

= «طبعًا يا ابنى اتفضل».

استطرد حديثه المتهدج:

- "بصراحة كدا كان فيه موضوع بخصوص بنت حضرتك، كان واحد صاحبي مكلمني عليه، و... و... هو مش عارف يجيب لحضرتك الموضوع إزاي يعنى...أ...أ...أ..."

= "خير يا ابني، ليه الدوخة دى كلها ما تقول، حد ماسك لسانك؟"

- "بصراحة كدا ومن الآخر بنت حضرتك فيه واحد عايز يتقدم لها، وكل ما يحاول يتكلم معاها هي بتصدّه، فقرّر يختصر الطريق ويتكلم مع حضرتك على طول أحسن.."

= "ثانية واحدة، اللى بتتكلم عليه دا هو صاحبك اللى موجود هنا؟"

- "بصراحة آه هو، حضرتك عرفت منين؟"

وانفجرت أساريه عن ضحكة خفيفة وهو يقول:

"يا ابني عيب عليك، بردو هو من ساعة ما دخل وأنا شايف نظراته لوعد كأنه عايز يقول لها حاجة ومش عارف، وبعدين أنا عفا عليا الزمن، خليه يتكلم معايا على طول، ابعتهولى طيب دلوقتى، أنا عايز أكلمه.."

قال شريف فى حماس وفرحة: "حالا.."

توجه لصديقه الذى كان فى مكان قصى بعيداً عنهما بداخل المنزل، وأردف:

- "باسم، باباها عايز يتكلم معاك.."

اتسعت مُقلّته في برق وهو يردف:

= «نعم! أنت بتهزر؟! إيه الى عملته دا، طب أروح أقول له إيه دلوقتي، أنا كنت عامل حسابي أحاول أتكلم معاها أو أتعرف على مامتها وباباها وكله يجي واحدة واحدة، ما أنت على طول بتدبسنى، أعمل إيه؟!»

- «يا عم أعصابك، مش كدا، أولاً أنا عارف إنه هيحترمك أكثر لما تروح تتكلم معاها على طول وده الصح وأكيد هتعرفها مع الوقت، ثانيًا أنا عارفك مش هتاخذ أى خطوة، فقولت بس مجرد دفعة تحركك، ثالثًا الراجل ملاحظ شوية وفاهم وباين عليك بصراحة إنك معجب ببيها، وكمان يا بنى أنت دايبخ بقالك كذا شهر وراها في كل مكان بتروحه، وبردو بتصدق فده الحل الوحيد».

ثم قال في حنق: «ماشى، هروح أكلمه بس عارف لو رجعت لقيتك بتكلم مامتها بقى على الموضوع دا هعمل فيك إيه?!»

انفجرت أسارير شريف وأردف:

«يا عم روح أنت هتوجع دماغى ليه!»

«الأرواح أرزاق، كل ميسر لرزقه».

- جلال الدين الرومي

ثم توجه باسم بجانب مقعد والدها وهو في حالة فريدة من نوعها، حالة من الارتباك الذي تسلسل بداخله رويدًا، سعادة ممزوجة بفوضى داخلية، اكتنفه التوتر واستقر بداخله.

جلسا بمفردهما، بينما الباكون كانوا يجلسون بعيدًا عنهما بعض الشيء، غام الصمت بينهما قبل بدء الحديث،

وحينما طال ذاك الصمت، بدأ باسم قائلاً:

"شريف قال لي إن حضرتك كنت عايزني".

فابتسم قليلاً وأردف: "يعني أنت مش عارف أنا عايزك ليه؟ هعتبر إنك مش عارف وهقول لك على طول، قول اللي جواك وما تخافش، أنا هسمعلك".

ارتبك وارتعد باسم بعض الشيء، شعر وكأن الكلمات عالقة بحلقه، ودوت نبضات قلبه وقال:

"بصراحة أنا مش عارف أقول إيه، أو مش عارف أجيبها لحضرتك إزاي يعني، حاجة جديدة كدا عليا وأول مرة أحس بكدا، هو في الحقيقة أنا شوفت بنت حضرتك من فترة، بعدها ماشوفتهاش رغم إني كنت حاسس إني هقابلها تاني، مش عارف حسيت كدا إزاي، بس فعلاً كل دا اتحقق وشوفتها تاني في فرح شريف، ومن الصدفة إنها صاحبة مراته، ماصدقتش اللي حصل دا، حسيت إني في فيلم عربي قديم".

تنهد طويلاً، مُحاولاً أن يُلملم من الشجاعة النذر الكافي واستطرد:

"هكون صريح مع حضرتك، أنا حاولت أكلهما كذا مرة حتى أتعرف عليها بس مش أكثر، وكان نفسى أخذ خطوة فى الموضوع دا، وأطمئن بس إن شعورى فى محله وكنت عايز أقابل حضرتك أصارحك بكل دا، عشان دا الصح يعنى، بس هى كانت بتصدنى دايماً، أنا نفسى أتقدم لها من الآخر".

هش الرجل لما قاله باسم وأردف:

- "ياه! كل دا جواك! عامّة أنا احترمتك جدّا لما قولت اللى فى قلبك، وصارحتنى على طول وكل دا على راسى طبعًا، وأنا شايف الكلام دا فى عينيك، من ساعة ما دخلت الباب وأنا ملاحظ، وطالما أنت بقيت واضح معايا أنا لازم أردهالك، وعشان كدا تعالى يا بنى البيت عندى تشرفنى أى وقت ونبقى نشوف الموضوع دا".

اتسعت مُقلّته من أثر الدهشة، كان يتوقع أنه بحلم لا يريد الاستيقاظ منه، كانت بداخله رهبة شديدة من هذا الحوار، ولكنه مر بسلام دون أدنى مُشكلة، شعر كأن نفحات من النسيم العليل قد هبت عليه مليئة بإشراقة وبريق الأمل، وأردف فى تحشرج:

= "ثانية! حضرتك بتتكلم بجد؟! إزاي؟! يعنى إيه بس عشان مش مستوعب؟!"

قد باغتته العبارات على حين غرة، فكيف للأمور أن تجري بهذا المسار؟
كيف يجتمع شخصان مجدداً بعد ظنهما أنهما لن يريا بعضهما ثانية؟
وكيف تجعلهما الأقدار أقرب مما قد تصورا، وتؤكد مشاعرهما تجاه
بعضهما دون ترتيب أو توضيح؟ هي أشبه باللغز المعقد وغير المفهوم،
ولكنه يزيد يقيننا ويشعرنا بأريج وأوج السعادة، نشعر وكأننا أشبه بلوح
من خشب سابح فوق البحر تُحركه الأمواج،

وتداعبه في لطف ونحن لا نعرف إلى أين سنتجه، وفي الوقت ذاته نحن على
يقين أننا سنرسو بموقعنا اللائق.

الفصل الثالث - من ثنايا الروح.

«إذا أردت التوقف عن القلق والبدء بالحياة، إليك هذه القاعدة: عدد نعمك وليس متاعبك».

- ديل كارنيجي

تجلس شيرى فى إحدى الشرفات كعادتها؛ لتراقب منظر الغروب، فكلما تنظر إليه تعتقد أن غروبها قد حان، تبقى سجيئة أفكارها وذكرياتها التى ما زالت تطاردها، وتذرف عيناها الدموع فور تذكرها، فهكذا تقضى يومها على نفس النمط.

قاطعها عن كل هذا صوت هاتفها.

- «ألو، ازيك يا شيرى؟ أخبارك إيه؟»

= «كويسة يا طارق، أنت عامل إيه؟»

- «تمام جدًا، شيرى بقول لك فاضية النهارده؟»

= «أيوة اشمعنا!»

- «مفيش هو النهارده مش بيفكرك بحاجة؟»

= «مش فايقة يا طارق للكلام دا، أنا مش عايزة أروح أى مكان أصلاً».

- «هو عيد ميلادك النهارده، وكنت عايز أشوفك يعنى لو ماعندكيش مانع؟»

وضعت كفها على أعلى رأسها، لا لأنها نسيت هذا اليوم وتريد الاحتفال به، بل لأن حقًا هى قد فقدت أبسط معانى السعادة، فقدت نفسها وكل

أمر مُتعلق بها، كأنها حكمت على نفسها بأن تموت وهي ما زالت حية،
وقالت:

= "يا نهار أبيض! أنا مش فاكرة خالص وناسية أساسًا، شكرًا إنك فاكرا!"

- "ما تقوليش حاجة، ولو عايزة تشكريني بجد ممكن أشوفك النهارده
ونحتفل سوا كدا؟ احتفال بسيط بس هيعجبك يعني!"

= "ماشى اللي يريحك، تحب نروح فين؟"

- "أنا هعدى عليكِ ونروح كافية هيعجبك قوى أنا واثق".

= "ماشى امتى طيب؟"

- "بعد الشغل على طول".

= "ماشى، تمام".

وبعد مرور ساعتين، قامت شيرى بالنظر إلى فستانها الذى يميل لونه
للأزرق الداكن، ثم ارتدته، صففت شعرها بطريقة منمقة، وأخذت
ورقة وقلم وبدأت فى تدوين بعض ما يتسلل بداخلها فى حين عدم وجود
شخص لمحدثته بكل ذرة تملأها دون ريب، وكأن قلمها هو خليلها
الوحيد:

"عمرى فى حياتى ما كنت أتوقع إنى يوم ما ألاقى فرحتى يبقى فى الوقت
الغلط، طارق على طول بينصحنى وواقف جنبى أكثر من أى حد، بس

مايعرفش إن الذنب الى ارتكبته أكبر من إنه يتنسى أو أتصالح معاه، بحس كثير إن نفسى أحكى له عن الى عملته وإنى أذيت أقرب الناس ليا، حياى اتبهدلت من ساعة الى عملته أنا وقريبى، بحس إنى مُقيدة ومتراقبة منها، دا بيخلينى أسأل نفسى يا ترى المصيبة الجاية هتبقى إيه؟

طارق ظهر لى فى وقت كنت بفقد فيه أى شعور بالأمان والراحة، وإن فيه حد هيفضل يحبنى بعد كل المشاكل الى أنا فيها، مش عارفة أنا ليه بتعامل معاه بالطريقة دى رغم إن هو من الناس -القليلة قوى- الى مش مسببة أى أذى أو جرح فى حياى، عارفة إنى بعامله بشكل مش لطيف، بس عشان أنا واثقة إنى مش هعرف أكمل معاه، أنا ماليش طاقة للحب خالص، ماليش طاقة أحب بيها حد، بحس كثير إن نهايتى قربت.

بعيدًا عن أى حاجة، فيه حاجة جوايا ضميرى مش سامح بيها ومش قادرة أستحمل شعور الذنب أكثر من كدا، أنا حرفيًا مش عارفة أكمل حياى ولا أحس بحاجة حلوة،

عارفة إنى عملت حاجات غلط، وأنا لسه بعمل حاجات غلط بس كان نفسى أفوق بدرى شوية عن كدا».

كثيرًا ما نعتقد أن الأشياء الجميلة التى تأتى فى أوقات الحزن، تأتىنا فى الأوقات الخاطئة، أى أننا لم نستطع أن نشعر بقيمتها؛ لأننا منغمسون فى الحزن، ونتمنى لو كانت هذه الأشياء تأتى فى أوقات سابقة، لكننا لا نفقه الكثير فى فهم الأوقات المناسبة للأحداث وكله يأتى بنظام وتدبير

دقيق للدرجة التى جعلتنا لا نعلمها، فتأتينا الأشياء فى أوقات محددة لها؛
كى تكون مثل الهواء اللطيف الذى نستنشقه وقتما نشعر بالضيق، مثل
طوق النجاة الذى ينقذنا وقد أوشكنا على الغرق، فى الحقيقة هذه الأشياء
هى قد جاءت فى أفضل وقت لها؛ كى نشعر بجمالها وصدقها وأهميتها.

أخذ طارق ينظر فى تردد للخاتم الذى قد اشتراه خصيصًا لشيرى؛ كى
يعرض عليها الزواج، فهو واثق أنه يستطيع إخراجها من تلك الحالة التى
لا تنقطع أو تنفصل عن دوامة الحزن، ولكنه فى الوقت ذاته كان غير واثق
من أنها ستوافق على هذا الزواج، ولكنه قرر فى النهاية خوض التجربة.

بعد أن ارتدى حُلته المفضلة لديه، اتصل بها قائلاً:

"إيه يا حبيبتي جهزتي خلاص عشان هعدى عليكِ كمان عشر دقائق".

= "آه خلاص جاهزة تمام".

ساد بينهما الصمت للحظات ولم ينطق أحدهما بشيء على الإطلاق، فكل
منهما كان سارحًا بخياله فى شيء ما: كان يتخيل طارق أن اللحظة قد
أوشكت؛ ليفصح عما بداخله وسيتحقق حلمه الذى لطالما يحلم به منذ
لقاءها، ويتخيل اللحظة التى ستوافق فيها على الزواج منه.

وهى الأخرى تشعر بشيء من السعادة ولكن ممتزجًا بحزن، هذه المرة
كان حزنها أقل، وما لفت نظرها هو قوله لكلمة "حبيبتي" لأول مرة على
الإطلاق وأخذ يتردد صدى هذه الكلمة داخل ذهنها: "حبيبتي! ...

حبيبتي! ... حبيبتي!، كل هذا قد جشمها أن تتفوه بشيء ولكنها تنهدت.

واستطرد:

- «أنا هقفل بس دلوقتي عشان ألحق أجهز وأعدى عليك».

= «ماشي، سلام».

- «سلام».

تشابكت الشكوك داخل رأسها حول السبب الذي جعلها تشعر بسعادة فائقة -غير المعتاد- والذي جعلها تتعامل معه بلطف حين كانت تعنفه القول وتجيبه بكل فتور قبل ذلك؛ حتى لا يتعلق بها أو على الأرجح حتى لا تعتاد اهتمامه وتتعلق هي به، ولكنها هذه المرة أطلقت العنان لمشاعرها، مع إبقاء نذر من الحزن والخوف بداخلها.

- «مالك؟! بتبص لي كدا ليه؟!»

= «بستغرب هو فيه حد زيك كدا بجدة؟!»

- «لا، أنا ماليش في الرومانسية يا عم باسم! فاشلة فيها يعني الصراحة، اتكلم عادى هتلاقيني شغالة على طول».

= "هو بصراحة أنا مش عايز أخرجك وأقول لك إن أنا كنت بغلط فيك مش بقول كلام حلو، دا أولًا، يعني كان قصدى إن مفيش حد دماغه ناشفة زيك، ومفيش حد طلع عينى زيك، ومفيش حد لفنى وراه كده زيك، بس على مين! فاكرانى كنت هسيبك وهزهق مثلاً من المحاولة؟"

رفعت وعد حاجيها باستنكار وتنهدت ثم أردفت: "بقى كدا! بقی أنا دماغى ناشفة؟ ماشى، ماشى، وبعدين ما براحتى يعنى، فيه مانع معلش؟"

= "أنا آسف، ما أنتِ دوختينى الكرة الأرضية عشان سعادتك تقول لى بتتقل، مش ممكن!"

- "باسم، باسم، باسم، باسم".

= "عايزة إيه؟ كفاية زن!"

ثم انفرجت أساريرها وقالت: "أنا بهزر يا رمضان إيه مابتهزرش؟! أنت عرفت منين إنى بكتب وكدا؟"

افتقر عن أسنانه ضاحكاً وهو يقول:

"لا ياخى بهزر،

وبعدين أنا ليا مصادرى الخاصة ماتاخدش فى بالك".

ثم نظرت له من أعلى طرف نظارتها، وابتسمت قليلاً وقالت:

"محدث يعرف الحوار دا غير كارما وشريف،

وشريف أكيد عرف منها وطبعًا أنت سألته عنى، مش كدا؟"

"= لا صقفة يا جدعان بجد، أنت مكشوف عنك الحجاب كدا إزاي؟"

- "مش محتاجة تفكير، هما الوحيدين اللى كنت بتسألهم عنى، وهو صاحبك وهى صاحبتى فأكيد عارفة عنى كثير، هو أنت للدرجة دى كنت مهتم؟ يعنى نفسى أعرف أنا وأنت ماشوفناش بعض غير صدفه زمان، حتى كانت أول مرة وإزاي حسيت بالشعور دا وأنت ماتعرفنيش؟"

افتتر عن أسنانه ضاحكًا ونظر للأسفل للحظة، ثم رفع رأسه وقال:

"مش هضحك عليك وأقول لك إن كنت بدور عليك من ساعة أول مرة شوفتك فيها، عشان ماكنتش متأكد من اللى حسيته وكان ممكن يبقى إعجاب أو حاجة وهيروح مثلاً، بس الغريب إن كان فيه حاجة جوايا مخليانى واثق إني هشوفك تانى، ولما شوفتك فى الفرح استغربت وفرحت".

تنهد قليلاً حتى يُكمل حديثه:

"ساعتها حسيت إن مكتوب لى أشوفك تانى، أه أينعم طلّعتى عيني عشان أكلمك، كنت بجاول أعرف عنك حاجات كثير من شريف عشان عارف إنك صاحبة مراته جدًا، وكنت عايز أتقدم لك من غير لف ودوران كثير، كنت شايف فيك الاختلاف وكل حاجة كويسة".

- "هو مجد إزاي شايفنى كدا وأنت ماتعرفنيش؟"

= "يا وعد مش كل الناس هتشوفك بنفس الطريقة، وإلا كان زمانى سييتك من ساعة ما إنت كنت بترفضى تتكلمى معايا وزهقت، وقلت ليه أوجع دماغى أساسًا وممكن إحساسى يبقى مش صح، بس بحس إن إحساسى دا عامل زى البذرة اللى اتوفر لها كل العوامل عشان تنضج صح وتفضل ثابتة وقوية لما تكبر ودا اللى حصل معايا بالظبط".

- "إيه دا بس، كمان بتقول شعر! "

= "مش عارف ليه حاسس إن فيه حاجة عايزة تقوليها بس مش قادرة تقوليها دلوقتى؟"

نظرت إليه فى شىء من الدهشة وقالت: "هتعرف كل حاجة فى وقتها ماتقلقش".

ثم تنهد فى نشوة وهو يقول: "ماشى".

مرت فترة وجيزة عليهما فى جو من الصمت الذى تبادلاه سويا، كل منهما كان يريد إخبار الآخر بشىء ما، لكن حينما تأتى تلك اللحظة ينعقد اللسان عن الكلام.

قطعت والدتها هذا الصمت قائلة:

"يلا الأكل جاهز يا حبابي".

جلس طارق داخل سيارته أمام منزل شيرى، وألقى نظرة عابرة على الخاتم، ثم ابتسم ولكن ابتسامته كان ممزوجة بشيء من الخوف، أيقظته مكالمته شيرى من حالة الشرود والحلم والتخيل العميق، وبعدها بدقائق دلفت للسيارة، ثم انطلق بسيارته.

ففى هذا اليوم كان يعاملها كالأميرة بل كان يريد أن يجعلها كذلك باقية حياتها، كان غير مصدق لما قد رآه: فهو لم يرها بهذه الحيوية والسعادة والروعة من قبل، وهذا قد أعطاه قسطًا من الارتياح، كانت صورتها ما تزال عالقة بذهنه أثناء قيادته حتى وصلا للمكان المفضل لديه، وقبل أن يترجلا من السيارة، قال طارق:

"شيرى، النهارده أنا جبتك أكثر مكان بحبه وبرتاح فيه دايماً، محدش يعرف إنى بحب أبجى هنا كتير غيرك، الكافيه دا شاركنى كل لحظة فى حياتى؛ لما بكون مضايق أو فرحان بروح هناك، لما ببقى عايز أبقي مع نفسى بروح هناك، عشان كدا الكافيه دا بحب أقعد فيه، عشان كدا أنتِ أول واحدة أجيبها معايا المكان اللى بحبه".

بعد ذلك قد صوبت شيرى نظرها على حين غرة ناحية طارق مُتعبجة من قوله، ولم تستطع قول شيء وظلت ملامح الدهشة على وجهها، لم ينظر إليها وأردف:

"ماتبصليش كدا يا شيرى، أنتِ فاهمة وعارفة كل حاجة بس كنتى مش عايزة تصدق".

لم يمنحها الفرصة للإجابة عليه وترجل من سيارته وترجلت هي الأخرى، بدأ في السير على السواء حتى دخلا سوياً، وكانت المفاجأة لدى شيرى أنها رأت المكان خالياً من كل شيء سوى طاولة واحدة ومقعدين ملحقين بالطاولة، ثم جمعت الأفكار بداخل رأسها، وتأكدت مما كانت تظنه، بدءاً مما قاله لها منذ لحظات بداخل السيارة وختاماً ما رآته للتو، فما كان بذهنها من قبل ما هو إلا مجرد شكوك ولكنها أصبحت واثقة من كل ما توقعته، كان خوفها الأكبر هو أن تحطم قلبه ولا يتبقى منه سوى الحطام الذى يتناثر، فهي فى حقيقة الأمر تحبه، ولكنها لا تريد أن تُصرح بهذا حتى لا تنكشف حقيقتها أمامه وتخسر هو أيضاً، فهو كان دوماً بمثابة الملاذ والملجأ لها، وهو الوحيد الذى ظل يحبها حتى فى أسوأ حالاتها.

كان همها الأول والأخير هو ألا تجرحه بدون عمد أو تخسره.

سحب لها أحد المقعدين حتى تجلس، وجلس هو على المقعد المقابل لها ثم تنهد عدة مرات وقال:

"شيرى، اليوم ذا مميز قوى فى حياتى، أولها طبعاً عيد ميلادك، وتانى حاجة إنك أول حد فى حياتى يجى معايا المكان دا، وآخر حاجة فيهم وهى لا تقل أهمية عن اللى قبلهم إنى قررت ماخبيش عليك حاجة، وأقول لك على اللى محبيه جوايا، ماعرفش جتلى الشجاعة دى إزاي بس مش قادر ماقولش بردو".

مع كل كلمة يتفوه بها، كان صوت دقات قلبها يعلو أكثر وخوفها يزيد على

السواء.

"شيري، أياً كانت مشاكلك مش عايز أشوف دمعة منك تاني، أنا عندي استعداد أشاركك كل مشاكلك وأفضل جنبك على طول مهما حصل، يا ريت تبدأى صفحة جديدة فى حياتك، ادينى فرصة".

بدأت مقلتها تظهران لمعان الدموع قبل نزولها على وجنتيها وهى تقول:

"هتزهق يا طارق!"

- "مش بزهق".

= "بلاش تجرب عشان هتندم!"

- "بحب أجرب".

= "مش عايزة أخسرك ولا تسيبنى زى ما أنا لوحدى".

- "من هنا ورايح مفيش حاجة اسمها لوحدى".

أردفت فى تهدج:

= "يا طارق أنا..."

كانت كل إجابة يتفوه بها يقولها مُسرَّعًا، دون تفكير مُسبق.

ثم صمت لبرهة وقال:

"شیری، أنا عايز أقول لك حاجات كتير، من ساعة ما عرفتك وأنا بلمح عنها، بس خلاص مش قادر أخبي أكثر من كدا بجحد، أنا هتكلم معاك بكل صراحة يا شیری، أنا كنت لما بشوفك كنت بحس إني بشوف حاجة مهمة عندي، وكل ما كُنت بتتكلم معايا عن مشاكلك وكدا كان تمسكي بيزيد بيك، وشعوري كان بيكبر أكثر وأكثر".

تغيرت ملامح وجهه وأردف:

"ما لك يا شیری؟"

أثناء قوله لتلك العبارات كانت مُقلتها أو شكتا على البكاء فقد باغتها الشعور الذي لم يكن بالحُسبان، كانت تشعر بمزيج من المشاعر لم تفهمه هي بوضوح، فعلى الرغم من سعادتها بأن هناك من يشعر تجاهها بكل هذا وخاصة أنها أيضًا تحبه كثيرًا، إلا أنها كانت تتمنى ألا يخبرها بهذا طيلة حياتها وكان هذا كافيًا أن يُلطخ سعادتها بشيء من الحزن والخوف، حاولت كثيرًا إبقاء مشاعرها بعيدًا وتنحيها جانبًا، لكن غلبها الأمر.

وقالت بتحشرج:

"طارق، أنا مُقدرة كل حاجة بتقولها بس لو سمحت كفاية!"

ارتبك قليلًا وقال:

"شیری لو سمحتي، سيبيني أخلص كلامي، أنا كتير قوى كنت بسكت

وفعلًا مش قادر أخبي أكثر من كدا.

مش هسيبك مهما حصل، لو الكل سابك مش هسيبك أبدًا، ليه خايفة على طول وأنا بقول لك هفضل جنبك، وأساعدك تعدى أى مشكلة، أنا اللي طلبت دا وعند وعدى إني مش هسيبك خالص، مش شرط أكون بجيب لك هدايا وورد وأقول لك كلام حلو عشان تعرفي إني بجبك، أنا دايماً عندى يقين إن الحب مش كدا، الحب حاجة أعمق بكثير مش الكل بيوصل له، عامل زى البحر كدا، ماقدرش أقول على نفسى سباح وأنا بعم على الشط وكل ما أدخل على الغريق أخاف وأرجع، وإحساسى بيك كان إحساس غواص مش واحد بيعوم على الشط».

تنهد لمراتٍ، ثم فتح غُلبة الخاتم بعد أن أخرجها من جيبه، وقال بلُطفٍ والابتسامة مرتسمة على وجهه:

«اللحظة دى مش عارف أقول لك صعبة إزاي عشان أتجرأ وأقول كدا».

أغمض عينيه للحظة؛ كي يستجمع قواه ثم أردف:

«شیری تتجوزينى؟»

هنا قد انفجرت بالبكاء، وأغلقت العُلبة ببُطء وكلما كانت تغلق العُلبة، كانت دموعها تسيل أكثر فأكثر، كأن هناك مصدرًا للنور كاد أن ينطفئ، كأن السعادة «صرحًا من الخيال فهوى» بالنسبة لها.

ثم تنهدت، وقالت فى تحشرج والدموع على وجنتيها:

"ليه كدا يا طارق؟! ليه!! ليه وصلتني للحظة دى؟! أرجوك بلاش تضغط عليا أكثر من كدا!!"

ضحك ضحكة هيسيرية وهو يُقنع نفسه أن ما سمعه ليس صوابًا وقال:
"معلش بس هو إيه علاقة اللى بتقوليه يانى بطلبك للجواز يعنى؟! مش وقت هزار بقى مجد! امسحى دموعك طيب عشان أعرف أتكلم معاك لو سمحتى، يلا دلوقتى!"

ثم ارتجفت يده وهو يجعل أصابعه تتخلل بين خُصلات شعره البنية وتدلت رأسه من صرح الجبور المستحوذ عليه حتى أسفل الحُطام الذى لا يملك شيئًا سوى الحزن والخراب الداخلى، رفع رأسه وأردف وهو يبتسم ولكن ابتسامته كانت تحمل مغزى عدم تصديق ما قالته شيرى للتو:

"خلاص ممكن بقى أكمل كلامى من غير هزار، المهم كنت بقول لك..."

اقتربت يده من يدها فى بطاء، ووضعها فوقه يدها ولكنها سرعان ما أفلتت يدها.

قاطعته شيرى ومُقلتها مغرورقتان بالدموع:

"يا طارق مجد أنا مش بهزر، ممكن لو سمحت تسمعى من غير ما تضايق، أرجوك حاول تكون متفاهم معايا أكثر، طارق أنا مش هنكر إن أنا كمان بحبك، ومش هنكر إنك فعلاً السند اللى فى حياى وعشان

كدا أنا مش موافقة على الجواز، أو إن علاقتنا تكمل أنا مش عايزة أظلمك معايا، عمرك ما هتبقى مرتاح وأنا مليانة مشاكل وحاجات كثير مخبياها عن اللى حواليا حتى أقرب الناس ليا، عشان كدا استحالة أوافق إننا نتجوز، لو لاحظت كمان إن أنا على طول طريقى معاك مش لطيفة، كنت بعاملك كدا وأنا خايفة تسبنى، بس أنا كنت بعمل كدا عشان ماوصلش للحظة دى، عشان ماتفضلش تتعلق بيا وأنا مش هقدر أكمل، أو يمكن كنت بعمل كدا بردو عشان أنا كمان ماسيبش إحساسى يفلت منى، وأكون سبب العذاب نفسى وعذابك بعد كدا، مش هسمح إنى أذكىك بنفسى يا طارق.

حاولت كثير أمنع نفسى عن الشعور دا وأبعد بس صدقنى ماقدرتش، أنا عارفة إن كلامى دا هيضايقك، بس فعلاً أنا مش هعرف أكمل، أنا أسفة!!»

ثم ضحك بهيستيرية كأنه فى حالة من عدم التصديق حتى دوى صوته بالمكان:

«بتقولى أسفة على إيه، مفيش حاجة يعنى مستاهلة، مش كل شوية هقول لك كفاية هزار، تقولى لى بحبك وكل الكلام دا، وفى نفس الوقت تقولى لى مش هقدر أكمل، يا نهار أبيض يا جدعان!!»

لم تستطع التفوه بشيء آخر وعيناها اللامعتان بالدموع تراقبانه وتنظر لحاله، لم تملك شيئاً سوى الصمت وهى تراه يزداد تدهوراً من أثر ما

قالته له، هي أيضًا كان يتمزق قلبها أشتاتًا، فقد تحولت من أميرة تملؤها
البهجة والفرحة لسجينة مُقيدة بجزنها وشعورها بالضيق، فهو كان السبب
في إحياء ابتسامتها الحقيقية من مرقدتها، وفي الوقت ذاته كانت هي سبب
إخفاء ابتسامته الحقيقية.

وبعد لحظات نطقت بهدوء وصوت خافت:

«طارق ماتعملش في نفسك كدا... أنا...»

قاطعها هو بعنف وحنق، وتحولت نبرة صوته بغتة إلى نبرة عالية:

«أنتِ إيه؟! ما ترُدِّي مشاكل إيه اللى تخليك كدا، أنتِ اللى عاملة في
نفسك كدا، أنتِ على طول بتشوفى اللى ناقصك وبس، مش بتشوفى
إنك حققتِ حلمك، وفي الكلية اللى أنتِ عايزاها وناجحة بتفوق، وأنتِ
اختارتى ماتكمليش دراسات عُليا، لو على وفاة والدك ووالدتك فأنتِ
اتعوضتى بقرايبك، لو على الصحاب فأنتِ اللى اختارتى تكونى لوحداك
دايمًا، دا حتى أنا مش عايزانا نكمل ونتجوز عشان بردو مالكيش طاقة
لأى حاجة، أنتِ مسببة تعاستك بنفسك، كل حاجة وليها حل مهما
كانت المشكلة، كفاية بقى كفاية!»

= «لو سمحت ماتحكمش على حياتى عشان اللى دايمًا بقولها لك دا مش
هو اللى مضايقتنى فعليًا، أنا اللى مضايقتنى أكثر هو ذنب عملته قبل كدا،
لأ كمان جرحت به أقرب الناس ليا من غير ما أحس، ذنبك إيه تعيش
مع واحدة ماتعملش حاجة في حياتها غير إنها تغلط وبس، تجرح وبس،

ذنب كبير ارتكبته محدش يعرفه ومُحتفظة به، ولما ظهرت لى كنت ساعتها بعمل انتفاضة ضد حياتى، وأفوق من التوهان اللى كنت فيه وإنى كنت بخسر نفسى من غير ما أحس، ومحدش ساعدنى غيرك ولأنى عارفة حل اللى أنا فيه هيجى فى أوانه وهيبقى على حساب حياتى أنا شخصياً رفضت إنى أتجوزك، لو هيرحك إنى أبعد عنك خالص عشان تعرف تشوف حياتك صدقنى مش هتردد إنى أعمل كدا، وخليك واثق إن اللى عملته النهارده لمصلحتك أنت وهتفهم قصدى بعدين".

رفع حاجبيه بشيء من الاستنكار والحيرة من تناقض قولها بعد أن هدأ فورانه قليلاً، خاصة بعد أن طمأنته بحبها له الذى كانت تجعله كامناً بداخل قلبها، دون البوح به أو التعبير عنه، لكن فى الوقت ذاته كان يحتفظ بالحنق لرفضها طلب الزواج منه وقال:

"فى مصلحتى إزاي بقى يا شيرى! بتضحكى عليا ولا على نفسك؟! ما تقولى مشكلتك اللى معذبك فى حياتك دى، ومش عارفة تكملها بسببها يمكن ألاقى ليها حل، أنا مش فارق معايا غيرك!"

- «ازيك يا شريف أخبارك إيه؟»

= «كله تمام، عاملة إيه؟»

- «تمام بردو».

ثم اختلس منها بعض النظرات، بدأ يراها شخصًا لطيفًا عكس ما كان يراها من قبل، واختلست هي أيضًا بعض النظرات منه حتى التفتت أعينهما وخيم الصمت عليهما للحظات، شعور قد تخطاه وسار بين عروقه ظل يشعر به كلما كان نظر إليها، شعور غير مألوف له منذ زمن.

أنهت هذا الصمت وقالت بابتسامة بَرّاقة تنغمس بين وجنتيها:

"مممكن لو سمحت تقبل مني الهدية دى بمناسبة عيد ميلادك؟"

وبادر بالابتسام لها هو الآخر وهو يأخذ الهدية منها وينظر لها ببهجة وقال:

"إيه دا! أنت عارفة عيد ميلادى كمان! عامة شكرًا جدًا".

- "شكرًا إيه بس!، ثم نظرت للعلبة سريعًا بابتسامة تحمل مُراد ومغزى محدد ولكنه لم يلاحظها بعد،

وقالت بعد أن تنهدت:

"طب مش هتفتحها تشوفها؟"

= "ماشى يا سقى مش هكسفك".

وما أن فتح العلبة حتى وجد شيئًا أعجبه بشدة، واندهش لذلك أيضًا، وقد اتسعت مُقلتاه من أثر الدهشة وأردف:

«هى دى الساعة الى كنت عايز أجيبها! أنتِ عرفتِ منين إن أنا بجبها؟!»

لم تُجبه وابتسمت ثم قالت:

«أهم حاجة إنها عجبتك، هستأذنك دلوقتى عشان ورايا حاجات محتاجة أخلصها».

فور نهوضها للخروج، أوقفها ليردف:

«نستينى حاجة مهمة، أنا وكارما اتفقنا نعمل عزومة ليكِ، وهى بصراحة عايزة تشوفك».

تنهدت ثم أدارت وجهها له مُجددًا لتقول ببرودة:

«طيب مفيش مشكلة».

وبعدها بلحظة ترجلت من عُرفة المكتب،

أطال النظر إليها حتى خرجت من مكتبه ولم يستطع التفوه بشيء آخر، تعجب كثيرًا من طريقتها معه ومن معرفتها للشيء الذى يحبه، وتعجب أكثر من نظراتهما وشعوره الذى بدأ ينمو ناحيتها، كل هذا أثار القلق بداخله، ولكنه لم يكثر ث نمو ذاك الشعور بداخله.

= «مش هقدر أقول لك إيه هى المشكلة يا طارق، صدقنى ملهاش حل».

تنهد وأغمض عينيه للحظة ثم قال:

"شيري، بُصِي أَنْتِ إنسانة طيبة أياً كانت المشكلة بجد هتعرّفي تبدأى من جديد، ولو سمحتى سيبينى أساعدك، أنا ماعرفش أَنْتِ ليه شايقة نفسك كدا حقيقى، أنا مش بشوفك بالشكل دا خالص".

ابتسمت ابتسامة بسيطة فى استهزاء وسخرية:

" = وسعت منك قوى الصراحة، إزاي شايقنى كدا بجد؟ طارق أنا فعلاً آسفة".

وضعت يديها على جانبي رأسها الأيمن والأيسر من تدفق شلال التفكير والشعور بالأسى، وزيادة الضغط بداخل رأسها الذى امتلأ بالدوامات المتداخلة ولم تسكن بعد، حرب تدور داخل رأسها فى ذروتها، سفينة تتخبط بين الأمواج المتلاطمة التى لم ترس بعد، ينهال عليها كل هذا بلا شفقة أو رحمة وقد سن سيفه الباتر!

أخبرته والدموع تتساقط تباعاً:

"أرجوك يا طارق، حاول تنسانى، أَنْتِ مش هتشوف منى غير المشاكل، مش عايزاك تكمل معايا، لو كنت ظهرت لى فى حياتى بدرى عن كدا كان ممكن ينفع، لكن أنا بفوق متأخر، وببقى دايماً لازم أدفع التمن، بس دى مش المشكلة دلوقتى، المشكلة كلها فى إن التمن الى هدفه دا هيبقى على حساب حياتى وإنك ماتشوفنيش تانى".

و بدأ يفعل مُجددًا وقال في حنق مكتوم:

"مش قادر يا شيرى خالص!! مش قادر أنسى ومش عارف كمان!! أنتِ مرض نادر مالوش علاج، مش عارف أخف منه أبدًا، وكل لحظة المرض دا بيتملكنى أكثر من اللحظة اللى قبلها، ينفع أسألك سؤال وتجاوبينى بكل صراحة؟!!"

= "اتفضل".

- "هو إزاي التمن اللى هتدفعيه هيبقى على حساب حياتك، وإزاي حبك ليا معذبك؟"

تعمدت أن تُهمش سؤاله الأول حتى لا يتعمقا أكثر فى ذلك الموضوع وقالت:

= "معذبنى عشان أنت أكثر حد مش عايزة يحصل له أى أذى بسببى، وعشان واثقة إننا مش هنكمل".

ثم تنهدت وأغلقت عينيها لتحبس دموعها وقالت:

"دا آخر كلام عندى يا طارق، أنا وأنت مش هنكمل حياتنا بالصورة اللى أنت متخيلها، ولو سمحت كفاية".

عقد حاجبيه وقال:

"تمام يا شيرى، تمام! براحتك، آسف إني ضايقتك يوم عيد ميلادك

وأوعذك إني مش هتكلم فى الموضوع دا، تعالى يلا عشان أروحك».

لم يعطها فرصة لتقول شيئاً آخر، وانتفض من مقعده؛ كى لا يسكب مزيداً من العصبية والحنق، أزاحه بعنف وأسرع لسيارته حتى لا ينظر إليها، وعلى النظير الآخر بقت هى على المقعد للحظات؛ لتستوعب ما سببته له من ألم وجعلت الشخص الوحيد الذى هو مصدر تفاؤلها وسعادتها لشخص لا يمتلك شيئاً سوى خيبة الأمل والحسرة والحنق وخطام القلب.

خيمت سحابة السكون عليهما داخل السيارة وتشعبت بداخلها حتى تُمطر عليهما المشاعر المهلكة، فكانت شيرى تُلقى بنظراتها عليه بين حين وآخر، ونظراتها تحمل الكثير من المعانى، فكانت ممزوجة بالندم والأسى والاعتذار، وتريد البوح بالكثير من الكلمات، لكنها لم تستطع، كانت مُقلتها بها بريق الدموع، والعبوس أصبح هو العلامة المميزة بوجهها بعد أن كان شعاع السعادة نابغاً من وجهها فى هذا اليوم.

تعمد طارق عدم النظر إليها أثناء قيادته بالرغم من أنه يعلم أنها تنظر إليه، كان شارداً أثناء قيادته لا يفكر فى شىء سوى بها، صورتها ما زالت ترافق خياله، يرى حلمه وهو يندثر نصب عينيه، شعور تخطى قفصه الصدرى وقلبه حتى عشب فى أغوار قلبه داخل ثناياه، يتربع بداخله ولم يستطع منه الفرار، يشعر بألم شديد، وعلى الرغم من ذلك فكل ما أضاف جزع وألم على ألمه هو أنه قد تسبب لها فى حُزن بالغ ويشعر بدموعها التى ما زالت تتساقط منذ أن تحدث معها فى الأمر، لا يريد أن تشكو ألماً، كان يود لو تمسح دموعها وتكف عن البكاء؛ لأنه لا يتحمل أن يراها فى

هذا الوضع، خاصة أنه شعر بتأنيب الضمير؛ لأنه جعلها تبكى.

أخرج من جيبه منديلًا ورقيًا وقال:

"ممكّن بعد إذنك ماتعيطيش، أنا ما كنش قصدى أضايك، أنا آسف".

تلقتّ منه المنديل بأناملها ومسحت دموعها برفق، تبعته قائلة:

"ماتعتذرش، مش أنت اللى مفروض تعتذر، أنا... أنا اللى المفروض أعمل كدا، أنت مالكنش ذنب فى أى حاجة".

تتابعت الدموع مُجددًا على وجهها وقالت فى تحشرج:

"طارق هو كدا مش هنعرف نبقى زى الأول، صح؟! "

ثم تنهد وهو ناظر إليها:

"قلت لك قبل كدا مش هعرف أبعد عنك يا شيرى! "

صفّ سيارته أمام منزلها، وتنهد عدة مرات قبل أن يقول بابتسامة حانية:

"أنا هفضل معاكٍ للنهاية، ماتخافيش... وكلّ سنة وأنتِ طيبة".

ثم بادلته بابتسامة مثلها وهى تقول:

"وأنت طيب... عن إذنك".

وما أن ترجلت من السيارة وأطلقت نظرها في الناحية الأخرى حتى تبدلت تعبيرات وجههما سويًا، مثل القنبلة الموقوتة التي حان وقت انفجارها بكل ما بداخلها؛ لتُجبر ما كانا يخفيانه عن بعضهما البعض أن يتحرر من سجنه المؤقت، فها هو خنجر الأُسى والحُزن يطعنهما مُجددًا، ولكن هذه المرة بقي مُنغمسًا داخل جسديهما سويًا ويُمزق كل ما بداخلهما، باتت ليلتهما في لمسات من الألم المُبرح، يرى حُلمه الوحيد الذي لا طالما يتذكره دومًا في حالة من الاضمحلال وهو عاجز عن فعل أى شىء في هذا الأمر، تُطاردها المخاوف تباغًا، وكلما قررت النهوض، تتعثر مرارًا وتكرارًا.

الفصل الرابع- اظهر وبان عليك الأمان!

«الحب مثل الموت؛ وعدٌ لا يُرد ولا يزول» - محمود درويش

«وعد هو أنا ليه حاسس إن فيه حاجة عايزة تقوليها، كأنك مخبية حاجة؟»

تنهدت وقالت:

«هقولك على كل حاجة!»

كنت مخطوبة وأنا في الكلية وكنت فاكراه بيحبني، بعد خطوبتنا اكتشفت إنه كان أكبر خدعة في حياتي، عارف لما تكون مع حد مش بيعمل أى مجهود عشان علاقتكم تستمر، مع حد شايف إنك آخر أولوياته، حتى أنت نفسك مش فارق معاه، محسسك دايماً إنك مقصر مهما عملت، دا بالضبط الموضوع، اللي زعلنى مش إننا سيبنا بعض وكدا، أنا زعلت عشان ماكنتش أتوقع منه دا!»

رن هاتف باسم بغتةً وشعر بالقليل من الحنق، انصرفت وعد حتى يجيب على الهاتف، وأجاب:

- «ازيك يا شريف؟ أخبارك إيه؟»

= «تمام، بقول لك كنت عايزك فى موضوع كدا».

= «فى إيه؟ حصل حاجة طيب؟»

- «شكلها مشكلة ومش عارف اعمل إيه، ابقى تعالى بدرى الشغل وهحكي لك».

= «ليه بكره؟ تعالى كمان ساعتين نتقابل فى أى مكان وخلاص».

- «خلاص ماشى، سلام».

- «بشمهندس طارق!»

= «خير يا عم صالح، أخبارك إيه؟»

- «بخير يا بيه، كان فيه أمانة عايز أديها لحضرتك يا بشمهندس، الست شيرى موصيانى عليها».

عقد حاجبيه وأردف:

= «أمانة! طب وهى شيرى نفسها فين؟»

- «الست شيرى عزلت من هنا بقالها كام يوم وسابت لك الجواب دا ليك يا بيه، ووصتنى إنك تاخده بعد ما تعزل هى».

ثم تلقى طارق الجواب ونظر أمامه، تنهد وقلبه مُفَعَم بالوجع ثم ختم الحديث قائلاً:

"طب ماتعرفش راحت فين؟"

- "آه طبعاً أعرف يا بيه، آخر حاجة سمعتها إنها راحت تسكن في وسط البلد، دا كل اللي أعرفه".

= "طيب مُتشكر قوى، تسلم".

- "العفو يا بيه".

انطلق هائماً على وجهه، لا يعرف إلى أين يذهب ولا يشعر بنفسه بعد أن هوى الخبر عليه كوقع الصاعقة، لكنه عاد لمنزله وسحابة الحزن تُحلق فوقه مُنذ أن سمع الخبر، ثم هدأ قليلاً وأحضر لنفسه فنجال القهوة:

"طارق،

هتكون بتقرأ الجواب دا وأنا وقتها أكون عزلت لمكان تانى، هقول لك على كل حاجة في الجواب دا بكل صراحة، عشان أنت أكثر واحد أنا بثق فيه، وعارفة إنه هيفهمنى كويس، بس أرجوك تخلى الكلام دا بيننا سوا ومحدث يعرفه غيرنا.

قبل ما أحكى لك أنا ليه على طول مش عارفة أرجع أفرح ولا أكمل حياتى بشكل طبيعى، مش عايزاك تزعل منى أبداً.

طبعًا أنت عارف إن ماما وبابا متوفين من زمان قوى، بس خالتى هى اللى شالت مسؤوليتى، وربتنى وعمرى ما هنسى اللى عملته معايا، وربتنى أنا وبنتها رنيم كأننا زى الإخوات بالظبط.

عارف كدا لما تكون متجوز حد بتحبه بس مع الوقت تحس إنه بقى عادى مابقتش تحبه زى الأول، بقى بينكم فجوة ومش عارف تحس ناحيته نفس الشعور القديم، وتبدأ تزهد من العلاقة كلها وخصوصًا إنكم على طول فى مشاكل، وتحس إن الشخص دا غير اللى كنت تعرفه زمان، وفى نفس الوقت دا يظهر لك شخص جديد وتوهم نفسك إن دا حبك اللى بجد، وتحسه يبحبك قوى وتقرب منه بس تيجى عليك لحظة، وتكتشف إنها مجرد غيبوبة مش أكثر والسيناريو يتكرر.

بس المرة دى هترجع تحن لحبك الأول وتكتشف إن الشخص التانى كان ما هو إلا كومبارس فى حياتك، وبتقول له كلام كان المفروض تقوله لحبك الأول، أو بمعنى أصح تفريغ مشاعر حبك، وبتلاقى نفسك سببت وجع للشخص التانى وظلمته معاك فى رحلتك، بتبقى مابتديش لنفسك فرصة تتأكد من مشاعرك.

عارف بقى إيه المشكلة فى العلاقات يا طارق بجد؟ إننا بجد بنستسلم بسرعة قوى، عند أول محطة بنتعب ونرفع الراية البيضاء وخلص مش بندى فرص للشخص اللى قدامنا،

وأبسط حاجة بنعملها بنسيبه ونروح لغيره وهكذا نعيد المشهد من

تاني، من أول مشكلة أو وقت طويل بنقضيه مع شخص بيخلينا نحس بملل وشمعة الحب بتحس نورها بيضعف كل شوية، بس الى بيفرق الحب الحقيقي عن المزيف إن احنا الاتنين نولع الشمعة دى سوا ونحميها من إنها تنطفى مش نولعها ونسيبها لشوية هوا!!!! هو دا بالظبط الى حصل فى حكاية خالتى الى ماتت.

خالتى كانت هى الشخص التانى الى كنت بحكى لك عنه، بعد جوازها بفترة كان الراجل بدأ يفوق ويرجع لحياته القديمة، والحاجة الوحيدة الى خلته مايطلقش خالتى هى بنتهم رنيم، بس للأسف ماخلهاش تشبع من حبه زى بنته كارما الى خلفها من مراته الأولى.

رنيم كبرت على مشاكل فى استمرار بين مامتها وباباها، وكان دايمًا شايف إن خالتى هى السبب فى مشاكله وكل حاجة وحشة بتحصل له، ومابقاش يحبها -دا لو كان حبها أساسًا- وآخرها كان عايز يحرمهم من الورث، خالتى ماكانتش طمعانة ولا حاجة زى ما هو كان فاكرو، بالعكس كان همها الأول والأخير رنيم وحققها زى أختها كارما، لكن للأسف ماتت بسكتة قلبية لما عرفت إن حياتها وشبابها ضاعوا مع شخص حول حياتها من حياة وردى حياة مليانة تعب بسبب قراراته الغلط، طب أقول لك على حاجة كمان؟ لما اتجوز خالتى كان مخبى عليها إنه متجوز واحدة قبلها، وخلف رنيم قبل كارما، رنيم من ساعة وفاة والدتها قررت تسافر وتبعد، وبترجع وقت الأجازات عشان نشوف بعض وترجع تانى تسافر.

أنا ورنيم اشتركنا سوا فى حاجة بشعة مش مستوعبة لحد دلوقتى إزاي

عملنا كدا، وعاملة زى العلامة السوداء اللي فى حياتى ومش عارفة أسامح نفسى، وهى كمان بس بتبين إنها جامدة وبتكابر.

أنا قررت إني أسلم نفسى عشان أنا وهى اشتركنا فى جريمة قتل، ماسبناش ورانا أى دليل، صدقنى أنا ماعرفش إزاي عملت كدا، بس الموضوع كبر فى دماغها وساعدتها للأسف واللى قتلناه دا يبقى باباها!! مش هقدر أحكى لك تفاصيل أكثر من كدا فى الموضوع دا، أنا مش هسلم نفسى دلوقتى، محتاجة شوية وقت أحاول أصلح كذا حاجة الأول، كان ضميرى بيموتنى كل يوم من اللي عملته، مش عارفة أرجع لحياتى الطبيعية أبداً، ولا عارفة أتعامل مع حد خالص زى الأول.

عايزاك تسامحنى يا طارق على كل حاجة، أرجوك، هبقى أشوفك مرة أخيرة، بس صدقنى كان لازم أبعد عشانك أنت، حتى ماينفعش تتعلق بجد زى، أنا ماستاهلش حُبك! أنا بجد آسفة قوى!

تججرت الكلمات داخل حلقه من هول الصدمة التى أخذت تسيل عليه، وجعل كفه يرتطم بمقدمة رأسه عمداً، وبعد ذلك جعل أصابعه تتخلل شعره حتى نهاية رأسه، وأغلق عينيه للحظة بعد أن كانتا مُتسعتين قليلاً مما قرأه.

- «عامل إيه حبيبي؟»

= «تمام يا باسم، تعالى نقعد، أخبارك إيه؟»

- "بخير وزى الفل، خير يا ابني مُشكلة إيه قلقتني؟"

= "أنا مش عارف أنا بعمل إيه اليومين دول".

- "فى إيه طيب؟"

= "تعرف رنيم؟"

أجاب بإماعة بسيطة تُم على أنه غير مُتذكر، واستطرد شريف:

= "الى بتشتغل معانا فى الشركة يا ابني، فوق معايا كدا، بُص أنا فى الأول ماكنتش طايقها قوى ولا بستلطفها، ومش مرتاح لها كدا فى الأول، بس بعد كدا، مش عارف، مابقتش أخاف من اهتمامها بيا زى الأول، بقيت فرحان لما بشوفها، ببقى مبسوط لما بنقعد حتى نتكلم سوا فى الشغل، بدأت أهتم بيها وأعرفها أكثر، كذا موقف بينا سوا بيثبت لى إنها حد جميل وبتحبني، أنا حاسس إني بدأت أشد لها.

بص أنا عندي كذا شعور مُتناقض فى وقت واحد: فرحان ومتضايق، مرتاح وقلقان، مش عارف أوضح حاجة للأسف، بس أكيد فاهم قصدى، أكيد مش حابب إن الأمور بيني وبين مراتي توصل للمرحلة دى، مش عايز حد تانى ياخذ مكانها عندي، بس غصب عني مش عارف أبطل تفكير في رنيم، حاولت وماعرفتش، أنا مش عارف أخرج من الدوامة دى ودماعى تعبت خلاص من كُتر الحيرة والتفكير".

- "بص أنا عايز أفهمك حاجة بسيطة وأنا فاهم قصدك كويس، أنت كُنت

بتدور في رنيم على مراتك قبل الجواز يا شريف، لو فكرت كدا براحة هتلاقى إن اللى بينك وبين رنيم دا مش حب أنت بس بقى عندك رغبة إنك تلاقى حد يهتم بيلك وتهتم بيه ويشاركك وتحس مشاعرك القديمة وفرغت رغبتك في الاهتمام دى في إنسانة غير مراتك، أنت لو فضلت تفكر كدا مش هتخلص من الدوامة دى، عشان ببساطة هتفضل تتشد كل مرة لحد جديد عشان تحس نفس شعور الشغف والمشاعر الأولى اللى في أى علاقة، اللى هى بتبقى بالنسبة لنا حاجة جميلة بس في الحقيقة هتلاقى إن الجمال مش في المشاعر الأولى بس دى مجرد بداية قصة، مش القصة كلها، فماتوهمش نفسك إن دا حب أصلاً".

= "ممکن يكون معاك حق بس المشاعر دى حاجة مُعقدة كدا".

- "لا يا ابني ماتفتكرش إن فيه حاجة مُعقدة، دى أول حاجة تحطها في دماغك كويس، بس هقول لك على حاجة أنت ممكن اللى خلاك توصل للمرحلة دى مثلاً إنك زمان كنت شايف مراتك حلم عايز تحققه، هدف عايز توصل له، بتحب تفرحها وتشوف لمعة عينيها وكنت دايمًا بتحكى لى أنت إزاي فرحان بشغلك عشان خاطر تعرف تتجوزها، كانت هى محور تفكيرك، ولما حققت كل دا مابقاش الشغف دا زى زمان، بس أكيد دا له حل ماتقلقش خالص".

= "طب اعمل إيه؟ أنا مابقتش حاسس إني مجبها زى الأول، أنا هتكلم معاك بصراحة، أنا مابقتش حاسس إننا ينفع نكمل سوا، ماعرفش ليه بقول كدا، بس كل اللى أعرفه إن فعلاً مش قادر أكمل، وفي نفس الوقت

هى ماتستاهلش منى كل دا".

- "خليها محور تفكيرك زى زمان، اقعد اتكلم معاها، فضفض كل الى فى قلبك، غيروا جو مثلاً، حاول ترجع تهتم بيها زى الأول، واسمعها واعرفها أكثر وأكثر.

بلاش تسيب الحياة بينكم عبارة عن فقاعة فراغ فاضية وتستغرب إن الحياة بقت مملة قوى، كل واحد شايف إن التانى مش مهتم به ومستنى التانى يبدأ فتنسوا الاهتمام والحب والحاجات الجميلة دى كلها وتركزوا فى مين الى بعد عن التانى ومين الغلطان والكلام دا كله، حافظ على حياتك وماتدمرهاش بإيدك، صدقتى أنا خايف عليك!"

كان الضابط حسين جالساً بمكتبه على مقعده، وهالة من الأفكار تُحيطه وتثير ذهنه بمرارة، كان غارقاً فى شروده الذى عزله عن العالم المحيط به، شعر أنه بحاجة لسيجارة فى هذا الموقف، أخرجها من عُلبتها الخاصة بها، قام بإشعالها ثم أراح ظهره قليلاً على المقعد، وجلس فى استرخاء، نظر لأعلى وهو ما زال يغوص بين الأفكار، ما أفسد عليه هذه الأجواء هو طرق الصول للباب ليخبره بأن هناك ضابط يُريد رؤيته.

"النقيب عمرو يا فندم واقف برا".

"طب دخله بسرعة".

وسرعان ما دلف الضابط عمرو صديقه.

- "حسين باشا حبيبي، أخبارك إيه؟"

= "أهلاً يا باشا نورتنى فى مكتبي المتواضع، اتفضل".

ثم جلس الضابط عمرو على أحد المقعدين الموازيين للمكتب مباشرة
وجلس الضابط حسين على مقعده وقال:

"أنا بخير، أنت عامل إيه؟"

- "بخير".

= "تشرب إيه؟"

- "شاي".

= "تمام يا حبيبي ثوانى ويكون عندك".

ثم ضغط على الزر، وبعدها بلحظة دخل الصول؛ ليتلقى ما أمره الضابط
به، ثم انصرف.

- "ها قل لى بقى أخبار القضية إيه؟ لسه مفيش جديد؟"

وتبعه الضابط حسين بإمالة رأس بسيطة تعنى لا.

= "لسه للأسف، عمال أدور كتير ومن وقت للتانى بنسأل معارفه وأهله
عن أى معلومة، القضية مُعقدة جدًّا ومفيش أى خيط يساعدنا".

- "لأ، بس الى قتلوه دول دماغهم عالية قوى ومش سايبين أى أثر وراهم ولا حتى سايبين بصمات خالص".

= "فعلا الى قتل ذكى مسح بصماته، دا حتى الكوباية الى راجل شرب منها وكان فيها الزرنوخ، القاتل واخدها".

- "طب استنى أنا فى حاجة افكرتها، فاكر الفيديو الى اتسجل من كاميرا المحل الى قدام العمارة اليوم دا، ما تحاول تشوفه تانى يمكن توصل لحاجة".

= "شوفته كذا مرة وشوفت بس بنتين خارجين من العمارة كانوا مخبين وشهم وملاحهم مش باينة خالص، ومحدش قدر يتعرف عليهم نهائياً، بس أنا واثق إنهم البنيتين دول هما الى قتلوه، والى أثبت دا شهادة الست الى ساكنة فى العمارة".

- "طب استنى، مش أنت بتقول إن الست الى اتكلمت معاك بخصوص القضية قالت إن البنيتين هما الى عملوا كدا واتأكدت هى من دا؟"
= "مضبوط، عايز توصل لإيه؟"

- "أكيد الست دى شافت رقم العربية ولا الوسيلة الى ركبوها وقتها، و كدا ممكن تجيب معارف الراجل دا ويبقى حتى مُشتبه فيه، خصوصاً إن ماكنش فيه فى الراجل أى آثار عُنف زى ما الطب الشرعى أثبت، والطريقة الى مات بيها كدا بتوضح إن الى قتل دا كان عايز ياذيه بالأخص

ويعرفه كويس، فوارد نشوف معارفه أكثر ونحقق معاهم تانى يمكن يقعوا المرة دى".

وتحدث معه بشيء من اليأس وقال:

= "عملت كدا وبردو مفيش فايده، ماوصلتش لحاجة، تعرف كمان؟ دا حتى العربية الى وصلنا ليها ماطلعتش بتاعتهم وطلعت مسروقة! حتى الشاهدة الوحيدة ما أضافتش جديد ومحدث شاف الى حصل خالص".

- "طب البواب؟"

= "كل الى قاله إن شاف الراجل اليوم دا طالع بيته فى وقت متأخر وهو عارف إن البيت فاضى وبنته مسافرة وراح بردو، وبعدها البواب دخل ينام قبل حتى ما البنتين يوصلوا ومن حظى بقى إن الأوضة بتاعته فى السطوح فأكيد مش هيحس بحاجة، الجريمة تمت بمنتهى الهدوء من غير صوت، والبنتين كانوا مغطين وشهم كويس قوى، وماطلعوش صوت عشان محدش يتعرف عليهم على الأقل من صوتهم، وخرجوا بسرعة بعد كدا، وفى نفس الوقت كل الى يعرفوه يقولوا إنه مالوش أعداء ومحدث كان عايز ياذيه".

- "وطبعاً لما راقبت التليفونات ماوصلتش لحاجة".

= "بردو ماوصلتش فعلاً، معارفه بيتكلموا عادى ومفيش أى حاجة مثبتة ضدهم ولا حتى واحد فى المية!"

الفصل الخامس - تغيير جذرى!

اتصل طارق بشيرى عدة مرات، لكنها لم تجبه، بعدها بساعة اتصلت هى به، انتفض من سريره بعد أن رأى اسمها على شاشة هاتفه وأجابها للتو بعد أن اعتدل فى جلسته، وكان صوتها مُتشعب بالفتور.

- «ألو، إزيك يا طارق؟»

= «أنا تمام، أنتِ عاملة إيه طميننى عليك».

- «غريبة إن بعد كل الى عرفته لسه عايز تظمن عليا وتكلمنى!»

= «محتاج أشوفك يا شيرى، لو سمحتى».

ساد الصمت بينهما للحظات ثم تنهدت وأخبرته:

«ماشى، بس هتبقى آخر مرة».

استطردت الحديث بنبرة ممزوجة بالبكاء:

«عارفة إن الموضوع صعب عليك زى ما هو صعب عليا، بس صدقنى

هو ذا الصبح، سيبنى أعمل حاجة واحدة صبح في حياتي، أنا اتغيرت فعلاً يا طارق للأحسن، وقريب هروح لكارما عشان تسامحنى على اللى عملته فيها من غير ما أفهم غلطى وقتها، أنا ندمت على كل حاجة عملتها وقررت إن اللى هعمله بعد كدا هو الصبح وبس، وأنت كمان ماتزعلش منى أرجوك".

"مممكن لو سمحت ماتعيطيش، هتستغربي لو قلت لك إني مش زعلان منك في أى حاجة وماقدرش أزعل منك مهما حصل، بالعكس يا شيرى أنا لو هبقى زعلان فأنا زعلان عليك أنت".

ثم قال بابتسامة حانية على الرغم من الذى يثقل قلبه:

"مش بقول لك أنت مرض نادر مالوش علاج".

ثم ردت عليه بعد أن هدأت قليلاً من بُكائها كأن كلماته أذابت كُتَل الحزن بداخلها التى تقف في طريق حياتها وشعورها بكل ما هو جميل، ابتسمت من ثنايا قلبها في تلك المرة:

"عمرى في حياتي ما كنت أتخيل إن يبقى في حياتي حد زيك، يا ريتنى كنت قابلتك من زمان كانت حياتي بقت أحسن".

وشعر بالقليل من تأنيب الضمير وأن ثمة شيء يكسر ضلوعه ويتوغل داخل قلبه؛ ليشعر بالحزن ذاته الذى كان يطارد شيرى طيلة المدة السابقة، وقال بتحشرج:

"ماتفكريش في أى حاجة قديمة، اللى حصل حصل خلاص".

حاول تغيير الموضوع قليلاً:

"المهم هشوفك تانى امتى؟"

- "فى نفس المكان الى أنت بتحب تقعد فيه".

= "ماشى بُكرة كويس؟"

- "تمام ماشى، معلىش بس لازم أقفل دلوقتى، أنا آسفة".

= "مفيش مشكلة، سلام".

وفى الوقت الذى سار بداخل عروقها القليل من الطمأنينة والحبور، سار بداخله العديد من المشاعر المتداخلة وغير المفهومة ولكن الشيء الوحيد الذى يدركه أنه يشعر بضيق نفس ممزوج بسعادة لا تتعدى نسبتها ١٪، فهو من المفترض أن يشعر بالسعادة لرؤيتها، ولكن لا يوجد شيء اسمه المفترض فى شعور السعادة بالأخص، هو مجرد ما يشعر به المرء حقاً من داخله.

وحينما أغلق الهاتف للتو، قال لنفسه: "لو فى حد ما يستاهلش حب التانى فيبقى أنا مش أنت! يا ريت أنتِ الى تسامحينى يا شيرى!"

- "رنيم، صحيح هتعملى العزومة لأختك امتى؟"

= "رنيم! رنيم مين يا شريف؟! أنا كارما".

- "آسف يا حبيبتي، معلش، كان اليوم كله أنا وهي ورانا شغل وكنا بنسأل بعض كثير في الشغل، اليوم كان مُتعب قوى".

= "الأسبوع الجاي كدا بعد الشغل تيجوا انتوا الاتنين ونتغدا كلنا ونقعد سوا".

ثم ازدرد ريقه، وشعر بالقليل من القلق والارتباك، ربت على كتفها وقال: "حلو الفيلم دا".

ولكنها نظرت له بفتور دون أدنى تعبير على وجهها، أزالته يده عن كتفها، ثم نهضت من على مقعدها وأردفت: "آه كويس".

- "طب رايحة فين؟ مش هنكمل الفيلم سوا طيب!"
= "معلش تعبانة جدًا ومحتاجة أنام".

- "كارما!"

ثم توقفت عن حركتها، وأنصتت إليه وقتما تحرك ناحيتها، واستطرد:
"ما لك يا حبيبتي؟ في حاجة مضايقاك؟! بقالك فترة متغيرة وحاسس إنك متضايقة، أنا عملت لك حاجة طيب؟"
تنهدت وقالت:

= «خايفة يا شريف...»

- «خايفة! خايفة من إيه بس؟»

= «خايفة، خايفة فى أى لحظة ماتبقاش معايا زى الأول، مشاعرك تتغير، تبطل تحبني، تبعد عني».

ثم هدأت قليلاً وأمسكت بيده، وتفجرت الدموع من مقلتيها التي كانت تسعى جاهدة لكتمها، وأخبرته:

«شريف، بلاش تدى فرصة لأى حاجة تخلى الفجوة دى تزيد أرجوك، أنا مش هقدر، محتاجة وجودك جنبى بجد، ماتسبنيش مهما يحصل، مش عايزة حاجة من الدنيا دى غير وجودك فيها معايا وبس، مش هضايقك أبداً بس أرجوك ماتبعدش عني».

تنهد، وبعدها مسح دموعها من على وجنتيها برقة، وهو ينظر إليها بحنو:

«مش هعرف أبعد عنك مهما يحصل أصلاً، ماتعيطيش عشان خاطرى طيب، أنا آسف لو خليتك تحسى بكل دا، بس إيه اللي خلاكى بردو تقولى كدا مرة واحدة؟ هو حصل حاجة معينة؟»

كان يسأل وهو فى درجة كبيرة من الارتباك، أجابته قائلة:

«مش هستنى لما يحصل حاجة بجد، أنا كل اللي عايزاه إنك تطمنى وماتبعدش عني، نرجع نتكلم سوا فى أى حاجة، لكن أنا مابقتش أعرف

عنك حاجة دلوقتى ودا مخوفنى".

لم يُبد أى تعبير على وجهه، وشعر بالقليل من الاضطراب بداخله، فلأول مرة يُخبرها بشيء ليس من أغوار قلبه كالمُعتاد من قبل.

- "إيه يا عم روميو، عملت إيه؟"

= "رنيم بقول لك إيه، فكك منها بقى وسيبها فى حالها".

- "يعنى إيه الكلام دا؟!"

= "إيه بتكلم صينى أنا!! بقول لك شيلها من دماغك وانسيها بقى، كفاية اللى عملتية فينا كلنا".

- "عملته فيكوا! وأنا كنت ضربتكوا على إيديكوا مثلاً، ما أنتوا اللى وافقتوا بمزاجكوا وكل دا عشان خاطر الفلوس، مش بعد ما كل واحد أخذ نصيبه هتعملول لى فيها الملاك اللى بجناحين وأطلع أنا الشيطانة، ما أنتوا اللى ساعدتوني فى كل دا".

= "اخلصى يا رنيم، عايزة إيه من المحاضرة دى كلها يعنى؟ انجزى مش فايق لك".

- "لازم نتقابل وأعرف منك التفاصيل، النهارده كمان ساعتين فى الكافيه اللى كل مرة بنتقابل فيه كويس؟!"

= "لا، مش فاضى".

- "مش عليا أنا الكلمتين دول يا طارق! آه صحيح كمان، مش عشان هى مش بترد عليا وعزلت يبقى مش هعرف أوصل لها، لأ أنت بتحلم، أنا عرفت عنوانها الجديد، ولو خايف عليها بجد ومش عايزنى أروح لها وأضايقها، أو تعرف أى حاجة عن اتفاقنا يبقى تنزل من بيتك كمان ساعتين فى الكافيه".

ثم أغلقت الهاتف سريعًا قبل أن يُجيب عليها، ولم يملك خيارًا آخر إلا أن يذهب ويُقابلها كما أخبرته.

- "نعم؟ أنا جيت لك أهو زى ما طلبتى، عايزة إيه؟!"

= "يا جدع أنت ما براحة الناس تدخل تسلم مش كدا".

- "بقول لك إيه، أنا عفاريت الدنيا بتنطط قدام وشى الساعة دى ومش ناقصك خالص، قولى عايزة إيه خلىنى امشى".

= "ماشى يا سيدى، اتفضل قل لى، فى جديد بينك وبين شيرى؟"

- "أنت مالك أنت ما تخليك فى حالك، بلاش تدخل فى اللى مالتيش فيه، يعنى جايانى عشان تسألينى فى حاجة شخصية؟ دا إيه حرقة الدم دى بس؟!"

= "هو أنتوا الاتنين طلعلكو صوت من امتى، إيه حكايتكو مش فاهمة!"

- "رنيم هو أنت ضميرك مش بيوجعك زينا مثلاً، مش بتزعلى من نفسك

خالص؟!«

= «لا أنا مشاعرى كلها دفنتها وعزوني فيها من زمان قوى، حتى الضمير كمان».

- «هما مين دول!«

= «كل شخص أذانى فى حياقى، كل حد كان سبب فى أى حاجة وحشة أنا فيها».

- «ماينفesch تواجهى المصايب بمصيبة زيها، احنا لو كنا سمعنا كلامك زمان عشان خاطر نشفى غليلك، أو عشان خاطر الفلوس، فاحنا فوقنا دلوقتى ومابقناش زى الأول، تقدرى تقولى لى ذنبها إيه البنت الغلبانة الى ساعدتك بس عشان تنتقم لخالتها وكل دا بتحريض منك وكبرى الموضوع فى دماغها طبعًا وفهمتيها إن خالتها ماتت بسبب جوزها مش كدا!«

ثم قالت بانزعاج شديد، وبنبرة صوت عالية:

= «أيوه ماتت بسببه، ليه مش عايزين تصدقونى بس! كان بيدفعنى أنا وماما تمن غلطاته واختياراته، تخيل إنه بيحب ماما وبعدها صدق تخيله واتجوزها، بعدها اكتشف إنه مش بيحبها وبقي يكرهها من ساعة ما اقتنع إنها السبب فى المشاكل الى بينه وبين مراته الأولى من جوازه من ماما، وماكنش عايز يصدق إن كل دا مش بسبب ماما خالص

الى ماعرفتش إنه متجوز واحد تانية غير بعد ما خلفتني أساساً، وبعد ما ماما استحملت كل الى عمله فيها كان عايز كمان يجرمنى أنا وهى من الميراث، أبسط حقوقى بعد ما حرمنى منه هو شخصياً وهو عايش، طول عمره محسنى إنه بيحب كارما أكثر منى، كان بيقتد معاها أكثر ويجيبها كل الى هى عايزاه وأنا ماكنش بيسأل فى غير من أسبوع للتانى، بعد كل دا مش عايزنى أنتقم!!»

- «هو أنت مش واحدة بالك إن دا والدك مثلاً ولا إيه، أنت الى اخترتى تبقى دى زاويتك فى الحياة، اخترت تشوفى الحاجات الوحشة وبس، اخترت إنك تشوفى والدك بالطريقة دى، لو فكرت بالعقل إيه الى يخلى والدك يجرمك من الميراث رغم إنه دفع أضعاف أضعاف نصيبك من الورث فى تعليمك برا مصر وبعد ما مات ماكنش فيه ورقة واحدة بتثبت إن كل أملاكه مكتوبه باسم كارما ومامتها كان مجرد كلام بيقوله وخلاص، هو حس إنه مادالكيش حقت زى أختك التانية بس عوضك فى حاجات تانية، وهو كان بيحبك جداً، دا أنت أول فرحته، ولو ماكنش بيجيلك كتير فعشان المشاكل الى كانت بينه وبين والدتك زمان مش أكثر، وبكدا دا يثبت لك إن عمره ما كان هيحرمك لا أنت ولا والدتك من الورث أصلاً، كان كلام ساعة غضب ووقت المشاكل وراح لحاله ووالدتك ماتت عادى، عمرها انتهى لحد كدا، وفى النهاية هو والدك زى ما هى والدتك، ولو شايقة إن والدك غلطان قيراط فأنت بتصلحى الغلط بغلط زيه».

= «محدث كان قاله يتجوز تانى طالما مش هيعرف يوفق بين البيتتين،

محدث قاله يخبي على مراته ولا على ماما».

- "هو في إيه، هتعلقى له حبل المشنقة يعنى! ما كلنا بنغلط وعادى بنفوق وبنصلح الغلط، بس احنا الى بنحب نعيش دور الضحايا الى الكل بيحى عليهم حتى لو دا ماحصلش، ومش بنحب نطلع نفسنا غلط ونخلى غيرنا هو الشماعة، للمرة المليون أقول لك أنتِ الى بوظتِ حياتك بنفسك وأنتِ الى اخترتِ إنها تنتهى بالشكل دا، افهمى بقى واعمل حاجة صح فى حياتك".

= "خلاص أنا مش عايزة أتكلم فى الموضوع دا، ومش قادرة أكمل فى الحوار دا أكثر من كدا، الكلام خدنا وماقولتش بردو إيه آخر أخبارك أنت وشيرى؟"

- "هو أنا مش لسه قايل لك أنتِ ما لك؟! بتحبى الكلام الكثير ليه؟ اسمعى يا رنيم الى هقوله كويس".

= "لا اسمع أنتِ يا عم روميو وتركز معايا كويس، لو هتعمل جو خايف على مصلحتى والكلام دا كله فانسى، أنا مش بيدخل دماغى الكلام دا، أنت كلامك دا مش جاى تقوله دلوقتى بعد ما أخذت فلوسك، كلنا اشتركنا سوا، وكان فين الضمير دا وأنا بتتفق معاكوا؟ كان فين وأنتوا بتاخدوا الفلوس؟"

- "ماشى يا رنيم، ماتخافيش يا سقى، مش هتتاذى خالص، احنا عارفين إنك مايهمكيش غير نفسك وبس أساسًا، آخر حاجة وصلت لها أنا وهى

إنها اعترفت لى بكل حاجة وقالت الى حصل والى عملتوه، ارتحتِ كدا؟!«

= «إيه؟! شيرى عملت كدا؟! إزاي؟! دي أكيد اتجننت رسمى!»

ثم استطردت فى ذهول:

"يعنى أنا أخليك الجُندى المجهول فى الجريمة دي، وماخليش حتى شيرى تعرف إنك كنت طرف مُشارك معانا، وهى ماكانتش تعرف عنك حاجة غير لما خليتها تسكن قريب منك عشان أسيب لك الفرصة تتعرف عليها، وأقول لك خليك جنبها وفهمها إنك بتحبها عشان تبعدها شوية عن فكرة إنها تسلم نفسها وتشدنا كلنا وراها، كنت عايزاك تخليها تعيش حياة طبيعية زى الأول وماتفكرش إنها تضر نفسها ولا تضرنا معاها، وبكل بساطة تقول لك على الى الحصل وهى فاكدة إنك ماكانتش تعرف حاجة! وممكن كمان تكون قالت لغيرك، ولا ممكن تكون قالت لكارما نفسها، قالت لك إيه بالظبط يا طارق؟"

- "طب ما أنا كمان استغربت لما كتبت كدا ليا، بس هى ماقلتش لحد غيرى، من الآخر الموضوع مش خارج ما بيننا احنا الثلاثة، وماتقلقيش محدش هيعرف أصلاً".

= "طب قالت إيه تانى!"

- "بصراحة هى عايزة تسلم نفسها وتخلي كارما تسامحها، بس أنا مش

هخليها تعمل كدا».

اتسعت مُقلتاها قليلاً من شدة خوفها، كانت تضغط بيديها على المنديل الذى كانت تحمله؛ لتُفرغ الطاقة بداخلها بعد أن تملك الحنق والخوف منها وتبعته قائلة:

«طارق، أنت ماينفعش تعمل غير كدا، لازم توقفها عن اللى هى عايزة تعمله لمصلحتنا كلنا، وبعدين هتشوفها امتى تانى؟»

- «المفروض إنى هقابلها بُكره، وبعدين كنت هعمل كدا من غير ما تقولى، بس مش عشان مصلحتنا يا رنيم، أنا مابقاش يفرق معايا حاجة غيرها، حتى لو هتسجن مش هيفرق معايا، المهم إنها تسأحنى وبس، أنا هعمل كدا عشان هى ماتتأذيش، واوعى تفكرى تأذيها عشان ساعتها أنا مش هرحمك».

ثم نظرت إليه باشمزاز وقالت:

«ماتحافش يا حنين مش هعملها حاجة، بس الموضوع دا يخلص فى أقرب وقت، مفهوم؟»

- «مفهوم، هو اللعبة اللى لا تُطاق دى هتخلص امتى معلش؟ أنا زهقت من كل الحوارات دى».

= «الحوارات هتخلص لما تعقلوا، اللى حصل حصل وكلنا فى مركب واحدة ومفيش أى مجال إن حد يهرب عشان ساعتها المركب هتغرق بينا كلنا».

لم يُكمل الحديث معها ونهض مُهرولاً، وقال بابتسامة صفراء تنم على كراهية الحديث معها، وحنقه من هذه المحادثة بأكملها:

«أنا همشى ومش عايز أسمع حاجة عن الموضوع دا».

وقبل أن يترجل من المقهى، أوقفته رنيم قائلة بعد أن نادته باسمه، رجع بعض الخطوات للوراء؛ ليستمع لما ستقوله:

«أنت حبتها مجد يا طارق؟ مش كُنا متفقين كدا وكدا!»

لم يجبها على سؤالها بإجابة قاطعة واقترب منها قليلاً، وقال:

«هو اشمعنا أنا؟ اشمعنا خلّيتنى أعمل المسرحية دى عليها؟»

= «عشان ببساطة أنت الوحيد اللى كنت هتوافق لأسباب كثيرة منها إن ماينفعش السر دا يخرج ما بينا احنا الثلاثة وبس، أومال تفتكر ليه خلّيتك بعيد عن أنظارها وماعرفتش إنك شريكنا، ما هو عشان الأمور تمشى طبيعى زى ما خططت وتظهر فى الوقت المناسب ليها، والموضوع بدأ لما خلّيتها تسكن فى العمارة الى جنب عمارتك بالضبط، عشان تصدق هى كل الى هتعمله وتطمئن لك فهمت، وبعدين لو أقنعتها ماتسلمش نفسها، هيبقى ليك مكافأة كبيرة».

- «لا ريحى دماغك مش عايز مكافأة ولا الكلام دا كله، أنا عندى طلب غيره».

قالت باستهزاء وعدم رضا:

= "انجز طيب".

- "عايزك تسيبيننا خالص وتنسى إنك عرفتينا أساسًا، ومالكيش دعوة خالص بالي هنعمله في حياتنا، وكفاية قوى اللى حصل لنا بسببك".

لم يُفسح لها مجالاً للرد وترجل سريعاً من المقهى، وقالت لنفسها وهي تضغط على أسنانها من شدة البركان الذى أوشك على الفوران بداخلها:

"أنا إيه اللى خلانى أعتمد على اتنين زيكوا مش فايقة للكلام دا، مش هسيبكوا في حالكوا عشان أنا حفظاكوا كويس وماقدرش أثق فيكم إنكم ماتقولوش لحد، هتشوفوا اللى هعمله!"

- "شريف، أنا خلصت شغلى وهروح لكارما".

= "استنى طيب عشر دقائق أكون خلصت شغلى وأوصلك معايا بالعربية".

- "لا، لا، ملوش لزوم خلص شغلك براحتك وابقى حصلنى".

= "خلاص يا رنيم بقى قلت هوصلك معايا".

بعد مرور عشر دقائق أنهى شريف عمله، وذهبا سوياً لسيارته، دلفا السيارة وشرع فى التحرك، كان من حين لآخر يجتلس منها بعض النظرات وقلبه ينتفض من مكانه كلما يراها، يحاول أن يخلق حديث معها ولكن يتملكه الارتباك والتوتر قليلاً، فى النهاية سألها:

«كان نفسى تنورينا فى الفرح».

= «معلش ماحصلش نصيب وزى ما أنت شايف الفترة الى فاتت قبل ما اشتغل عندكم بسافر وبرجع وهكذا».

- «كارما فرحانة قوى إنها هتشوفك النهارده».

ردت عليه فى شرود وبرودة:

«آه فعلاً فرحانة».

- «أنتِ كويسة؟!»

أردفت فى ابتسامة لديها القدرة أن تجذبه، وتجعله ينسى كل ما حوله:

«أنا تمام ماتشغلش بالك، ينفع أسألك سؤال؟»

- «طبعاً».

= «بتحبها؟»

أردف وهو يضحك:

«بتسألى ليه طيب؟!»

= «عادى أختى وبطنن عليها».

حاول التهرب من السؤال فاستغل وصولهما للمنزل. استقبلتها كارما

بترحاب كبير وضممتها إليها في محبة، لكن رنيم همست في أذنها: «أنا مستغرباك قوى يا كارما».

تعجبت كارما من قول أختها غير المتوقع وبادرت لتسألها عن السبب، فأجابتها: «يعنى كنت فاكرة إنك هتبقى مش طايقة تشوفينى وعمرى ما هتحبينى وكمان مش هتدخلينى بيتك أصلاً!»

- «إيه! إيه كل دا بس، أنا مجاش فى بالى كل الكلام دا، أنا ماينفعش أخذك بذنب بابا، أنا ماشوفتش منك حاجة وحشة يعنى، وبعدين أنا من زمان كان نفسى يبقى ليا أخت ونبقى صحاب وكل حاجة».

جلست شيرى وبدأت تُدون ما تشعر به كعاداتها وهى غارقة فى أفكارها.

«كالعادة بحس بكذا حاجة ومش بقول لحد، ومش بلاقى غير الورقة والقلم إنهم صحابى ورفقاء دروبى ورحلتى كلها، أنا بقى رحلتى للأسف اخترتها غلط، وكنت بختار الفرص اللى تبعدن عن طريقى الى بجد، ضيعت حياتى بنفسى ومش هلوم حد، أنا مابقتش فاهمة نفسى أساساً، مش عارفة أنا الى مرتاحة لما انتقمت لخالتي، ولا أنا الى زعلانة عشان عالجت الغلط بغلط أكبر، أنسى الى حصل وأعيش حياتى عادى طالما مفيش دليل ورانا، ولا أسلم نفسى وارتاح من تأنيب الضمير دا، الى عملته دا صح ولا غلط، أزعل على الراجل الى خلى خالتي تربيني فى بيته، ولا أزعل على نفسى أنا، أنا اقسرعت يوم ما طاوعت رنيم الى شيطانها صور لها كل الحاجات الوحشة دى فى والدها، سلمت نفسها لشوية أفكار

غلط وعملت زبيها، بس لما فوقت عرفت قد إيه إننا كنا غلط، واللى زاد بقى لما هى كانت عايزانى أشتغل جاسوسة لحسابها وأصاحب كارما عشان أعرف كل أخبارها وأروح أقول لها، خصوصًا إننا كنا فى نفس الكلية، ودا كان نفس السبب اللى خلانى أضطر أبعد عنها رغم إني حبيتها بجد وحسيت إنها ماتستاهلش اللى عملته فيها، لكن اضطريت أبعد عشان ماعرفش حاجة عنها ومالاقيش حاجة أقولها لرنيم عشان خوفت تضرها.

أنا مين فى كل دول؟ عايزة أفصل عن كل حاجة، وكأني بقول (بس) بصوت على اللى بتتقال فى الأفلام والمسلسلات وبعدها بيبقى فيه سكون تام وهدوء، بيتهيللى إن دماغى محتاجة كدا".

وفى صباح اليوم التالى، توجه شريف إلى عمله، صفَّ سيارته أمام الشركة، وحينما وصل رأى رنيم وهى تتحدث مع أحد المهندسين والابتسامة لا تُفارق وجهها، تسمر بمكانه للحظات، يراها وهو واقف بجانب سيارته بعد أن ترجل منها، وبعد ربع ساعة تحديداً، وجدها أمامه وهى تقول:

"صباح الخير، وانا شغل كتير ومتأخر كمان، لا كدا كتير".

ثم قال بنبرة بها مغزى:

"رنيم، هو أنت تعرفى المهندس اللى كنت واقفة معاه دا كويس؟"

= "لا عادى مش قوى يعنى، زميل فى الشغل زيه زى أى حد، بتسأل
ليه؟"

- "عادى بحكم يعنى إننا صحاب وكدا، سؤال عابر يعنى أصل شوفتك
مبتسمة قوى وشكلك مبسوفة وأنت بتتكلمى معاه".

وأومات له برأسها تعنى الإيجاب، ونظرت له بطرف عينها كأنها تفهم
مغزى كلامه، وأردفت:

"طب ودى تفرق معاك إيه؟ ما أضحك وأتكلم براحتى فيها إيه؟"

- "أيوه صح معاك حق، معلش بس هستأذنك أروح أشرب نيسكافيه
عشان أركز فى الشغل وأبقى فايق".

= "أوك براحتك".

وبمجرد أنهما أدارا وجهيهما عن بعضهما البعض بدت ملامحهما وتعبيرات
وجهيهما التى كانت مخفية وقت الحديث، وتعمدا عدم إظهارها.

كان يبدو على وجهه ملامح الضيق، وكأن شيئاً ما يُحدثه بداخله: "لا،
لا، الموضوع هيكبر منك ومش هتعرف تلمه كدا، براحة، ماوصلتش
كمان إنك تغير عليها، ومن هنا ورايح ماتتدخلش فى أى حاجة تخصها".

وعلى النظير الآخر، كانت تشعر بشيء أشبه بنشوة النصر، فهى أدركت ما
تنم عنه طريقة حديثه وما كان يدور بداخله.

سمع شريف صوت طرق باب مكتبه، وسمح لمن يطرق بالدخول، ها هي رنيم تتجه نحو أحد المقعدين أمام مكتبه بابتسامتها الساحرة التي تجعل قلبه سجينها وقالت له:

"أنا آسفة ماكانش قصدى، ماكنتش أعرف إنك هتضايق قوى كدا".

ثم بدأت تتحسس بأناملها يده، ولم يتفوه بشيء وقد انتابته قشعريرة سرت بجسده فور أن لمست يده التي يضعها على المكتب، ثم أمسك يدها برفق وما زالت القشعريرة سارية بجسده، ودوت دقات قلبه المكتب بأكمله ونطق بعدها:

"رنيم، أنا عايز أقول لك حاجة من ساعة ما بدأنا نقرب أكثر من بعض... رنيم أنا...أنا...أنا ب..."

ثم نظرت له وكأنها كالطفل الصغير الذى يشعر بسعادة فائقة وقتما يجد لعبته المفضلة التى كان يبحث عنها بشغف رهيب، وما تزال الابتسامة مُلصقة بوجهها.

كانا يشعران حالة من التغييب عن العالم حولهما، حالة من الخيال الذى يجمعهما فقط، كأنهما أوقفا الزمن عند تلك اللحظة وتوقف كل شيء حولهما.

كانت يد شريف تحتضن يدها، وهى تنظر لكفها بفرحة غامرة وجهها،

ثم أَلَقَتْ بنظرها نحو عينيهِ وكأن عينيهِما تسمرا أمام بعضهما البعض،
تَحَجَّرَت الكلمات بداخلهما، وحينما بدا على فم شريف أنه سيتفوه بشيء
ما، سمع صوت طرق الباب عليهما، هذا الصوت الذى كان الحد الفاصل
بين خيالهما والواقع، نقلهما من حالة التغيب إلى حالة من الوعى، وفى
هذه اللحظة ارتعدت فرائصهما وأفلتا أيديهما من بعضهما فى سرعة
بالغة، كأنهما كانا مسحورين، وقد خرجا من أثر هذا السحر فور
سماعهما صوت الطرق.

أسرع شريف قائلاً:

"ادخل".

ودخل صديقه باسم، وقال بكل عفوية والابتسامة على وجهه وهو يفتح
الباب قبل أن يرى رنيم بالداخل أيضاً:

"أهلاً بالى بيجى متأخ...".

توقف عن الكلام حتى أنه لم يُكْمَل جُمْلَتُهُ منذ أن رأى رنيم، ونهضت
مُسْرَعَةً بعد أن أَلَقَتْ السلام على باسم، ترجلت من العُرفة التى بها مكتب
شريف ووجهها مُفْعَم بالارتباك، ولكن قبل أن تترجل منها قال شريف:

"طيب يا رنيم ماتنسيش الحاجات اللى طلبتها منك".

أجابته بنفس النمط بعد أن فهمت سبب قوله لهذه الجُمْلَة:

"حاضر، عن إذنكوا".

لم ينظر باسم لها وهي تخرج بل كان ينظر لصديقه بإطالة والعديد من التساؤلات تجوب رأسه وتنهل عليه تباعًا وبدأت ابتسامته تتلاشى رويدًا.

بعد أن خرجت، توجه لأحد المقاعد الموجودة أمام المكتب، وشرع في التحدث مع صديقه بنبرة بسيطة من العتاب:

"أزيك؟ عامل إيه؟"

- "تمام".

= "عامل إيه في حياتك؟"

- "كله تمام وماشى كويس".

= "مُتأكد إن كله ماشى كويس!، وكانت جُمْلته تحمل شيئًا من المغزى وهو يستفهم منه.

فأجابه بتحشرح وارتابك:

"آه يا عم، فى إيه، كله كويس"، ثم نظر ليدته التى كانت تُلامس يدها وما زالت القشعريرة بداخله وما زالت أيضًا تعلو دقات قلبه، وهو ينظر بوجه يشع منه بريق السعادة، كل هذا كان يشعر به فقط حينما يرى يده، لكن حينما ينظر لصديقه تتحول تعبيرات وجهه لشيء من الارتباك.

= «ما لك؟!»

- «إيه ما لي! مفيش حاجة عادى».

= «فعلاً؟! شريف، هى كانت بتعمل إيه هنا؟ مش المفروض إن وراها شغل كتير زيك وتبقى بتخلصه؟»

- «أديك قولت بنفسك أهو، إننا ورانا شغل كتير وكنا بنساعد بعض مش أكثر».

= «مش مرتاح لك على فكرة، ومش مرتاح لها أكثر».

- «مش عشان الكلام اللى قولتهولك قبل كدا يكون دا سبب يخليك تشك مجرّد ما اتكلم معاها، احنا فى شغل واحد وبنساعد بعض وعادى إننا نتكلم زى أى اتنين زمايل، أنا خلاص شيلت الموضوع من دماغى زى ما قلت لك».

وبعدها بدأت أنا مل باسم تُلاعب لحيته برفق، مع القليل بنظرات الشك؛ لأنه يفهم صديقه عن ظهر قلب وبكل ذرة داخل رأسه، مهما أخفى مشاعره عن الناس جميعاً لا يستطيع أن يُخفيها عن باسم وإن جاهد نفسه على ذلك، فلا مفر!

وتبعه قائلاً:

«مش يا معلم لو كنتوا زمايل بجد، باين قوى فى عينيك ومن غير ما تتكلم

أنا حافظك».

وقال في حق:

- «وأنا هخاف منك يعني! أنا فعلاً نسيت الموضوع وهى مش فى دماغى».

ثم نهض شريف من على مقعده مُسرّعاً وهو فى حالة من الذعر، ولكن فى الحقيقة قد نهض حتى يتهرب من تلميحات صديقه، من نظرتة له، من استدراجه له بالكلام، من رغبته فى عدم الإفصاح بغلطة، من رغبته فى عدم البوح بما يُبطنه، ولكن عين المُحب تُفصح عن كل شىء..

تبعه باسم ونهض هو الآخر حتى يقف أمام صديقه وهو يقول له بنبرة مليئة بالحنق:

"يا بنى فوق من اللى أنت فيه!! هى هتضيعك وتدمر حياتك اللى غيرك بيحلم بربعها، حافظ على حياتك وخد بالك من مراتك اللى بتحبك بجد ومستعدة تسبب كل حاجة عشانك، وفى الآخر تخلى دا جزاءها؟! اللى أنت فيه دا مش حب! عارف إن كلامى هيوجعك بس أنا اتكلمت معاك بالعقل قبل كدا ومفيش فايذة بردو، مش هسمح لك تدمر حياتك بنفسك، ما تفهم بقى، أنت أخويا وخايف عليك».

- «بقول لك إيه، شوف حد غيرى تعمل عليه الدور دا، أنت مش هتقول لى أعمل إيه وماعملش إيه، دى حياى أنا وأنا اللى اختار وبس، وكلامك غلط بقى أنا مجب رنيم جداً حتى يمكن أكثر من مراقى، وحسيت معاها

إحساس مُختلف ما حستوش قبل كدا، هى فهمت دماغى كويس وارتحت معاها جدًا، بتحس بيا على طول وبنرتاح لبعض، كل دا وتقول لى مش حب! أنا هكمل حياتى معاها هى وبس، ومش محتاج لنصايحك تانى، شكرًا قوى يا سيدى على نصايحك الغالية دى، ولحد هنا وكفاية قوى".

وتحدث باسم بنبرة هادئة بعد أن استنفذ طاقته فى حديثه مع صديقه، وفى صدمته مما قاله شريف للتو، وقع عليه الكلام وقع الصاعقة، ولكنه تنهد رويدًا وقال:

"بقى كدا يا صاحبى؟ هيجى اليوم الى واحدة تخسرنا فيه بعض، عامَّةً براحتك أنت الى اخترتها واتحمل نتيجة اختيارك، أنا عملت الى عليا معاك، بس خد بالك أنت كدا بتظلم مراتك الى مالهاش ذنب فى حاجة غير إنها حبتك".

أدار وجهه ناحية الباب وقبل أن يخرج من الغرفة ذكر بعض الكلمات وهو لا ينظر له:

"حافظ على بيتك عشان لو اتهد أنت أول واحد هتندم، أنت صعبان عليا".

بعد أن أخرج شريف كل ما بداخله لصديقه فى عصبية مُفرطة، شعر بشلالات الندم وهى تنهمر عليه فى غزارة ويود أن يعتذر لصديقه ولكنه لم يفعل هذا، واكتفى بأن يقول له:

"باسم، أنت رايع فين طيب؟"

توقف باسم في مكانه وما زال وجهه يتوجه ناحية الباب، ثم أجابه في نبرة ممزوجة بالحزن والضييق واللوم:

"هرجع المكتب بتاعى، عايز حاجة؟"

ولكن لم يجد شريف شيئًا ليقوله بعد أن فعل هذا بصديقه، وكان سؤاله السابق ما هو إلا رغبة مكنونة في الاعتذار، لكنه يعتقد أنه فعل ما يكفى ولا حيز للاعتذار في مثل هذا الموقف، ثم قال:

"لا مش عايز حاجة، شكرًا".

توجه باسم لمقبض الباب وهو يمسكه بعنف؛ ليُخرج الشحنة الكامنة بداخله من حُزن وصدمة.

وقبل أن يخرج باسم من الغرفة بلحظات، كانت رنيم تقف أمام الباب مباشرة، وتستمتع لكل ما يُقال، كانت تزداد ذشوة وفرحة كلما علمت كم يُحبها شريف وكانت الفرحة لا تُفارق وجهها وهى خارج الباب كأن المكان لا يتسع لسعادتها، ولكنها قد غادرت مُسرعة قبل أن يخرج باسم وهو لم يكتشف ذلك الأمر.

بعد أن غادر باسم الغرفة، جعل شريف رجله ترتطم بالمقعد عن عمد؛ ليُفرغ هو الآخر ما يشعر به وما تسبب فيه لصديقه، أغلق عينيه للحظات بعد أن جلس على مقعده ثانية ووضع كفه على رأسه وهو يقول لنفسه:

«إيه اللي أنا عملته دا بس!»

وفي هذه المرة قد صمت، لكن كان ثمة شيء ما بداخل رأسه يُحدثه، ذلك الهاجس الذي يعيش بداخل رؤوسنا في بعض الأحيان، ويقول له:

«باسم معاه حق في كل كلمة قالها، مش تبقى غلطان وبتكابر كمان، أنا زعلته جامد وهو فعلاً خايف عليا وأنا عاملته وحش وأسلوبي كان مش لطيف معاه، لا، لا، معاه حق إيه بس! هو مش حاسس باللي أنا فيه، مش حاسس يعني إيه أكون لقيت الحب اللي بدور عليه، الحاجة اللي عرفتنى معنى الحياة اللي مجد، لا، لا، إيه اللي بقوله دا، طب وكارما معقول نسيتها؟ دى حب حياتك كله، مانساش إنها ضحت بحلم حياتها عشاني، مارضيتش تعمل ماجستير ودكتوراة عشان نتجوز، وافقت إنها ماتشتغلش عشان ماتزعلنيش، من ساعة ما عرفتھا وهى بتضحى عشاني ومستعدة تعمل أى حاجة عشان علاقتنا تستمر، ماقدرش أنسى اليوم اللي كانت بتقول فيه إنها خايفة على علاقتنا، خايفة أبطل أحبھا وعياطھا كان أكبر دليل على تمسكھا بيا، إزاي بعد كل دا أسيبھا إزاي؟! طول عمرھا وهى اللي كانت بتخاف على علاقتنا أكثر منى وبتحاول تحافظ عليها، وليه أجي دلوقتي وأهد كل دا؟! أنا إزاي أناني كدا؟ بس لا، أنا مش ذنبي إن كل دا يحصل، يمكن كنت بحب كارما زمان، بس دلوقتي مش عارف أحس بسعادة وراحة زى زمان، حاسس إن فيه حاجة نقصاني، وجت رنيم في حياتي وعوضتني عن الشعور اللي كان نفسي أحس به مجد، ومش عايز الشعور دا يضيع مني، يمكن اللي بيني وبين كارما دا تعود، اتعودت

على وجودها في حياتي، لكن مش حاسس بحب بيننا زى اللى بحسه مع رنيم، أو عشان م ابقاش كداب كنت بحس بده مع كارما زمان، لكن دلوقتى لأ، أنا لاقيت حبي اللى عايزه، آه جه متأخر للأسف بس لاقيته واستحالة أضيعه من إيدي، طب مش يمكن فعلاً يكون زى ما باسم بيقول، إن دا مش حب بس تفريغ مشاعر لشخص غلط، كإن الكلام اللى بقوله لرنيم هو اللى قلبى عايز يقوله لكارما بس أنا اللى اختارت رنيم اللى تسمع كدا عشان مجرد شعور بداية كاذب مالوش أى وجود غير فى خيالى، لما علاقتى بكارما مابقتش زى زمان دورت على حد أقول له الكلام اللى جوايا، بس مافكرتش أصلح علاقتى بيها،

هو أنا فعلاً بحب مين؟! أنا مين فى كل دول؟ خلاص تعبت من التفكير ومش قادر أستحمل حاجة تشغل تفكيرى تانى!

وضع رأسه على يده فوق المكتب ليُريح نفسه من العاصفة التى هبت بداخله ولا يستطيع منها الفرار، يود أن يخمّد نار التفكير بداخل رأسه ولكنه عاجز!

نبحث... نبحث... نبحث!! عادة ما نجعلها مُصاحبة لـ"عن الحب"، نظل طيلة حياتنا نبحث عن قصة حُب مُشابهة لما نراه بالتلفاز، وهذا يجعلنا نغفل معناه الحقيقى؛ لأننا سنظل نشعر أن ثمة شىء ما ينقصنا ويجعلنا نتشبث بأى شخص مُعتقدين أنه الحب الحقيقى حتى وإن لم يكن!

الحُب هو مثل النظر للقمر؛ نعلم أن عليه العديد من الصخور ومظهره

عن كذب ليس بهذا الجمال، ولكننا نُحبه بشدة وما زلنا نراه إيه من الجمال، بل أيضًا نشبه كل ما هو جميل به!

دخل باسم غرفة مكتبه وبركان بداخله أوشك على الفوران، على الرغم مما حدث إلا أنه ما زال يهتم بشأن صاحبه، ولم يعبأ بما قاله له ولم يترك بابًا للحزن أن يفتح بسبب ما قيل له، بل كان حُزنه مركّزًا على صديقه وكيف يُنقذه من المأزق هذا، كان كل تفكيره كيف ستُحل هذه العقدة.

فما أروع الصداقة التي تجعل الصديق يظل يهتم بصديقه حتى وإن دهمه بالكلام! والجميل أيضًا أن يظل حزينًا عليه لا منه، فما أنقذ هذه الصداقة!

بعد أن استغرق وقتًا في التفكير بشأن أمر صديقه، قرر في النهاية أن يذهب لرним، فهو كان يأمل أن تكون جزءًا من الحل، تردد كثيرًا قبل أن يذهب لها ولكنه يرى الأمور تزداد سوءًا وإن حاولا الإخفاء قدر الإمكان، لم يملك خيارًا آخر سوى أن يذهب لغرفة مكتبها في النهاية.

طرق الباب للحظات وانتظر إلى أن تأذن له بالدخول، وحينما أذنت دخل وجلس سريعًا على أحد المقاعد، صمت في بادئ الأمر، مُنذ أن دخل وهو لا يعلم ماذا سيقول في مثل هذا الموقف، خاصة أن تعامله معها محدود وقليل، وبعدها بادر بالحديث:

- «ازيك يا رним؟ أخبارك إيه؟»

= «تمام، أنت عامل إيه؟»

- «كويس».

ساد الصمت بينهما ثانية لكنها طالت عن المرة الأولى، وفي هذه المرة كسرت حاجز الصمت وبدأت هي:

= «محتاج حاجة؟»

- «لا، لا، شكراً، رنيم، أنا بصراحة عايز أتكلم معاك في موضوع بس لو سمحتي ماتضايقيش مني ولا تفهميني غلط».

= «أكيد طبعاً، اتفضل».

- «هو إيه الحكاية بالظبط؟»

= «حكاية! حكاية إيه مش فاهمة حاجة».

صمت لبرهة بعد أن ألقى نظرة سريعة على المكان حوله وقال:

«طيب، أنا بتكلم على حكايتك أنتِ وشريف».

ونظرت له في ثبات تام، ولكن في الحقيقة كان هذا مجرد ثبات مُصطنع لإخفاء كل شيء أمامه، وأسرعت قائلة:

= «احنا زمايل في الشغل، حكاية إيه؟!»

ونظر لها باستنكار ورفع أحد حاجبيه كدليل على أنه يفهم كل شيء وأنه لم يُصدق ثباتها المُصطنع، وأردف:

"رنيـم، أنا عارف كل حاجة، لما دخلت عليكوا شوفت وشكوا قلب ألوان من كتر الخضة ولا كأنكوا شوفتوا عفريت، وهو ماكنش على بعضه وأنا بتكلم معاه".

بدأت نبرة صوتها تعلو:

= "حاجة تخصك أنت وصاحبك، ماتخصنيش أنا، وبعدين بطل تخيلات عشان أنت بس اللي شوفت كدا، لكن احنا من جوانا ولا متوترين ولا خايفين ولا بنعمل حاجة خايفين منها".

وهو ظل على نفس تعبيرات وجهه وهو يسمعها:

"طب اهدى شوية! أنا مش جاى أعلق لك حبل المشنقة ولا أى حاجة، أنا جاى أتفاهم معاك بالراحة ونحل الموضوع".

ولكنها ظلت على إنكارها وإخفاء ما بداخلها:

"يا باسم، مفيش موضوع من أصله، وكلمة كمان أنا مش هسمح لك، وأظن كفاية لحد كدا كلام، خلاصة الموضوع مفيش بيني وبينه أى حاجة، واحد معايا في الشغل زيه زى أى حد، تمام؟"

زاد على تعبيرات وجهه ابتسامة بسيطة تؤكد عدم تصديقه لما قالت للتو،

وقال بكل هدوء وثبات:

"هو أنا أكره يعني إنكوا زمايل؟ دا أنا أتمنى".

قاطعته مُسرعة بنفس نبرة الصوت المرتفعة بعد أن نهضت من شدة غضبها فجأة:

"لا كدا أنت زودتها، اسمع يا باسم..."

لم يفسح لها المجال للحديث وقاطعها هو الآخر بعد أن تبدلت تعبيرات وجهه بملامح الجدية والحزم يشير إليها أن تصمت:

"لا اسمعى أنتِ بقى وركزى كويس، الشوية الى بتعمليلهم دول بياكدوا الى الى فى دماغى، ولا فكرانى نايم على ودانى ومش عارف الى بيحصل! أنتِ قدامك حل من الاتنين: يا تبعدى عنه خالص وعلاقتك به ماتتعداش الزمالة وبس، ولو هو حاول يقرب منك تصديه وتعقليله، ياما تخليك زى ما أنتِ كدا وساعتها أنا مش هرحمك، ومش هسمح لك تضيعى من إيده مراته، هو بيحب مراته وبس، وأنا فى الأول جيت واتعاملت بالذوق، وكنت هحترمك لو كنتِ حليتِ الموضوع، عشان أنتِ عارفة إنك لو عايزة توقفيه هيقف، وكنت هنسى الى حصل وهتكبرى فى نظرى كمان، بس أنتِ الى اخترتِ، شريف متجوز، فاهمة؟ أنا قلت ألحقكوا عشان أنتوا أول اتنين هتخسروا، وماتنسيش "كما تُدين تُدان"، أنا ماشى وعملت الى عليا".

نهض مُسرَّعًا من شدة الحنق وما إن وصل لمقبض الباب إلا أن أوقفته قائلة بنظرة كلها ثقة بعد أن تأكدت أنه يعرف كل شيء ولا مفر في تغيير ما بداخل رأسه:

"الشاطر اللى يضحك فى الآخر، ومن رأي خليك بعيد عن الموضوع عشان ماتخسرش أنت شريف، وأه صحيح نسيت أقول لك، شريف بيحبني أنا وهو اللى قال بنفسه من شوية".

توجه ناحيتها فى غضب شديد وعقد حاجبيه وهو يقول:

"أنتِ وصلت بيك إنك تتصنعي كمان!! وتقضى على حياته وأنتِ فرحانة!!"
ثم نظر لها باحتقار:

"حقيقى أنا ماشوفتش كدا فى حياتى!!"

ورحل مُسرَّعًا من الغرفة، وفى هذه اللحظة قد فار البركان لكنه كتمه بداخله ولم يخرج، وما أصعب هذا الشعور! بينما هى قد تحول كل ارتباكها لسعادة وكأنها انتصرت بحرب أو حققت مُرادها، ولم تكثرث بقوله على الإطلاق.

قررت كارما أن تُقابل صديقتها وعد بعد كل هذه المُدة، وأعدت كل شيء لهذه المُقابلة، فمهما تعددت الأشخاص بحياة كارما تظل صديقتها وعد

هى المأمن والمنزل والسكينة والراحة والحبور، وأشياء كثيرة من الصعب أن تستطيع الكتب حصرها أو التعبير عنها بتوضيح ودقة! وخاصة أنها قد اشتاقت إليها كثيراً، وأنها لم ترها منذ فترة طويلة، حملت هاتفها وبحثت بين الأسماء عن صديقتها واتصلت بها:

"حبيبتي، أنا خلاص جاهزة ونازلة على طول أهو".

= "طيب يا كارما، أنا وصلت خلاص".

- "تمام ماشى، مع السلامة".

= "سلام حبيبتي".

وبعد نصف ساعة، التقت كارما بصديقتها المُقربة وعانقا بعضهما فى حرارة كأنهما أفرغا طاقة كبيرة من السعادة الفاتقة بعد لُقياهما منذ فترة طويلة.

- "حبيبتي كُنتِ وحشاني جداً بمجد".

= "وَأنتِ كمان يا دودو، كُنتِ مُفتقدة وجودك قوى، تعالى يلا نقعد".

انتهى العناق، وجلستا على المقاعد وكانت البهجة لا تُفارق وجهيهما.

- "أخبارك إيه؟ عاملة إيه فى حياتك؟"

أجابت والبهجة على وجهها بدأت فى الخفوت:

= "تمام يا حبيبتي، كله بخير، طمنيني عليكِ أنتِ".

- "زى الفل والدنيا ماشية تمام".

وفي هذه المرة أعادت كارما بهجتها وابتسامتها البراقة، وقالت:

= "أخبار الماجستير إيه؟"

- "شغالة عليه أهو، ادعى لى".

= "بدعى لك على طول يا حبيبتي، واثقة إن الرسالة بتاعتك هتبقى تُحفة حقيقي".

- "حبيبتي تسلمى يا قمر".

وتوقفت وعد عن الحديث قليلاً ثم أردفت لتُكمل حديثها:

"المطعم دا أنا محبه قوى، بيفكرنى بأيام الكلية لما أنا وأنتِ كُنا نروح نقعد فيه كتير ونضحك ونهزر ونرغى فى كذا موضوع فى نفس الثانية، وحشتنى الأيام دى قوى".

= "فعلاً الأيام دى وحشتنى، على الأقل كُنا بنضحك من قلبنا كتير قوى".

- "ما لك يا كارما؟ شكلك زعلانة من حاجة".

ابتسمت كارما وقالت:

"عمرِكَ ما فشلتِ إنكِ تفهمينى من غير ما أتكلم، عامَّةً ما تشغليش بالك حاجات بسيطة مش مهمة".

- "لأ يا كارما، ما لك بجد؟ شاكلك متضايقه قوى!"

= "لأ أنا النهارده جاية أخرج وأغير جو ومش عايزة أتكلم فى أى حاجة معلش، عايزين ننسب وبس".

- "طيب يا حبيبتي زى ما تحبى، أهم حاجة تكونى مرتاحة، بس وقت ما تحتاجى تتكلمى تعالى على طول".

= "أكيد طبعًا، من غير ما تقولى وبعدين بقول لك إيه مش هناكل! أنا ناوية نتغدا سوا".

- "أيوة أكيد هنتغدا سوا".

تعمدت كارما أن تنظر إلى القائمة بكل اهتمام؛ حتى لا تترك مجالاً لصديقتها أن تلاحظها وتسألها عن الأشياء التى قد أحكمت غلقها بداخلها قدر المُستطاع وروضتها بحرص، لا تريد أحد أن يفتح لهذا السجين المُفترس بداخلها وينطلق للخارج.

وبعد فترة جاء النادل بالطعام المطلوب، ثم انصرف بعد أن وضعه على الطاولة.

كانتا تأكلان فى صمت يحاوطهما عكس المعتاد، ولكن كارما فى تلك

المرة كانت تأكل ببطء رهيب وهى فى حالة من الشرود العميق، ولكن قد سنحت الفرصة للصمت أن يأخذ قسطًا من الراحة ويحل محله وقت انطلاق السجين المُفترس، أردفت كارما على حين غرة:

"مش هقدر ماقولش!! إحساس صعب مش عارفة أبطل أحس به يا وعد، نفسى أفكار كتيرة تطلع من دماغى بس مش عارفة، يظهر إن فى حاجات بدأت تقع منى وأنا كنت فاكرة إنى محافظة عليها كويس".

- "تقصدى مين بالظبط؟"

= "شريف".

تنهدت بصعوبة، وأكملت:

"مابقتش عارفة أفهم واستوعب أى حاجة، كنت مُتخيلة إن علاقتنا بعد الجواز هتفضل قوية وحبنا يستمر لآخر العمر، بس مش عارفة إيه اللى حصل، حاسة إنى بقيت ملغية تمامًا من حياته، شريف بقى غريب عنى قوى، مش بحس بحبه زى زمان، ولا اهتمام ولا أى حاجة من اللى كنت بحلم بيها أنا وهو من صغرنا، حاسة إن الحب دا مات ومابقاش موجود، مش عارفة أشوفه حبيبي وصاحبى وسندى وكل حاجة زى زمان، إذا كان أنا ببقى خايفة أوقات كتيرة إنه يسببنى فى أى لحظة، بس هو حاليًا بيدبجنى بسكينة تلمة، مابقتش أحس بالأمان، حتى كلامه اللى بيطمنى به مش بحسه حقيقى ومش بيطمنى، كأنه مجبور يقول كذا وخلاص، مشاكلنا بقت كتيرة قوى وعلى حاجات بسيطة كمان، وأغلب يومه بيبقى

برا البيت، أنا مابقتش فاهمة حاجة خالص، ومش عارفة أنا عملت له إيه، مابقتش عارفة إذا كنت لسه بحبه ولا لأ، كنا متسرعين قوى لما أخذنا قرار الجواز، كأنه سحبني من إيدى ويبجرى بيا ومش لاحقة أخذ نفسى وطايرة ومش عارفة أركز شوية، ماكنتش بعمل حاجة فى حياتى غير إنى أسمع كلامه وبس، كان أملى فى الحياة يبقى مبسوط ونفضل نحب بعض مهما يحصل، وبصراحة بردو كان دا أمله، بس حاليًا مابقاش يفرق معانا احنا الاتنين، حاجز اتبنى بينه وبينى وصعب يتهد، أكيد كل دا مش من يوم وليلة، كل دا حصل على فترات وكنت كل مرة بمحاول أكذب نفسى وأقول يمكن شيطان ما بيننا ولا شوية تخيلات، لكن لا، كل مرة بيثبت لى إن كل اللى قولته صح".

ولم تستطع أن تحبس دموعها أكثر من هذا الحد، وأطلقت السهم من القوس لتتساقط الدموع شلالاً على وجنتيها وهى تتنهد بعدم انتظام، وقالت بصوت ممزوج بنبرة البكاء:

"أنا حاسة إن حياتى بتضيع منى وأنا واقفة أتفرج عليها ومش عارفة أتصرف إزاي، تعرفى كمان؟ أوقات كتير مش بحس إن اللى بينا سوا دا حُب حتى من ساعة ما كُنَّا أطفال وبنحب بعض، اكتشفت حاجة مهمة قوى كانت مش واضحة قدامى إن اللى بينا دا مُجرد تعود مش أكثر، اتعودنا على وجود بعض، لقيته موجود فى حياتى زيه زى أى حاجة اتولدت لقيتها، ولما كبرنا شوية كنت عايزة أقنع نفسى بحبنا عشان أفضل مبسوبة وأعيش قصة الحب اللى بتتقال فى الأفلام، أطفال حبو

بعض واستمر حبهم للأبد، وعاشوا في تبات ونبات والناس تسقف، ولما بقى كبرنا شوية كمان وعدينا مرحلة الطفولة اكتشفت إننا بندور على أى حد ونقنع نفسنا به ونقول "أيوه، أيوه، دا حبك الحقيقى، ما تجرب يمكن القصة تكمل"، دا تقريباً الى بيدور فى الدماغ وبيخلينا نتمسك بأى حد حتى لو مش الحب الحقيقى، تقريباً كدا الناس نسيت يعنى إيه حب مجد أساساً، حاسة إنى ما كنتش بحبه قبل كدا أصلاً".

ضحكت كارما بسخرية فى نفس التوقيت الذى كانت تبكى فيه، وأكملت: "لحد ما كبرنا بقى خالص واتجوزنا، اكتشفنا إن احنا بس كنا بنقلد، ومشاعرنا كانت أداة وهمية تزود الفكرة فى دماغنا، اخترته عشان حبيته مجد ولا عشان نكمل القصة الى احنا الاتنين كنا بنحاول نصدقها عشان تستمر".

توقفت كارما عن تناول الطعام، ولم تُكمله، بدأت تهدأ رويداً وقالت بعد أن تنهدت فى انتظام:

"بقول لك إيه، أنا مش عايزة أتكلم فى الموضوع دا، ومش قادرة، أنا بس كنت عايزة أقول الى جوايا، ممكن نبقى نتكلم بعدين عامه فى الموضوع دا، مهما حاولت أخبى عليك مش بعرف خالص ويظهر إنى كنت محتاجة أحكى لك جدًا، تعالى نتكلم فى موضوع تانى أحسن".

ابتسمت وعد ابتسامه هادئة ولكنها كانت ممزوجة بالحزن والجزع لما قالته صديقتها، تشعر وكأن ثمة شىء قد هبط بغتة على قلبها وهى ترى

صديقتها غارقة بين أحزانها، لكنها ربتت على يدها برفق، وقالت لها:

"ماشى يا حبيبتي على راحتك، وقت ما تحبى نتكلم هكون موجودة على طول، وكويس بردو إنك خرجتى كل اللى جواك وكله هيتحل بإذن الله ماتقلقيش، بس ماتضايقيش نفسك عشان خاطرى، أنا حاسة بيك قوى".

بادلته كارما بابتسامة أخرى؛ لتثبت لها أن كل شىء على ما يُرام حتى وإن لم يكن فى الحقيقة، تبعته قائلة وهى تُزيل دموعها:

"تمام، تمام، أنا بخير ماتقلقيش".

غيم الصمت عليهما مُجددًا للحظات، وقالت كارما:

"أقول لك على حاجة وماتستغريش! أنا دلوقتى كان نفسى رنيم تكون موجودة، وجود أخت فى حياتى كان هيفرق جدًا، بس أنا مافكرتش فى حكاية أم تانية والكلام دا، فى النهاية هى أختى ونفسى كانت تبقى فى الأوقات دى جنبى، لو كانت بس ادتنى الفرصة نقرب من بعض!"

"وقد يبلغ أحدهم مبلغًا عظيمًا فى قلبك، حتى إن لم تستطع إسعاده حزنتمعه".

-رضا خليل

- «ألو أيوة يا طارق، أنا خلاص جهزت ونازلة أهو».

= «طيب ماشى، هستناك، معلىش أعذرينى ماعرفتش أعدى عليك، بس أنتِ مارضتيش تقولى لى العنوان».

- «كدا أحسن معلىش صدقنى، وبعدين سلام بقى وماتعطلنيش عشان ماتأخرش».

= «خلاص ماشى».

- «سلام».

بعد أن أغلقت المُكالمة، اتجهت ناحية الباب، وما أن فتحته حتى رأت رنيم واقفة أمامها، عاد شبح الماضى يطاردها ويلحقها مُجدداً، وهذه المرة قد أدركها أكثر من المرات قبلها، ازدردت شيرى ريقها بصعوبة نوعاً ما، وتسمرت عيناها من هول المفاجأة والتى جعلتها تنطق اسمها فى تحشرج:

«رنيم!! أنتِ عرفتِ مكانى إزاي؟»

أبعدت رنيم ابنة خالتها جانباً؛ كي تدخل المنزل على الرغم من أنها لم تأذن لها بالدخول، تسمرت شيرى بجانب الباب وقد انعقد لسانها عن الحديث، بينما سارت رنيم بضعة خطوات، وبعدها توقفت، ثم التفتت إلى شيرى وهى تبتسم ابتسامة صفراء وهى تقول لها:

"مبروك الشقة الجديدة، بقي كدا تنقل من غير ما تقولى لى، أهون عليك
أعرف بالصدفة".

= "انجزى يا رنيم وقولى عرفتِ مكانى إزاي؟"

- "طب اقفلى الباب الأول".

أسرعت شيرى بغلق الباب، وأعادت عليها السؤال السابق مُجددًا:

"قفلت الباب أهو، ممكن بقي تقولى عرفتِ إن أنا ساكنة هنا إزاي يا
رنيم".

- "أنا ليا مصدرى الخاص، وأعرف أوصل لك بطريقتي بسهولة جدًا، أنا
مش جبالك عشان كدا أساسًا".

وقالت مُرتجفة:

"عايزة منى إيه طيب، نفس الموضوع؟"

وضحكت رنيم وقالت:

"ميزتك إنك لَمَاحَة، هو احنا لينا غيره مثلاً؟!"

بس قولى لى بقي إيه الشياكة والجمال دا كله، شكلك كُنْتَ نازلة وهعطلك،
على العموم مش هنطول عن عشر دقائق".

= "ولا عشر ثوانى حتى، اتفضلى برا وما تجيش تانى، أنا خلاص مابقتش

أخاف من ألاعيبك، مش هسمع كلامك تانى، وافقت على اللى عملتيه زمان لكن دلوقتى أنا فوقت، وقلت لك للمرة المليون مش هقول لحد حاجة».

نظرت لها باستنكار، ثم قالت:

"المشهد دا أنا حفظاه كويس، المفروض بقى الجماهير تسقف جامد وتقول "برافو، برافو يا شيرى، دور البطلة لايق عليك"، بس لو جينا فعليًا أنتِ عمرك ما هتكونى البطلة، والمفروض بقى ضميرى يصحى وأعتذر لك عن اللى حصل، لا فوق أنتِ شريكة فى اللى حصل زى زيك بالضبط، وشيلى من دماغك كلام تسلمى نفسك والحاجات دى!"

= "أسلم نفسى!! مين اللى قال الكلام دا أساسًا، وبعدين أنا عارفة إنك بتعملى كل دا لمصلحتك وبس".

- "أه قلتِ إنك عايزة تسلمى نفسك وبرغبتك، وكمان ماوفيتيش بوعدك وروحتي قلتِ لروميو بتاعك".

= "ثانية واحدة أنتِ عرفتِ الحاجات دى كلها منين أصلًا، أه ممكن تكونى بتراقبىنى بس مش للدرجة دى يعنى، وأنتِ تعرفى كمان طارق؟!!"

وتحدثت بنبرة مليئة بالسكون والهدوء المُصطنع:

"بصى أنتِ لازم تفهمى حاجة كويس يا شيرى، قبل ما نعمل اللى احنا عملناه كان لازم يكون فيه حد تالت معانا يساعدنا بطريقة غير مُباشرة

من غير ما حد يعرف، حتى أنتِ نفسك، أنا طول عمرى عارفك كويس وعارفة إنك ممكن تغلطى فى الكلام فى أى وقت عشان ضميرك مش بتعرف تترتاحى منه، ممكن أنتِ كُنتِ أكثر واحدة فينا تعبانة من اللى حصل، وعشان كدا ماكنش ينفع أسيبك حتى بعد ما عملنا اللى عملناه، عارفة إن كلامى هيضايك وهيبقى صعب عليكِ بس لازم تعرفى الحقيقة، مهما يحصل أنتِ بنت خالتي بردو وزى أختى.

أنا خوفت البوليس يعرف أى حاجة عن إن احنا ورا الموضوع دا، وكان لازم أفكر إزاي تحافظى على الكلام اللى قولتيه فى المحضر ومحدش يعرف اللى حصل وإنك ماتفكرش تسلمى نفسك، اضطريت أخلى شخص يمثل إنه بيحبك، وماكنش ينفع حد غريب يتدخل فى حاجة زى كدا، فكان لازم الشخص اللى هختاره يبقى حد مننا وعارف اللى حصل ويكون مشارك معنا فى اللى حصل، عشان مايفكرش يبلغ عنا ولا حد يبقى أحسن من التانى وكل اللى أنتِ عيشتيه دا كان مُجرد تمثيل".

من أثر الدهشة والصدمة، ظلت تعبيرات وجه شيرى كأنها صنم ثابت لا يتزعزع، وبعد فترة وجيزة أصبحت تعبيرات وجهها تنم عن كم الضيق بداخلها وعن أن العاصفة بداخلها قد هبت من جديد، قالت فى ضحكة هستيرية كأنها لم تُصدق شيئاً مما ذكر، وأنها أرادت أن تُقنع نفسها بعدم صحة هذا الكلام:

"بتهزرى صح؟! قولى إنك بتهزرى بقى وبلاش الهزار التقليل دا تانى لو سمحت، أنتِ بتقولى كدا وخلاص، ساكتة ليه ما تقولى أه!! أصل

استحالة كل الى حسيت به يبقى كذب ولا الأيام الى فاتت دى تبقى فيها مشاعر مش صادقة، أكيد لأ، أنا إحساسى بيقول لى لأ، و بعدين هو بيحبني، بيحبني أيوة، وكان عايز يتجوزنى كمان، إزاي كلامك دا صح، أنا مش مصدقك خالص وماتحاوليش تخسرينى كل الى حواليا بما فيهم طارق، عشان دا الشخص الى مش هسمح أبداً إني أخسره مهما يحصل".

- "اهدى يا شيرى! أنا عارفة إن الكلام صعب عليكِ بس ماينفعش أسيبك كدا وأنتِ مخدوعة".

سرعان ما تبدلت هذه الضحكة الهستيرية لحالة من البكاء المرير، وبدأت نبرة صوتها فى الارتفاع بدرجة كبيرة وكأنها أوشكت على الانهيار العصبى من شدة حُزنها وصدمتها.

تنهدت عدة مرات ثم قالت:

"أنتِ إيه!! أنتِ إيه؟ ارحمينى بقى بتعملى فيا كدا ليه؟! كرهت حياتى كلها بسببك، أنت مابتفكريش غير فى نفسك وبس! عشان كدا أنا مش مصدقك، هو عمل لك إيه بالظبط خلاكِ تقلى عليه الترابيزة مرة واحدة لو همشى على كلامك؟"

- "حاسبى على كلامك يا شيرى، أنا غلطانة إنى خايفة عليكِ ومش عايزاكِ تكمل فى الكذب دا كله".

= "فكرانى مصدقة الى قولتيه دا؟ هو أكيد عمل حاجة ضدك عشان كدا

جيت النهارده وقلتِ حقيقته!»

- «ماقتش مرتاحة له يا شيرى، بدأ مايسمعش الكلام وطريقته تتغير ودا مخوفنى منه، ماقتش أصدق إنه مش هيبلى عنا، وقلت لك الكلام دا عشان ما ينفعش تبقى على عماكى كدا ومافكرتش فى كل اللى بتقوله دا غير فيك أنتِ وبس».

= «كفاية بقى، كفاية، دا أنتِ مش بس قتلتى، لا دا أنتِ زعيمة عصابة كمان، أنا ماشوفتش حد بالطريقة دى! كفاية أذى بجد!! عمالة بتأذى فى كل اللى حواليك ومش بتعملى حساب لأى حاجة، مش هالين عليكِ قوى تسيبيني أعيش حياتى مرتاحة شوية من كل اللى حواليا دا.

رنيم لأخر مرة هقولها لك أطلعى برا ومش من الشقة بس، لأ يا ريت من حياتى كلها، أنا مش عايزة أعرفك تانى، بس قبل ما تعملى دا لازم تقولى لى الحقيقة كاملة».

- «عايزة تعرفى إيه بالظبط؟!»

= «هو إيه علاقته باللى حصل؟»

- «هو اللى جاب لنا العربية المسروقة، وكمان اتصرف وجاب لنا الزنبيخ اللى اشتغلنا به».

= «طب وبالنسبة لسكنى القديم اللى كان جنب عمارته؟ دا كان بردو...؟!»

صمتت رنيم ووجهت نظرها للأسفل كدليل على قول "نعم" التي لم تتفوه بها، ولكن عبّرت عنها بطريقتها.

= "وكلامه وحبه ليا ولما كان بيظمني دائماً، طب كان ليه دائماً بيسأل إيه الي مضايقتني وهو عارف أصلاً، ليه حسسني باهتمامه، ليه كان دائماً عايزني أنسى القديم وأبدأ من جديد؟ لا، لا، كل دا ويبقى مش بيحبني؟ طب إزاي بس؟!!"

كانت تقول تلك العبارات وقلبها ينشطر جزعاً مما سمعته، كأن قلبها قد انشق بعنف وبلا رحمة على الإطلاق، كأن الأمواج تتخبط بها ولا تستطيع النجاة من الغرق، كأن ثمة شيء يجعل أنفاسها حبيسة ويحجبها عن التفكير، كل هذه الأسئلة ما هي إلا رغبة قوية في عدم تصديق ما قالته رنيم، خاصة وإن قويت الأسباب التي تُثبت الذي قيل، كانت تتمنى أن تجد في أسئلتها طوق النجاة، تريد التشبث بأي شيء يثبت أن ما قالته رنيم قد نُطق بلا جدوى، بلا أدنى فائدة، عبث، مُجرد عبث!! كانت تسأل كل هذه الأسئلة وهي تتمنى سماع جملة واحدة فقط لا غير ذلك: "طارق بيحبك بجد ومشاعره كلها كانت حقيقية".

عادة ما نتلقى الصدمات ممن ظننا بهم الملجأ والملاذ، نريد ألا نصدق، ونقول لأنفسنا دوماً: "كيف؟! كيف?!"، نحاول إيجاد أية ثغرة تُثبت العكس، تُثبت أنهم ليسوا بهذه البشاعة، وينتهي بنا الأمر إلى شتات العقل لا نستطيع التعافي منه، وأننا كنا نريد إقناع أنفسنا بالعكس حتى لا نرتطم بأرض الواقع بغتة!

أكملت شيرى حديثها وهى فى نفس الحالة ولكنها كانت تتحدث وكأنها قد أصابتها جنة:

"صح صح، أنا إزاي أصدق إن فيه حد يحبني ويتقبلني كدا بكل سهولة عادى! وأنا اللى بقعد أسأل نفسى هو إزاي مابلغش عنى بعد اللى قولته، وإزاي اتعامل معايا عادى". ضحكت ضحكة هستيرية بصوت عالٍ وهى تقول: "ما عشان هو عارف كل حاجة وكمان شريك معانا، ياه الدنيا دى صغيرة قوى قوى يعنى! لا بس حقيقى برافو".

بدأت تُصفق لها وهى تُكمل:

"برافو مجد من كل قلبى".

بعدها توقفت عن التصفيق وأردفت:

"إيه الدماغ دى؟! اختيارك للممثل كان فى محله ودوره عجبنى قوى، كنت مصدقاه ودا دليل على نجاحه طبعًا، كان هايل بصراحة".

قالت رنيم بعد أن أفسحت لشيرى أن تُفصح عما بداخلها حتى النهاية:

"شيرى أنا ما قصدتش إن كل دا يحصل، ما كنتش أعرف إن الأمور هتطور بالشكل دا! شيرى أنا بس...".

قاطعتها شيرى قبل أن تُكمل عبارتها، وعادت لحالة الانهيار مُجددًا:

"أنتِ تسكتى خالص! مفيش أى مبرر هيخلينى أسامحك أبدًا، أنتِ ضيعتى

لى حاجات كثيرة قوى، ضيعتى لى صحابى الى حبونى بجد، وخلصنى أكون سبب فى أذية واحدة منهم، خلتنى عايشة بالذنب طول عمرى ومش هعرف أسامح نفسى إنى مشيت ورا دماغك، لا وكمان جايبة لى واحد يفهمنى إنه بيحبنى ويدينى دروس فى النفسية، وإنى ماعذبش نفسى بوجع الضمير وأنسى الى فات المهم إنى اتعلمت، طلعتوا أول اتنين محتاجين ضميرهم يصحى، وكتتوا بتشتغلوا على إنى أموت ضميرى زيكم بطريقة غير مباشرة عشان كلنا نبقى مش مقبوض علينا ونروح السجن مش كدا! لا وكنت كمان بحس بالذنب ناحيته، أنت متخيلة أنا صدقته لدرجة إيه!! حتى الشخص الوحيد الى حبيته طلع لعبة أنت بتحركها عشان نفس اللعبة دى تضحك عليا وترسم عليا الحب! أنا زهقت منك ومن ألعيبك بقى، أنت إيه ضميرك مات! مات!

كانت كل كلمة تتفوه بها رنيم لا تفعل شىء بقلب شيرى سوى تحطيم قلبها تدريجيًا وكلماتها كانت تقع عليها وقع الصاعقة، الضربة القاضية التى أوشكت أن تفقدها الوعى، ولكنها قالت:

"هسألك آخر سؤال وبعدها تنسى إنى كنت فى حياتك أصلًا، اشمعنا الحب يا رنيم؟! كان فيه كذا طريقة تخليك تمنعنى من إنى أسلم نفسى غير إنك تلعب عليا لعبة زى دى!"

- "ماكنش هينفع غير كدا صديقى، وبعترف لك إنى ندمانة على الى عملته معاك، ماكنش لازم أوجعك بالشكل دا، خصوصًا إنك حبيته بجد، بس ماقدرتش أستحمل، وكان لازم أفوكك عشان ماينفعش حياة

تبقى مبنية على كذب، عملت كذا عشان ببساطة الحب هو الى كان هيجرك من كل الى أنت فيه دا ويخليك تتمسكي بالحياة أكثر، كان هيبقى عليه عامل كبير إنك ماتسلميش نفسك للبوليس، أسفة بس ماكانش فى إيدى حل تانى".

لم يتحمل عقل شيرى شلال الصدمات التى سقطت عليها تباغًا دون رحمة وأغرقها فى شجونها بعد أن بدأت التعافى منها، بدأت تحطم كل ما تراه أمامها ولم تعبأ بما تفعله، كل ما كانت تُريده هو أن تُخرج كل شجن تشعر به بداخلها وكانت تُردد جملة واحدة: «أبعدوا عني!!»، كانت الدموع تنهمر بشدة، حاولت رنيم إنقاذ الموقف قدر الإمكان وهى تمسك بشيرى، تحاول منعها من الذى تفعل وتحاول أيضًا أن تُهدئ من حالتها قليلًا، ولكن بلا جدوى، لم تر شيرى شيئًا آخر إلا أنها سقطت أرضًا وبعدها قد تلاشى أى شعور.

حاولت رنيم إفاقتها عدة مرات، ولكن لم تستجب شيرى لكل هذه المحاولات التى باءت بالفشل، لكنها قررت وهى فى حالة من الرعب والاضطراب الشديد أن تذهب بها مهرولة إلى أقرب مشفى؛ لتطمئن على حالتها.

كانت تسأل البعض عن الطريق لأقرب مشفى وهى مُتصببة من العرق هائمة، لا تعرف إلى أين تذهب، من حين لآخر تعلو دقات قلبها من شدة الفزع وكأنه يكاد أن يخرج من ضلوعها منذ أن كانت شيرى بين

ذراعيها على الأرض.

حينما وصلت، ترجلت من سيارتها وهي تحمل شيرى بصعوبة لكن ساعدها بعض من كان بالمشفى، وما أن رأت الطبيب سألته عن حالة شيرى وهي فى غاية التوتر، ثم قالت وهي مُرتجفة قليلاً:

"خير يا دكتور طمنى!"

قال الدكتور فى ثبات وهدوء:

"ماتقلقيش هى بس اتعرضت لانهييار عصبي، خلاها تفقد الوعي، بس خلاص فاقت وبقت كويسة، وممكن تدخل تطننى عليها لو تحبى".

- "تمام يا دكتور مُتشكرة لحضرتك جدًا".

= "هو حضرتك أختها أو حاجة؟"

- "قريبتها".

= "طيب يا ريت حضرتك تخلى بالك منها كويس وماتتعرضش لأى ضغط عصبي أيًا كان السبب، مفيش زعل خالص ليها ولا عصبية، وحاولى تغيرى لها جو".

- "حاضر يا دكتور، أكيد طبعًا وبشكر حضرتك مرة تانية".

انصرف الطبيب بعيدًا عن أمام الغرفة، وما أفاق رنيم من حالة الخوف

هو اطمئنانها على ابنة خالتها وجلست على مقعد بجانب الغرفة والعبوس يحتل وجهها، كانت شاردة حتى كأن هناك هاجس بداخلها يتحدث معها ويقول:

"وبعدين يا رنيم؟ هتفضلي كدا لحد امتي، شيري كان معاها حق، أنا فعلاً عمالة بأذى الى حواليا من غير ما أعمل حساب لحاجة، وكأني بعاقب الكل حتى لو ماعملوش حاجة، لمجرد كمية طاقة سلبية محاصرة قلبي ومش عارفة أخلص منها، شيطاني غلبنى ومسيطر عليا فى أغلب تصرفاتي، على طول بغلط بغلط والمشكلة إن كل مرة الغلط بيكبر عن الأول، طارق بردو كان عنده حق لما قال لى إني ماينفعش أواجه الغلط بغلط زيه، بس هو أنا فعلاً قولت لشيري الحقيقة عشان خيفة عليها ومش عايزة حياتها تبقى عبارة كذب، ولا عشان خوفت من طريقة طارق الجديدة معايا وكان لازم أحذرهما من كل دا، وساعتها كنت هبقى خيفة على نفسى بردو، أصل هى كدا كدا لازم تعرف الحقيقة، بس أنا كمان لما سمعت إنها هتسلم نفسها ماعرفتتش أفكر وخلاي أغلط وأعمل أى تصرف وخلاص، والى خوفنى أكثر إن طريقة طارق مابقتش طريقة واحد خايف من السجن وغيره، دى طريقة واحد بايع الدنيا، بس كان واخد شيري كحجة عشان أبطل شك فيه، وخوفت يكبر الفكرة فى دماغها عشان ينتقموا منى أنا كمان ويسلموا أنفسهم هما الاثنين، بس أعمل إيه فى دماغى! أنا إنسانة وحشة جدًّا ومدتتش لنفسى فرصة أفهم كلام طارق كويس، يمكن حبها بجد وهيقنعها ماتسلمش نفسها! يا

ريتني صدقته من الأول وكنت سيبتهم بجد يعيشوا حياتهم، بس كدا أنا رجعت لنقطة الصفر من تاني ومش هعرف أصلح اللي عملته، واضح إن الكل كان عنده حق، بس أنا اللي سمعت كلام شيطاني وبس! نفسى الزمن يرجع بس أصلح كل اللي عملته، النهارده بس حسيت قد إيه أنا ظلمتك وبهدلتك معايا يا شيرى، سامحني بجد! وقعت فى حفرة ومش عارفة أخرج منها أبدًا".

كانت الدموع تسيل من مُقلتيها وتنهل عليها تباغًا، لكن ما قاطعها عن كل ما تُفكر بها هو صوت هاتف شيرى لتجد مُكالمة من طارق، ردت على الهاتف بينما سبقها هو فى الحديث قائلاً:

"شيرى، أنتِ كويسة! أنا كل دا قاعد مستنيك، فى حاجة حصلت؟"

ازدردت ريقها ولم تعلم كيف تخبره بما حدث، ولكنها تركت نفسها تهدأ لبرهة قبل أن تقول فى تهدج:

"أنا مش شيرى يا طارق".

- "رنيم!! هو أنتِ رديتِ عليا ليه؟ شيرى فين؟! وبعدين ما لك بتعيطى ليه؟ هى حصل لها حاجة؟!"

= "ما تقلقش حاجة بسيطة، هى بس فى المستشفى وأنا معاها دلوقتى و..."

لم يتركها تُكمل قولها، وسألها مُسرعًا بعد أن تملكه الفزع فور سماعه

«هى فى المستشفى»:

«إيه! مستشفى إيه طيب؟»

أخبرته بالعنوان واسم المشفى، وأسرع قائلاً بعد أن انتفض فجأة من مكانه ولم يفكر فى شىء آخر سوى الذهاب على الفور:

«طيب، طيب، حالاً هكون هناك!»

أغلقا المُكالمة، وكل منهما يمتلكه شعور الفزع والحُزن، وبالإضافة لشعور رنيم بندم وحسرة شديدة.

سرعان ما وصل المشفى، وتوجه لرنيم التى كانت تجلس أمام الغرفة، وسألها وكأنه يسحب قطع من الفزع خلفه، كانت أنفاسه تتلاحق من شدة القلق على شيرى:

«فى إيه يا رنيم؟ حصل إيه وهى ما لها بالظبط؟»

ردت عليه وهى ما زالت فى نفس الحالة:

«ما تقلقش مفيش حاجة، هى بس جالها انهيار عصبي وفقدت الوعي مرة واحدة، ما عرفتش أتصرف ولا ألحقها، ف جيت بيها على هنا بسرعة، بس الدكتور قال إنها فاقت خلاص».

- «طب أنا عايز أدخل أطمئن عليها، ينفع أدخل؟»

= "أبوة عادى، هى خلاص فاقت".

- "طيب ماشى".

= "ماشى بس خد بالك يحصل لها أى حاجة".

- "أنتِ مش هتدخلى!"

= "أكيد عايزة أدخل بس، بس مش هقدر، اطمئن أنت عليها وقل لى لما تخرج".

وقف أمام الباب مباشرة وهو يُمسك المقبض، وقبل أن يفتح الباب سألها:

- "رنيم، هى جالها انهيار عصبي ليه؟!"

ترددت ولم تعلم ماذا تقول، فى النهاية لم تُخبره بشيء وقالت فى ارتباك:

"ادخل الأول طيب ونبقى نتكلم بعدين".

- "ماشى".

طرق باب العُرقَة بهدوء، لكنها سمعته وأذنت له بالدخول، شعر بارتياح شديد لمجرد سماعه لصوتها وتحول خوفه لطمأنينة.

فتح باب العُرقَة بتمهل، واندeshت لأنها رآته وكانت تُريد أن تصيح فى وجهه بعد كل ما عرفته عنه وخداعه لها، لكنها حاولت أن تتماسك ولم تجعله يشعر بأنها عرفت شيئاً عنه، وللأسف لم تستطع التحكم

بنظرات عينيها التي كان مُتَلِّئة باللوم، بالإضافة لنظرات تُنم عن أنها قد انخدعت، ولكنها لم تُفصح عن أى شيء.

أسرع إليها في لهفة ليسألها عن صحتها ويبدو على وجهه علامات القلق: "ألف سلامة عليك، ما لك؟"

أجابته بفتور وتعبيرات وجهها كانت ثابتة لا تعبر عن شيء مُحدد، تعمدت ألا تنظر له وهي تقول:

"أنا كويسة، معلش ما قدرتش أجى النهارده".

- "إيه اللى بتقوليه دا، أهم حاجة بس تبقى بخير".

لم تُجبه ونظرت له طويلاً وبدأت الدموع تسقط على وجنتيها بعد أن هدأت قليلاً قبل مجيئه، وسألها:

"إيه دا؟ إيه دا، ما لك؟! بتعيطى ليه؟ لو عندك مشكلة نبقي نحلها سوا لما تُخرجى بالسلامة، ماتشغلش بالك بحاجة دلوقتى خالص".

زاد بُكاؤها وهي تقول له:

"لو سمحت يا طارق ممكن تسيبنى أرتاح، أنا محتاجة أبقي لوحدى".

- "مش هينفع أسيبك وأنتِ كدا".

بدأت نبرة صوتها أن تعلو قليلاً:

"عايزة أبقي لوحدى ومش عايزة أتكلم، اخرج دلوقتى".

- "خلاص خلاص، هدى أعصابك أنا هخرج".

خطواته تتجه ناحية الباب وقلبه مشغول بها وبحالتها، كان لا يريد أن يتركها وحدها، وحينما وصل للباب ألقى نظرة عليها آملاً ألا تدعه يخرج ويطمئن عليها للمرة الأخيرة قبل خروجه، ثم ترجل من الغرفة.

دموعها كانت تسيل بعد قوله لعباراته؛ لأنها اكتفت من الكذب بحياتها ولا تصدق أنه ما يزال يخدعها بإتقان، فى الوقت ذاته كانت تتمنى أن تكون الكلمات صادقة ونابعة من قلبه حقاً، فعلى الرغم من الذى عرفته من رنيم إلا أنها تود أن يوجد أمل؛ ليثبت العكس وتتعلق بهذا الأمل بشدة، قد أحبته وما زالت تُحبه.

فور خروجه من الغرفة، جلس قريباً من رنيم، وهى الآن لا تستطيع الفرار من إجابة جميع أسئلته.

= "ماتأخرتش يا طارق على فكرة".

- "أه واضح إن فيه حاجة ضايقتها قوى ولحد دلوقتى لسة مخنوقة ومش عايزة تتكلم مع حد".

- "يا حبيبتي!"

ابتسم باستهزاء وقال:

"حببتك! طب ما تدخل كدا تطمنى عليها ولا إيه؟"

= "لا مش هينفع أدخلها، مش عايزاها تتعب".

- "هو إيه اللى حصل بالضبط؟"

= "ما أنا قلت لك إنها فقدت الوعى و..."

- "ماتجاوبيش سؤالى بإجابة مالهاش علاقة، أنتِ فاهمة قصدى كويس، بسألك إيه اللى وصلها أصلاً لكدا، هى كانت مكلمانى وقالت إنها نازلة وتأخرت كثير وفجأة ألاقيكِ أنتِ اللى بتردى على التليفون مكانها، مش غريبة شوية! أكيد مش صدفة يعنى".

= "أنت عايز توصل لإيه من كلامك دا؟"

- "عايز أقول لك إنك ليكِ علاقة بوجودها هنا فى المستشفى، عملتى لها إيه بالضبط يخليها تتعب بالشكل دا؟ وليه كُنتِ بتعيطى جامد وأساساً الموضوع بسيط مش ضخم لدرجة إنك تعيطى؟ وليه مش راضية تدخل لها؟!"

= "هقول لك، بصراحة هى عرفت كل حاجة".

- "نعم! عايزة إيه يعنى، بلاش هزار وقولى بسرعة بقى".

= "زى ما سمعت يا طارق، روحت وقلت لها على كل حاجة، وانهارت بعد كدا".

- "أنتِ إزاي تعملي كدا؟ دا ماكانش اتفاقنا على فكرة خالص".

= "أهو حصل اللى حصل بقى، مش عايزة كلام كتير فى الموضوع دا، كفاية إن اللى حصل لها دا بسببى وأنا مش عارفة أسامح نفسى إني عملت فيها كدا".

ضحك بسخرية مرة أخرى، وقالت مُتعبة:

"بتضحك على إيه؟ هى نقصاك أنت كمان!"

- "مفيش بس مستغربك شوية الصراحة، أول مرة أحس إن ضميرك واجعك بجد".

= "معاك حق تشوفنى كدا، بس لما حسيت إنها هتضيع من إيدي بدأت أحس بالندم بجد، مهما يحصل بيننا هفضل أحبها، عمرى ما حسيت إني خايفة على حد بالشكل دا".

- "بصى يا رنيم، أنا هعدى اللى عملتيه دا بمزاجى، وهعرف أصلح اللى سببتيه بينى أنا وهى، بس حقيقى كفاية لحد كدا، كفاية نخلق مشاكل بيننا من مفيش، عايزين نرحم بعض شوية".

= "حاضر، أوعدك، بس عشان خاطرى ماتخليهاش تقطع علاقتها بيا، وأنا مش هضر حياتها تانى مهما يحصل، غير اللى بيبان بس أنت ماتعرفش هى عندى إيه".

حرك رأسه بإيماءة بسيطة تعنى نعم:

"حاضر يا رنيم أوعدك".

كان شريف وكارما يجلسان سوياً أمام التلفاز - كعادتهما - بعد يومٍ شاق،
وشريف فى الوقت ذاته كان ماسكاً هاتفه ومُندمج معه لا يشعر بأى شىء
آخر حوله، تُلقى كارما نظراتها عليه من حين لآخر وكأنها تُريده أن يترك
هاتفه، فى حقيقة الأمر،

كان يتحدث مع رنيم أختها عبر إحدى مواقع التواصل الاجتماعى،
والسعادة تغمره وقتما يتبادلان الرسائل.

قال لكارما على حين غرة:

"معلش أنا تعبان بس وورايا شغل بكرة، فهدخل أنا، تصبى على خير".
= "وأنت من أهله".

أخذ هاتفه معه للداخل، وهى تشعر بالقليل من العبوس والشك فى آنٍ
واحد.

انتظرت لفترة حتى يغوص فى سُبَات عميق، وبعدها أخذت هاتفه، حاولت
عدة مرات فتحه ولكن المحاولات باءت بالفشل، فى النهاية قد نجحت
فى تخمين الرقم السرى لهاتفه وفتحته، بدأت التجول داخله حتى وجدت

شيئًا جعل قلبها ينتفض بين ضلوعها، لقد دهمتها المحادثة التي بينه وبين أختها وكلما زادت قرأتها للمُحادثة، كلما زادت دهشتها وحُزنها.

- «بقول لك إيه، عايزين نتقابل برا الشركة ونتكلم براحتنا عشان فيه كلام كتير عايز أقولها لك».

= «خلاص، أوك ما عنديش مشكلة، شوف الوقت اللي يناسبك وأنا تمام».

- «إيه رأيك بكره مثلاً؟ في المطعم اللي في نفس شارع الشركة نتقابل بعد الشغل».

= «تمام جدًا مفيش مانع».

- «يبقى اتفقنا، بقول لك إيه صحيح، فاكدة لما كُنَّا في الشركة وكان فيه حاجة عايز أقولها لك بس ما عرفتش؟»

= «أكيد فاكدة».

- «طب مش عايزة تعرفي كُنت عايز أقول إيه وقتها؟! :)»

= «بصراحة عايزة أعرف قوى».

- «خلاص بُكره هتعرفي كل حاجة».

سهم قد تحرر من القوس وأصاب قلبها دون شفقة، قد انتزع كُل ما هو جميل بداخل قلبها، تلاحقت أنفاسها والكلمات عالقة بداخلها، انعقد

لسانها عن الكلام، لم تشعر بالعالم حولها، تود الهروب من العالم بأكمله، تضع يدها الناعمة برفق على قلبها كأنها تريد أن تحتضنه وتطمئنه وتربت عليه بعد كم الكسور والانشقاق بداخله وفي نفس الوقت كانت تشعر باضطراب في تنفسها، كانت تضع يدها الأخرى على فمها من هول الدهشة، تريد حبس دموعها، ولكن غلبها الحزن ولم تستطع الكتمان فانفجرت الدموع من مُقلتيها، حاولت ألا يظهر صوت حتى لا يفيق شريف ويسألها ما الذى بها؛ لأنها لن تجد إجابة قاطعة لتبرر بُكائها أمامه إذا رآها، وغير قادرة على مواجهته.

حاولت أن تُكذب ما رآته، لكنها تعرف طريقته وأسلوبه جيدًا، وهذا ما أثار مخاوفها أكثر.

تمنى أن تُغمض عينيها وتفتحها لتجد نفسها أنها كانت تحلم، تود أن كل ما رآته مُجرد كذب! كلامه مع أختها يُشبه كلامه معها من قبل، نفس طريقة سعادته قد رآته مُجددًا وهى تغمره، كأنه يعيش تفاصيل جديدة ولكنها لا تختلف كثيرًا عن تلك التى سبقتها.

بقيت بغرفة المعيشة لفترة طويلة قبل أن تذهب هى الأخرى للنوم، تُحاول استيعاب ما رآته، فى النهاية خلدت للنوم هربًا من ساحة التفكير المؤلم، حاولت أن تهرب من كل هذا، لكنها وجدت صعوبة فى أن تتخذ فى سبات عميق.

وضعت الهاتف بهدوء حيشما أخذته، وباتت ليلتها منغمسة فى شجونها،

لم تستطع النوم مُطلقًا.

- «ألو يا شيرى عاملة إيه دلوقتى؟ أحسن؟»

ردت عليه بفتور:

«تمام يا طارق».

- «مال لك؟ فيك حاجة متغيرة».

= «مالى إيه؟ أنا كويسة على فكرة جدًّا».

- «فعلاً؟»

= «أيوه هكذب عليك ليه يعنى!»

- «طب أنا عايز أشوفك، هتقدرى تنزلى النهارده؟»

= «ماشى ساعة وأكون فى المكان اللى كنا هنتقابل فيه قبل ما أروح المستشفى».

- «خلاص تمام».

تريد شيرى مواجهته، لكنها لم تفعل ذلك بعد، ستفعل هذا حين تلقاه وجهاً لوجه وكانت تنتظر الوقت المناسب.

وبعد فترة وصلت للمقهى.

- "كنت لسه هكلمك أشوفك فين".

وقالت بابتسامة بسيطة:

= "طب وفيها إيه لما أتأخر؟"

ثم استطردت قائلة في سكينة وفي طريقة رزينة:

"ما أنا على طول بلحق وأعرف كل حاجة وأوصل متأخر، إيه الجديد؟"

ازدرد ريقه بصعوبة وكأنه يفهم مغزى كلامها، حاول تغيير الأجواء نوعًا ما ويتحدث معها في أمر آخر، قال في تردد:

"تحب تشربي إيه؟"

= "قهوة ممكن".

حين جاء النادل، أخبره بما يُريدان، خيم الصمت عليهما إلى أن جاء النادل بالمشروبات خاصتهما، ووضعها أمامهما ثم انصرف.

رشفت شيرى رشفة من القهوة ثم ضحكت، سألها طارق عن سبب ضحكتها المفاجأة، وأخبرته:

"مفيش أصلها فكرتني بحاجة كدا".

- «هى مين دى؟!»

= «القهوة! فكرتنى بيبك قوى بصراحة».

جلس متشوقاً وهو يبتسم، طلب منها أن يعرف المزيد عن كلامها غير المفهوم.

قالت بابتسامة حانية:

= «هفهمك، قصة القهوة من قبل ما أشربها لحد ما يعدى عليها فترة طويلة من بعد ما تشربها فكرتنى بحياتى قوى، وأنت كُنت شبه القهوة نوعاً ما، عارف كدا لما تكون تعبان ومش قادر أو مزاجك مش رايق ومش فايق وتقرر بعدها تعمل قهوة، هتلاقى أما تشربها إنك بقيت أحسن شوية، خصوصاً لو أنت بتحبها، ومزاجك هيبقى نوعاً ما بردو أفضل عن الأول وهتعرف تكمل وأنت فايق فى نفس الوقت، بس أما يعدى فترة طويلة من ساعة ما شربتها هتلاقى إنها كانت مُجرد حاجة مؤقتة، وإنك هترجع مش فايق تانى ولنفس حالتك تانى.

أنت كدا بالظبط يا طارق، أنت الحاجة اللى بتفصلنى عن الحاجات الوحشة اللى بحس بيها، كنت دايمًا النور وسط طريق ضلمة، كنت الحاجة اللى بتفوقنى للحاجات الحلوة اللى مش واحدة بالى منها».

صمتت لبرهة، وكانت الغبطة تشع من وجهه، وهو لا يعلم ماذا يقول، افترت عن أسنانها ضاحكة وبعدها تغيرت تعبيرات وجهها لتعابير

حادة وذاب بريق سعادتها، وأكملت:

«أنا ما خلصتش كلامي على فكرة،

إيه؟ مزهقتش من الكذب؟ واسمع الكلام للآخر وبعدها اتكلم براحتك».

تدريجياً، تتحول تعبيرات وجهه لشيء من القلق والحزن وعدم الارتياح، كانت تشعر هي الأخرى بنذر كبير من الحزن والصدمة ومشاعر تؤدي بها للهلاك، وقالت:

«كلامي اللي قولته من شوية عنك دا طالع من كل قلبي، وحقيقي وما كدبتش فيه زى ما عملت أنت معايا، بس الوضع اتغير وعرفت كل حاجة من رنيم، أنا ما كنتش قادرة أستوعب اللي أنت عملته فيا وإنك كنت بتخدعني طول المدة دي».

- «شيري، أنا ما خدعتكيش!»

= «أنا ما بقتش أثق فيك ولا أصدقك، أنت كنت طوق النجاة، وفجأة اكتشفت إنك القشة اللي كسرت ظهر البعير، كنت آخر واحد أفكر إنه ممكن يخدعني أو يعمل فيا كل دا، أنا كنت دايماً بقول لك إني مش عايزة أخسرك، ليه عملت فيا كدا؟! تعرف إن بالرغم من كل اللي حصل في حياتي أكثر حاجة وجعتني بجد وضايقتني هي أنت، صدمتي فيك هي أكبر من صدمتي في أي حد، ما كنتش عايزاك تبقى زيهم! كل اللي أنت عملته كان مجرد تمثيل!»

أخذت الدموع طريقها في النزول واحدة تلو الأخرى على وجنتيها، كانت عيناها هو الآخر مليئة بالشجون ولمعان الدموع بداخلها، ثم أردف:

"هحكيلك على كل حاجة، وصدقيني كل اللي هقوله دا هو الى حصل.

مش هكذب عليكِ خالص، أنا كنت شريك معاكم في اللي عملتوه، بس رنيم ماكنتش بتخليني أنا وأنتِ نظهر لبعض، حتى أنا ماكنتش أعرف إنك معاها وعرفت بعد كدا، كان تعامل معاها هي وبس بخصوص اللي حصل، طلبت مني أجيب لها عريية مسروقة عشان ماتتكشفش، واتصرفت وعرفت أجيب الزرنوخ، في الأول أنا ماكنتش فارق معايا غير نفسي وبس، وعملت كدا عشان شوية فلوس، عارف إن اللي عملته غلط جدًا، بعدها بفترة بسيطة رنيم كلمتني عنك وطلبت مني إني أمثل عليكِ وإني أخليكِ تنسى يعني إيه ضمير أصلاً، بصراحة في الأول كنت بسمع كلامها وكنت بمثل، لكن بعد كدا حبيتك بجد وكان كل كلامي معاكِ بجد، حاولت كتير أصارحك بس كنت كل مرة بتردد وبخاف، ماكنتش بقدر خالص، كنت خايف تضيعي من إيدي".

= "طب ولما كنت عايز تتجوزني؟"

- "دا كان بجد، ورنيم ماتعرفش أصلاً، كنت عايز أبدأ حياتي معاكِ بعيد عن أى حاجة قديمة، أنا عارف إني غلط وعشان خاطري اديني فرصة ثانية".

= "لا يا طارق، مش هقدر أكمل، خلاص مش هعرف، كفاية لحد هنا

قوى!

نهضت مُسرعة والحنق يملؤها، ثم ترجلت من المكان.

- "رنيم، أنا هتكلم معاك بصراحة، أنا في الأول كنت مش بستلطفك وكدا، لكن شعورى ناحيتك ومن غير أى مقدمات اتغير قوى لدرجة أنا نفسى مش مستوعبها، كدبت إحساسى قبل كدا وكنت عايز أبعد عنك، بس ماعرفش إيه السر اللى كان بيخلينى أتشد ليك في كل مرة وماعرفش أبعد، دا في حد ذاته كان مخوفنى".

ثم أمسك يدها برفق وهو مُبتسم بشدة، كانت تُبادلُه نفس الابتسامة، وهى تقول:

"أنا كمان بصراحة، بس هو اللى بنعمله دا صح؟"

- "مش عارف، بس إحساسى مش قادر أتحكم فيه، مابقتش عارف أبطل تفكير فيك في كل تفصييلة في حياتى، كأنك إنتِ المفروض اللى تبقى في حياتى من زمان".

صفت كارما سيارتها خارج المطعم، قلبها يخفق من شدة القلق، صعدت بعض الدرجات من السلم واقتربت من الباب، وما أن اقتربت إلا ورأت زوجها بنفس تعبيرات وجهه التى كان بها معها من قبل، كأنه يُكرر حكايتها مع شخص آخر، كل هذا قد أثار الشكوك بداخلها ولكن هذا

المشهد قد أكد كل ما كانت تتوقعه، رأيته وهو يمسك يدها في رقة، اتجهت نحوهما في ثقل ووقفت أمامهما.

أفلتت رنيم يدها سريعاً وكانا في ارتباك، ثم نهض من مقعده، أردفت كارما في ألم مُبرح بداخلها:

- "ليه قومت ليه؟ واتوترتوا كدا ليه؟ ولا كأنى موجودة".

= "كارما ماتفهميش غلط مفيش أى حاجة استنى".

أجابته باستهزاء:

- "أيوة، أيوة ما أنا عارفة طبعاً".

-- "كارما مفيش أى حاجة فعلاً".

أدارت كارما وجهها سريعاً لتغادر المكان، أمسك يدها ليحاول إيقافها ولكنها أفلتت يدها وأكملت سيرها.

حينما كانت تسرع في سيرها كان شريف يهرول أيضاً ليدركها، لم يُصدق كيف عرفت أنه هنا مع رنيم، كان شغله الشاغل أن ينقذ الأمر مع زوجته بعد أن رأيته بنفسها، سرعان ما تحركت بسيارتها قبل أن يلحق بها، وتحرك هو الآخر بسيارته حيثما اتجهت.

وصلت كارما المنزل وتبعها شريف، اتجهت نحو الغرفة مُسرعة أحضرت ملابسها لتضعها بحقيبتها الكبيرة وعيناها مغرورقتان بالدموع، لم

تستطع التفكير في مثل هذا الموقف سوى الابتعاد عنه، لحق بها وهو يحاول منعها عما تفعله.

- "كارما، سيبنى أوضح لك بس".

= "مش عايزة أسمع توضيح، كفاية اللي شوفته بعيني".

- "مين فهمك كل اللي في دماغك دا؟"

= "دا اللي فارق معاك قوى، عامةً أنا بقالى فترة حاسة إنك متغير معايا وعرفت إنك كنت معاها من الرسائل اللي على تليفونك".

- "صدقيني أنتِ فاهمة الموضوع غلط، مش زى ما أنتِ فاكرة خالص كارما، أنا ماجبش غيرك ماتسيينيش أرجوك".

= "بس كفاية بقى، عمال بتضحك عليا بالكلام ولا كأنى طفلة صغيرة، أنتِ مايتحبينيش، شبت منك كلام زى دا وكل مرة كنت بصدقك، لكن النهارده أثبت لى العكس تمامًا".

- "مفيش بينى وبينها أى حاجة".

= "أنت مصدق نفسك؟ قول كل مُبرراتك، وفي النهاية مش هصدق بردو".

- "أنا مش هقدر أستحمل تسيبيني".

أردفت في انفعال:

= "لا قدرت وبمزاجك بردو، وأول حاجة فكرت فيها إنك تروح وتحب من تانى، عمرك ما فكرت فيا، تفكيرك كله كان فى نفسك وبس، وأنا بسمع كلامك من غير ما أفكر عشان صدقتك، دايمًا بتحملنى أى غلط وكأن علاقتى بيك مبنية على السباق بين مين اللى يثبت للتانى إنه غلط أكثر، بيتيهالى احنا محتاجين نبعد فترة نعيد فيها كل حسابتنا، أنا همشى دلوقتي وماتمنعنيش عن دا لو سمحت، أنا هبقى مرتاحة كدا أكثر".

انتهت من وضع ملابسها بالحقيبة خاصتها، غادرت المنزل والحزن يحاوطها ويكبلها بالأغلال، كانت كالقنبلة الموقوتة التى انفجرت بغتة، أدرك شريف أن كل ما قالته هو صواب ولم يستطع إيقاظ نفسه من الغفلة التى كان بها إلا بعد أن رأى كارما وهى تفلت من بين يديه، وفى هذه اللحظة علم قيمتها الحقيقية.

"تأتيك الصفعة على قدر الغفلة، إن لليقظة ثمنًا باهظًا".

- محمد شكرى

بعد مرور أسبوعين.

استيقظت وعد على صوت هاتفها، اعتدلت فى جلستها قليلًا وهى تحاول أن تفتح عينيها، اندهشت لتجد المتصل بها والدة باسم.

- "إزيك حضرتك يا طنط؟"

= "إزيك يا حبيبتي؟"، كانت تقول تلك العبارة وهى تبكى بكاءً مريئاً،

ولم تعلم كيف ستقص الخبر عليها.

- "خير يا طنط؟ حضرتك كويسة؟"

= "شدى حيلك يا بنتى".

سمعت تلك الكلمات وهى تود أنها قد سمعت خطأ، وظلت غير مُصدقة لما سمعته وهى تسأل:

"إيه دا؟! هو حضرتك قولتِ إيه حالاً؟! أشد حيلى ليه، مين طيب؟"

= "أنا عارفة إن الخبر صعب جداً، وأنا نفسى مش مستوعبة بس هنعمل إيه، ادعى له بالرحمة".

اعتدلت فى جلستها وأردفت:

"لا، لا، يا طنط، باسم كويس وأنا كنت لسه شايفاه من كام يوم! مفيش حاجة لا أكيد حد تانى!"

صمتت ولم تُجبها، ترجمت وعد هذا الصمت على أنه حقاً باسم هو الذى توفى، لكنها كانت لا تستوعب الخبر من هول الصدمة، لم تتحمل وانفجرت بالبكاء الذى يتبعه ألم بالقلب كأن خنجر قد أصاب قلبها ويمزقه، وهى تقول:

"أنا مش فاهمة حاجة!"

= "مات في حادثة عربية، والدفنة هتبقى كمان ساعتين".

شعرت بدوار مفاجيء حدث لها وهى لا تستطيع تمالك أعصابها، ثم جاءت والدتها بعد أن سمعت صوت بُكاء ابنتها وهى تسألها عن سبب البكاء، وأخبرتها ب وفاة باسم، شعرت والدتها بالصدمة فى بادئ الأمر، ولكنها عانقت ابنتها وربتت على كتفها لمواسبتها، أرادت أن تبكى هى الأخرى، حبست دموعها حتى لا يزداد حزن ابنتها التى كانت تصرخ ببكاء مرير، وتريد تهدئتها، خاصة أنها لم ترها بهذه الحالة من قبل.

كانت شيرى تقضى يومها الموحش ككل يوم، وهى تتذكر أيام لقائها مع طارق، حاولت كثيراً نسيانه، ولكنه يُجسد جملة الشهيرة لها: "بس أنت المرض النادر الى مالوش علاج!"، بدأت هى الأخرى تشعر بنفس الجملة ناحيته، وكلما تذكرته، كلما زادت همومها وبكاؤها، حجب عنها سلسلة ذكرياتها سماعها لصوت طرق الباب، وفى هذه المرة تعجبت؛ لأنها قطعت علاقتها مع جميع من تعرفهم، فمن سيأتى لها؟! فور فتحها للباب ورؤيتها لرنيم تسمرت مكانها، ولم تسمح لها بالدخول، كأنها لا تريد رؤيتها على الإطلاق.

- "أنتِ إيه الى جابك هنا؟! أنا مش قلت لك تنسينى خالص وتبعدى عن حياتى، امشى من هنا لو سمحتى".

دلفت وهى تقول:

= "استنى بس يا شيرى أنا جاية لك ومفيش حاجة مخبياها عليك خالص، جاية لك من غير أى تهديدات ولا كلام يضايق ولا أى حاجة، بالعكس أنا جاية لك النهارده عشان أريحك وأعمل لك الى أنتِ عايزاه".

- "أنا مش هبقى مرتاحة إلا لما تبعدى عن حياتى خالص".

= "طب اسمعى ومش هتندمى صدقيني وابقى قررى فى الآخر".

تنهدت قليلاً ثم قالت بصعوبة:

"اتفضلى، قولى عايزة إيه؟"

= "قبل أى حاجة يا شيرى أنا بعذر لك بجد عن أى حاجة سببتها لك وحشة، أنا عارفة إني ضايقتك كتير وورطك معايا فى كذا مُشكلة، ماكنتش عايزة الأمور توصل بينا للشكل دا ويجى اليوم الى تبقى مش عايزة تعرفيني فيه".

كانت شيرى تضحك باستهزاء لما قالت رنيم، ثم قالت:

"طب بلاش المقدمة دى، وقولى المشكلة الجاية هتبقى إيه يا ترى؟ هنسرق بنك ولا هننصب على ناس ولا إيه بالظبط؟ ما بقينا عصابة بقى مش كدا؟ المفروض بقى دلوقتى إنى أصدقك مش كدا؟"

= "لو سمحتى، كفاية إهانة فيا، أنا بتكلم بجد! أنا جاية وبقول لك إنى ندمانة على كل حاجة عملتها، وخلص ضميرى صحى، جبل على قلبى

مخليني مش عارفة أتنفس، اكتشفت إن الواحد مهما كان جبروت ومؤذى لازم هيجي عليه وقت ويقع، أنا اكتشفت إني كنت غلط في كل حاجة، غلط لما سلمت نفسى لشیطاني وعملنا الی عملناه في بابا زمان، لما فكرت لقيت إن كلامك إنت وطارق كان صح، هو فعلاً ماكنش يستحق مني كل دا، ماكنش ينفع لأى سبب أعمل كدا مهما هو عمل فيا، كان فيه أمل الأمور تتغير بس أنا كنت مش هاممني حد، ومش سامعة غير نفسى وبس، حتى كارما أختي خليتها تعيش متعذبة لوفاة بابا وهي على وش جواز، لأ وكمان كنت عايزة أدمر لها حياتها بعد الجواز، وكنت مرتاحة وأنا بعمل كدا جداً رغم إني ماشوفتش منها حاجة وحشة، وماينفعش أعاقبها على حاجة هي مالهاش ذنب فيها! ماكنش لازم تكوني معايا لما قتلناه، بس في نفس الوقت ماكنتش هعرف أعمل حاجة لوحدي، أنا الی أستاهل كل الی هيحصل لی".

كانت تقول تلك العبارات بصدق لم تشهده من قبل، وتحدث بتأثر والدموع تسيل على وجنتيها من صدق تعبيرها، شعرت شیری بالندم لأنها عنفتها القول دون علمها بصدق نواياها، وقالت في حرج وخجل مما فعلته:

"طب خلاص طيب ماتزعليش نفسك، كله هيتحل وهيبقى تمام، وبعدين مش أنت الی ورطيني أنا وطارق، احنا ورطنا نفسنا بمزاجنا عشان الفلوس، وماينفعش تتحملي الغلط كله لوحداك عشان احنا كمان غلطنا برغبنا احنا، بس عايزة أسألك سؤال معلش".

= «أُكيد طبعًا، اتفضل».

- «هو أنتِ اللى خلاكى تتغيرى فجأة كدا، وخلاكى تفوقى بعد الفترة دى كلها؟»

= «لما كُنتِ فى المستشفى، وقبلها لما وقعتِ من طولك قدام عينيا وأنا مش عارفة أعمل لك حاجة، كل دا فوقنى، أى حد كُنت بأذيه فى حياتى كانت غلاوته عندى مش كبيرة عشان كدا ممكن ما كنتش بحس قبل كدا بتعب نفسى زى دلوقتى، كنت باخدها بفكرة انتقام مش أكثر، لكن لما شوفت بعينيا إنك ممكن تضيعى منى بسببى فوقت شوية.

بس مهما حصل بيننا مشاكل ما قدرش أقلل غلاوتك عندى، أنا عذبتك فى حياتك وما خلتيكىش تعرفى تعيشها رغم إنك أكثر واحدة غالية عندى، أنتِ أختى اللى اتربيت معاها، عمرى ما حسيت إنك مُجرد قريبتى، عادة بنحب نشوف نفسنا الضحية واللى بنتجرح بس مش بناخد بالنال إن احنا بردو بنتجرح ونضايق، مهما كنت بتظاهر بالقوة وإن مفيش حاجة فارقة معايا خالص جه عليا الوقت اللى حسيت إن قلبى مش بيقدر يخبى أكثر من كدا، ومن كتر أذيتى للى حواليا بقى قلبى عمال سواده يزيد لحد ما بقى زى القُنبله اللى انفجرت وما بقتش تستحمل كم الشعور بالذنب اللى طلع مرة واحدة، عايزة أوقف كل اللى بعمله عشان فعلاً مش عايزة أبقي الشخصية دى، صدقيني المرة دى أنا بتكلم بجد».

تنهدت طويلاً ثم استطردت:

"بصى أنا هسمع كلامك وهنسلم نفنشنا عشان مش هقدر أعيش باللى أنا عملته دا، لازم أصلح اللى عملته عشان ضميرنا يرتاح".

بدأت شيرى التعاطف مع حديث رنيم، أزالَت دموعها برفق وابتسمت لها فى حنو وقد ربتت على يدها ثم كتفها، وبعدها جعلتها بين ذراعيها لتنسى كُل ما يُحزنُها، وتشعرها أنها ما زالت تُحبها بالرغم من فعلتهما الشنيعة، وهمست فى أذنها:

"مسامحك يا رنيم، وماتعيطيش عشان خاطرى، كله هيتصلح ويبقى تمام".

= "اعملى حسابك إننا هنروح لكارما بعد كام يوم، وبعدها نسلّم نفسنا، بس هنروح أفتح الباب بس الأول".

- "يا بنتى محدش خبط أساسًا".

لم تعباً رنيم بآخر جُملة قالتها شيرى بالرغم من أنه فعلياً لم يطرق أحد الباب، وحررت نفسها من بين ذراعيها، ثم نهضت مُتُجهة للباب، ليظهر طارق من خلفه، ما أن رأتَه شيرى حتى نهضت مُسرعة وتسمرت مكانها وهى تحقق به، تُريد أن تبعده وتُخرجه، لكن شىء ما بقلبها قد منعها حتى من أن تتفوه بأى شىء. دلف، ثم وقف أمام شيرى، قالت رنيم بعد ذلك مُسرعة:

"طارق كمان لازم تسامحيه".

ترى رنيم حالتها في شرود وكأنهما لا يكثران بما حولهما.

ما يزالان يتبادلان النظرات، وكانت نظرتها تحمل شيئاً من الدهشة وانعقد لسانها عن الكلام، بينما بدأ هو الحديث قائلاً:

"أنا عارف إنك زعلانة مني، ومش قادرة تنسى اللى حصل، وأنا مقدر دا صديقي، بس سامحيني يا شيري افتكرى لى أى حاجة حلوة طيب".

= "لا، أنت كنت مُتقبلنى عشان ببساطة أنتِ عارف كل حاجة، وزيك زينا فى اللى عملناه، لكن لو ما كنتش تعرف حاجة ولا كان ليك علاقة بالموضوع كله كان استحالة تكمل معايا، أنا نفسى أصدقك لكن مش عارفة".

- "لا مش عشان كدا، بصى أنا عارف إنك عايزة تسلمى نفسك ودى رغبتك اللى هتريحك، مش هقدر أمنعك عنها رغم صعوبتها عليا، وإنى عارف إن الموضوع هيصيبنا كلنا بما فيهم رنيم، بس مابقاش يفرق معايا حاجة غيرك، لازم ندفع تمن اللى كلنا عملناه، ومفيش حد فينا هيعرف يكمل حياته بشكل طبيعى نهائى، حتى أنا وأنتِ مش هنعرف نكمل حياة طبيعية بعد اللى حصل، لازم نصفى كل حسابتنا فى الحياة ونصلح اللى حصل.

الى فارق معايا دلوقتى هو إنك تسامحيني، أنتِ فوقتيني أنا ورنيم، وجودك فى حياتي أنا وهى فرق قوى وإلا كان زماننا دلوقتى هيفضل همنا هو نفسنا وبس! اختارى اللى أنتِ عايزاه وأنا هبقى معاك فى أى اختيار".

تسمع شيرى هذه الكلمات وهى فى صمتٍ تام وبأذنٍ صاغية، هالة من الصمت خيمت على المكان وفى الوقت ذاته كانت تذرف عيناها الدموع، وهى حاليًا فى صراع بين أن تختار أن تُكمل حياتها معه، ولكن سيظل هناك ما يُفسد عليهما حياتهما، ومن ثم سيوجد بينهما حياة ميتة وسيظلان يعيشان بخنجر وألم الضمير، وإما أن تختار دفع ثمن أخطائها براحة ضمير وسلام نفسى، سرعان ما حسمت الأمور واختارت الاختيار الثانى وعن اقتناع بنسبة فائقة.

أردفت بنبرة حانية وهادئة:

"عارفة إن قرارى صعب علينا كلنا، بس أنا شايفة إن دا الصح!"

نظر لها بعينيه المُفعمة بالحب وياماءة بسيطة برأسه تعنى أنها على صواب، ولكنه حرك رأسه فى ثقل، فهو قد أدرك اختيارها دون التفوه به لفظيًا.

حان وقت الدفن، وأثناء دفنه كان كل ما يثير ذهن وعد هل هو حقًا؟ ألن تراه فى حياتها فيما بعد؟ تراه وهو يُدفن وعيناها جاحظتان، وفمها مفتوح قليلًا من هول الصدمة وهى تراه فى طريقه للبقاء بالقبر حتى النهاية، وسيصبح الفارق بينهما ليس مُجرد أحجار وطوب ولكنه أبعد وأعق من هذا.

كانت ترى هذا المشهد وقلبها ينفطر، تلاحقت أنفاسها.

صممت أن تجلس بمفردها بعد أن رحل الجميع، لم تفعل شيئاً سوى أنها كانت تتأمل قبره، كأن عينيها تحملان كلاماً أكثر مما كانت ستتفوه به.

ثم نهضت بعد ذلك وهي على علتها، حينما خرجت وجدت صديقتها كارما تنتظرها بالخارج بعد أن رحل الجميع من المكان، فهي لا تستطيع الاطمئنان عليها وحدها وهي في تلك الحالة العصبية وفي مثل هذه الأجواء، تراها بملابسها السوداء والحزن لا يفارقها في سيرها نحو صديقتها، تنظر لكارما بشروء، ألقت نفسها بين ذراعيها؛ لتهرب من كل ما تشعر به.

بعد فترة أبعدتها كارما قليلاً من بين ذراعيها، ثم وضعت يدها على كتف صديقتها وهي تربت عليه برفق، أخذتها معها للسيارة خاصتها بعد أن أزلت دموعها.

فتحت كارما باب السيارة لصديقتها وساعدتها في الدخول، فهي قد رأت صديقتها تجد صعوبة في كل شيء منذ سماعها خبر الوفاة؛ في التنفس، في التركيز، في الشعور بما حولها، في الحركة، وربما في الحياة! انطلقت كارما بسيارتها بعيداً وهي تذهب مع صديقتها، كان الصمت هو الشيء الذي يشغل أغلب طريقهما سوياً، ثم تنحنحت كارما وكأنها تريد قول شيء ما:

"وعد، أنا حاسة بيك قوى، بس حاولي تفكري الكلام الى كُنتِ بتقوليهولى لما بابا اتوفى، عارفة إن الموضوع صعب عليكِ بس ماتعرفيش الخير فين".

- "مش عارفة ولا أقدر أفكر في أى حاجة خالص، دماغى واقفة من

ساعة الى حصل".

= "أى حالة وفاة بتأثر فينا ماشى باختلاف الغلاوة والكلام دا كله، بس كل ما هيعدى عليكِ الوقت هتحمدى ربنا على أى حاجة توجعك حتى، حكمة ربنا افهميها فى كل وقت دلوقتى هتتعوضى بالعوض الخير، أنا عارفة إنك كُنتِ بتحببيه جدًّا، بس هو دا عمره فخلاص، ماتفكريش كثير، هتكملى حياتك بعد كدا بشكل كويس، وهتقابلى ناس أكثر وهيفضل عندك ذكرى جميلة، فلنفترض إنكوا كملتوا حياتكم سوا وماعرفتوش تتفاهموا وبالفعل بيحصل عن تجربة، أو كان حصل مشاكل فيما بعد كان هيبقى الوضع إيه؟"

كانت تقول تلك العبارات وهى تتذكر ما حدث لها هى الأخرى، تتذكر تحوّل حياتها مع الشخص الذى ظنت أنه حبيبها، ثم استطردت:

"صحيح نسيت أقول لك، قبل ما والدته تمشى سابت معايا الكتاب دا، وقالت إنه كان عايزك تقرأيه".

تسلمت من يدها الكتاب وقد عاود حنينها له مُجددًا، وتسلمته ببطء وهى ترتعد، فهى على الأقل معها شىء يذكرها به.

أخذت تحقق النظر به، وسألته:

"دا كتاب إيه دا بالظبط؟"

= "ماعرفش بصراحة محدش فتحه".

أخذت جولة سريعة بالكتاب لتجد أنه مكتوب بخط اليد، وفهمت أنها مذكراته ولكن عدد الصفحات لم يكن بالكم الذى يشمل مذكرات شخص بها جميع تفاصيل حياته، وبعد دقائق صفت كارما سيارتها أمام منزل وعد، ترجلت منها بثقل وابتسمت لكارما بثقل أيضاً، كانت وعد لا تريد أن تستمع لهذا الكلام فى وقت صدمتها وحزنها، تعلم أنها على صواب ولكن هذا ليست ما كانت تحتاجه من صديقتها.

تجلس كارما وحدها بغرفتها فى منزل والدتها، وعقلها مشغول بشأن حالة صديقتها وحالتها هى الأخرى، أرادت أن تُغمض عينيها لتفتحها وتنسى كل ما يشغلها ولكنها فشلت، ثم قطع شريف حبل أفكارها المتتالية بكالمتة الهاتفية، ترددت كثيراً قبل أن تُجيبه، لكنها أجابت فى النهاية وقررت أن يكون دورها أن تسمع فقط ولا تتفوه بكلمة.

بدأ هو الكلام وكأن نبرته تنم عن ندم وأسف شديد:

"كارما، أخبرك إيه؟ طمئني عليك، من ساعة الى حصل وأنا مجاول أكلمك كتير قوى بس ما كنتيش بتردى، حتى يوم الدفنة كنت عايز أكلمك بس كُنت مُخرج وما كنتش عارف أقول إيه".

صمتا هما الاثنين لبرهة ثم أردف:

"كارما، إنتِ ليه مش بتردى عليا، سكوتك دا مموتنى، أنا عايز أقول لك حاجات كتيرة قوى اتغيرت فيا من ساعة الى حصل بجد، أنا مابقتش عارف أكمل حياتى خالص، لا بقيت مرتاح فى شغل ولا مع أى حد

خالص، بقيت أكره الكلام مع أى حد حتى هى، أنا فعلاً اكتشفت إنك أغلى حاجة عندى، يمكن ما كنتش باخد بالى من دا، عارف إني غلط بس أنا اتعلمت والدرس كان قاسى قوى عليا، طب بصى احنا نبدأ صفحة جديدة مع بعض، أرجوك ارجعى البيت، أنا مش قادر أقعد فيه وأنتِ مش موجودة جواه، أنا مجد آسف".

لم تُجبه أيضًا وكان كلامه يُصعب عليها الأمر، ذرفت عيناها الدموع وقالت: "خلاص يا شريف لو سمحت سيبنى، أنا مجد مش عايزة أفتح سيرة الموضوع دا نهائى".

أغلقت المُكالمة مُسرعة بعد أن اغرورقت عيناها بالدموع، وهو الآخر أوشكت دموعه أن تسقط، همس قبل أن يغلق المُكالمة بصوت خافت وملء بالحزن: "كارما!"

"الناس يقولون إنك لا تعرف قيمة ما تملك إلا حين تفقده،

والحقيقة إنك تعرف قيمة ما تملك ولكنك تعتقد أنك لن تفقده أبدًا"

- ويل سميث

استيقظت وعد من نومها وهى تُحاول أن تفتح عينيها وسط الظلام الحالك، كانت لا تُريد الاستيقاظ خاصة بعد أن أصبح النوم هو مفرها الوحيد.

اعتدلت فى جلستها وتنهدت ثم ازدردت ريقها، وبعدها أضاءت المصباح جانبها أعلى الكومود؛ لينشر ضوءه الخافت رويدًا رويدًا، فيُمائل ما قد

أصابها من انطفاء بروحها.

ألقت نظرة عابرة حولها، ثم وقعت عيناها على كتاب المذكرات، كانت تفتحه في تمهل وقرأت.

قرر شريف أن يتوجه للمدفن الذى به صديقه المقرب، كان هو ملجأه وملاذه فى جميع الأوقات، كان وما يزال يشغل حيز بقلبه لا يستطيع أحد أن ينافس فيه، حتى بعد مماته سيظل محباً أسرارته، وكتابه المفتوح الذى يدون به كل مشاعره بارتياح شديد، جلس أمام قبره وعيناه تلمعان بالدموع المخترنة كأنه يكاد يبكى، تنهد ثم أردف بتحشرح:

"وحشتنى، وحشتنى جداً، سيبتنى بسرعة، كنت محتاج وجودك معاً قو، عمرى ما حسيت بجملة "ماعنديش اخوات"، عشان أنت ماكنتش بتخلينى أفكر إني أقولها أساساً، مفيش صاحب عندى زيك ولا هيبقى زيك، أنت مكانتك عندى مابتتحركش إلا لو هتزيد، بس ماتقلقش هجيلك كتير وأزورك وأتكلم معاك كأنك قاعد قدامى بالظبط، وأحكيلك كل مشاكلى، أصل أنت وجودك مش بيفارقنى بحس دايماً إنك معاًيا حتى لو مش موجود فعلياً".

فى هذه اللحظة تفجرت دموعه من مُقلتيه وكأنه أدرك أن وفاته أمر واقع لا يستطيع الهروب منه، وعليه أن يتكيف معه، ثم استطرد:

«تعرف يا صاحبي؟ ما كنتش أعرف إني بحبك قوى كدا، أنت بتدخل حياة أى حد بتخليها أحسن، يعنى مثلاً أنا لو كنت سمعت كلامك، كان زمان حياتي أحسن بكثير عن الأول عشان لقيت إن كلامك صح، أنا جيت عليك وضايقتك فى الوقت اللى كنت بتفوقنى فيه، كنت خايف عليا أنا وعلى سعادتي وحياتي، بس أنا عارف إن قلبك أبيض، ومسامحنى وزعلك عليا كان أكثر.

فاكر لما كنت بتقول لى إن شعورى ناحية رنيم أنا اللى أقنعت نفسى به وأى كلام كنت بقولها كنت أقصد به كارما بس أنا اللى أستوعبت دا متأخر، كارما فعلاً هى كانت المقصودة بأى كلام أنا كنت بقوله لواحدة غيرها، بس كنت مش عايز أصدق دا عشان علاقتى بيها كانت بتضعف يوم بعد يوم لحد ما صدقت إني مابقتش أحس ناحيتها بحاجة، اللى بينى وبين رنيم فعلاً مش حب، أوقات كثيرة بيبقى فيه كلام كثير عايزين نقوله لشخص معين بس لسبب ما بنقوله للشخص الغلط اللى بنشوف فيه الشخص اللى بنحبه بجد، أنا واثق إنك فاهم قصدى.

بس تعرف أنا اكتشفت إيه بردو، إن أنا بدأت أحب كارما الحب اللى بجد، كانت علاقتى بيها زمان مجرد تعود أو حب بنوهم نفسنا بيه، عمرى ما حسيت إني بحبها بجد قبل كدا، كأنك بالظبط بتبنى عمارة أساسها ضعيف، لأول مرة أفهم يعنى إيه حب بجد!

أغمض عينيه للحظات وهو مكدرًا، ثم فتحها وقال:

"أنا هفرحك وهرجع حياتي تاني أحسن من الأول، وكلامك ليا هيفضل في دماغى طول العمر".

"ها هي مُذكراتي الأفضل لى، ومن فرط حُبى لها أردت عزلها عن باقى الذكريات؛ لاختلافها وجمالها الساطع بداخل ثنايا قلبى، مُنذ أول لقاء بيننا وقد تخيلت أن الحياة جعلت البساتين تُلقى الزهور علينا تِبَاعًا، وجعلت الهواء ينشر نسيمه العليل المُفعم بالبهجة علينا وحدنا دون سوانا. هى تستحق موسوعة كاملة لوصفها، وكأن الكلمات البرّاقة تتبارى؛ لُكُتِب على السطور فقط من أجلها. جعلتها بكتاب مُنفرد، وتستحوذ بداخلى على مكانة مُنفردة، كأن العالم بأكمله لا يتسع إلا لنا فقط، كأن كل شىء قد تلاشى إلا نحن. أحببت كل شىء يُذكرنى بها، هى عندى ليست حالة وهم أو لهفة بدايات، ولكن حقًا شعورى بها يختلف عن القصص والروايات.

كيف للكلمات أن تسعد وهى تتحرر على السطور، كأنها لأول مرة تُدرك معنى الحبور؟!"

أغلقت الكتاب حتى أنها لم تُكمل الصفحات المُتبقية، وكأنها تُلملم بقايا روحها.

ذرفت عيناها الدموع، وقد عجزت عن وصف ما أصاب قلبها للتو.

سمعت كارما صوت الجرس وهى تجلس بغرفتها فى منزل والدتها، فنهضت لفتحها، ظنتها والدتها التى ذهبت فى الباكرا لشراء بعض أغراض المنزل. ظهرت المفاجأة وتسارعت خفقات قلبها، فتحت فمها قليلاً من أثر الدهشة.

نعم! إنها أختها رنيم وصديقتها شيرى، قد رأتهما، عانقت صديقتها شيرى بحرارة بعد غيابها كل تلك الفترة، ولم تفعل هذا مع أختها بعد ما رأته منها.

خطر بذهنها عن سبب جمعهما سوياً، ولكنها لم تعبأ.

نظرت لها وهى ترفع أحد حاجبيها لتقول:

«إيه الى جابك يا رنيم؟!»

ردت رنيم فى خفوت:

«أنا عارفة إنك مش عايزة تشوفينى، ومعاك حق بس اسمعيني بس لآخر مرة وأنا مش هخليك تشوفينى تانى خالص أوعدك».

ترددت قبل أن تأذن لها بالدخول ولكنها وافقت فى النهاية.

جلسن جميعاً بالصالون والأجواء بينهما ليست على ما يُرام.

= «خير يا رنيم، عايزة إيه؟»

= «النهارده احنا جايين نحكى لك كل حاجة من غير ما نخبي خالص، ونفهمك كل حاجة احنا الاتنين».

- «أنتوا الاتنين! وأنتوا إيه علاقتكوا ببعض أصلاً؟»

نظرت كل من شيرى ورنيم لبعضهما البعض، وتنهدتا، ثم خيم بالمكان الصمت التام للحظات.

تنهدت رنيم، وأردفت:

= «هتعرفى دلوقتى، أنا هحكىلك من الأول خالص...»

كنت عايشة حياتى مش بعمل فيها حاجة غير إنى أنتقم وبس، حتى لو كان على حساب ناس مالهاش ذنب زيك كدا، كان انتقامى وسوادى مغميل عيني عن الصح، واكتشفت بعد كدا إن بابا ماكنش يستحق أبداً الى عملته فيه، أنا بتمنى إنه يسامحنى على الى عملته معاه».

ثم استطردت فى تهدج:

«هدخلك فى الموضوع على طول، كارما بصراحة احنا أنا وشيرى الى قتلناه».

أصبحت عينا كارما جاحظتين، وصاحبها وجع مُفاجىء بقلبها ثم قالت بنبرة مُرتفعة:

«نعم؟! أنتِ بتقولى إيه، أنتِ أكيد بتهزرى!! قولى لى إنك بتهزرى!!»

غرقت عينا رنيم فى شلال الدموع، وأردفت:

«الموضوع بدأ من زمان قوى، كان دايماً بيحسنى إنه بيحبكم أكثر، وكان على طول يقولها إن هو بيحبك أنتِ ومامتك وبس، وإنه مالوش غيركم، لحد ما فى مرة قال لماما إنه هيكتب كل أملاكه ليكِ ولمامتك، وهيحرمننا منه عشان شايفنا إننا بوظنا حياته معاكوا، ماما من اللى سمعته منه ومن خوفها عليا بعد اللى قاله ماتت وماقدرتش تستحمل،

من ساعتها وأنا مابقتش قادرة أقعد فى البيت وهى مش فيه، وقررت إنى هعتمد على نفسى وتبقى فخورة بيا وأعملها حاجة تسعدها، عشان كدا قررت أسافر برا وأتعلم هناك، قبلها كان مش عايزنى أسافر عشان أفضل معاه ويعوضنى، بصراحة أنا استغربت من اللى عمله، وماكنتش متعودة منه على كدا، بس زى ما تقولى السواد اتمكن منى من ساعة ما ماما اتوفت، ماعرفتش أسامحه بالرغم من محاولاته إنه يصلح اللى عمله ويعوضنى، بس كنت دايماً برفض وبتهرب، وسافرت وبعدت عنه، ماقدرتش أنسى اللى عمله نهائى لحد ما فى مرة كلمت شيرى فى موضوع القتل، هى حاولت تمنعنى بس ماقدرتش ماعملش كدا، لحد ما هى كمان وافقت».

نظرت كارما لشيرى نظرة تجمع بين الاشمئزاز والحزن والعتاب والحقن فى آن واحد، ثم وجهت حديثها لأختها بعد ذلك بنفس النبرة المرتفعة:

"دا مايدلكيش الحق إنك تعملی کدا، لو کلنا فکرننا زیك کان زمانی أنا کمان قتلتنک، وساعتها هیبقی سببی إنک حرمتینی من بابا، ودمرتی لی حاجات کتيرة جوايا، المفروض فکرة زی دی ماتجیش فی بالک من أساسه مهما یحصل، کانت دماغک فین لما عملت کدا؟!!"

زادت دموعها أكثر وأكثر وقالت:

"کلامک دا مافهمتوش إلا متأخر قوی، أنا مش مسامحة نفسی علی الی عملته، وعشان کدا یا کارما أنا قررت أعترف لک بکل دا قبل ما أسلم نفسی، لازم نصلح الی عملناه علی قد ما نقدر، علی الأقل ضمیرنا یرتاح".

= "ضمیر!! هو بعد الی بتقولیه دا ولسه فاکرة کلمة ضمیر!! أنا حاسة إنی فی کابوس لا یطاق، طب شیری وهی مش من دمننا وممكن أعديها، لكن أنت الی تعملی کدا!! دا أنت آخر واحدة ممکن أفکر فیها أساساً".

- "أرجوئک یا کارما سامحینی، حقدی وکرهی کانوا مسیطرين علیا وهما الی کانوا بیحرکونی، بس حتی کمان سامحی شیری، هی کمان کانت میتة من الذنب دا ومش عارفة تعیش حياتها، وهی عارفة إنها السبب فی وجعک، احنا فعلاً نادمانین جدّاً، سامحینا وخلص أنت هترتاحی مننا خالص".

نظرت لشیری بنفس النظرة وقالت:

= "وأنت یا شیری إیه الی یخلیکِ تعملی کدا؟! دا أنت کُنتِ صاحبتی، معقولة أنا کنت مصدقة دور البراءة دا!!!"

قالت بنبرة حُزن وفي تحشرج وارتابك:

- «هقول لك كل حاجة، أنا أبقي بنت خالة رنيم عشت معاهم فى البيت بعد وفاة بابا وماما على طول، وكنت صغيرة قوى واتربيت معاها فى نفس البيت، كانت خالتي دى أهم حاجة فى حياتي، من بعد موتها وشملنا اتفكك، رنيم سافرت وأنا سكنت فى شقة تانية، كانت رنيم قايلة لى عليها، ولما كانت بتنزل مصر كانت بتقعد معايا ومماكانتش بتحب تقعد فى البيت القديم خالص، وفى مرة لما رجعت اتكلمت معايا فى الموضوع، ونفدنا فعلاً.

بس بعد الى حصل وهى راحت سكنت فى مكان تانى وقعدت فترة عشان ماتتبتش التهمة عليها وسافرت تانى، ولما حققوا معانا اضطرينا نكذب، واليوم دا مفيش حد شاف وشنا خالص، هى كمان استغلت إننا فى نفس الكلية سوا عشان أجيب لها أخبارك، منها إنها عرفت بجوازك، صدقيني يا كارما أنا آه الى عملته غلط بس أنا حبيتك جدًا، وندمت على كل الى عملته، مش بقول لك كدا وخلاص عشان تسامحيني، لأ أنا فعلاً ندمانة من كل قلبى، ولو رجع بيا الزمن كان استحالة أعمل كدا، هى كمان فاقت وعرفت غلطها وندمت».

كانت تفصل بين كل عبارة وأخرى بتنهيده تنم عن ضيق صدرها، عن كم الوجع الذى كانت تشعر به.

ردت كارما عليها فى برق:

= «أنا مش قادرة أصدق اللى بسمعه، أنتوا إيه! عصابة! مفيش فى قلوبكوا
رحمة!!»

ثم تنهدت رنيم بصعوبة وقالت:

- «أما بالنسبة لموضوعى أنا وشريف، فأنا فعلاً آسفة،

أنا ماكتفتش باللى عملته فيك، واخترت الشركة دى بالأخص عشان
أقرب منه وأخليه يحبني ويسيبك، أنا ماحبتوش، وكل اللى كان فارق معايا
هو إني أدمر لك حياتك وبس.

عارفة إن كلامى صعب قوى، بس كان لازم تعرفى الحقيقة».

نهضت كارما من شدة الحنق والثورة بداخلها لتقول بنفس النبرة:

«آسفة!! أنتِ إيه بجد!! أنتِ...»

امشى اطلعى برا دلوقتى حالاً واخرجى من حياتى خالص، وأنا اللى كنت
متضايقه إننا مش قرييين وكان نفسى أحس إننا اخوات بجد!! دا أنتِ آخر
واحدة أفكر إنها تعمل كدا...»

- «كان عندى أمل تسامحينى بعد ما تعرفى أنا ليه عملت كدا، عارفة
ومتأكدة إن أى حاجة هتتقال مش مبرر».

وأردفت فى عز فوارنها:

= "واحدة جاية تقول لى إنها قتلت بابا وكانت عايزة جوزى يجيها عشان تدمر حياتى، لا وتطلع هى أختى بجدة، ابعدى عني!!"

بعدها صفعت كارما أختها بقوة على وجهها، وقالت:

"تصدقى دى أقل حاجة أقدمها لك!"

اتجهت كارما نحوهما وهى تحاول إقصاءهما بعيداً، وهى تقول: "اطلعوا برا أنتوا الاثنين بقى".

أغلقت كارما الباب بكل طاقة العنف والحنق بداخلها كأنها نقلت كل هذه الطاقة للباب، بعد أن أجبرتهما أن يرحلا من البيت، جلست أمام الباب من الداخل وهى تشعر بحسرة شديدة، وألم مُبرح بداخلها وكأنها كانت غارقة فى محيط من البكاء وهى تمسك بمقبض الباب بقوة، ضاق عليها كُل شىء حولها وشعرت باختناق رهيب، ثم سقطت مُغشياً عليها إلى أن دلفت والدتها فى الوقت المناسب، وهى تحمل بعض أغراض المنزل التى ألقتها أرضاً؛ لثُنْقذ ابنتها.

الفصل السادس والأخير - حُسن الختام

يوم مُشرق مُفعم بالأمل لوعد وهى على أهبة الاستعداد لمناقشة رسالة الماجستير، التى كرسَت أيام وشهور وسنين كثيرة، لكنها قد نسيت كل هذه الأعباء والمتاعب بمجرد حضور هذا اليوم الذى لطالمه انتظرتَه طيلة حياتها، دومًا كانت تؤمن أن حلمها وفرحتها بنجاحها يستحقان التعب من أجلهما، لم تنس باسم وكان يتردد على ذهنها من حينٍ لآخر، ولكنها مع مرور الزمن بدأت تتعافى وتتأقلم مع هذا الوضع، وصلت باكرًا قبل بدء المُناقشة بفترة لشدة حماسها فى هذا اليوم!! تقف مع إحدى صديقاتها، بينما هى قد وجدت والدتها والدها يتحدثان مع شاب بعيدًا، كان يريدُهما فى أمر هام لم تعلم هى عنه شيئًا.

كان هذا الشاب زميل وعد بالكلية قديمًا، لم تتعامل معه من قبل، ولكنه كان يحبها كثيرًا، لم يُصرح لها بحبه من قبل، كان يعيش فى تردد كثير قبل أن يأخذ تلك الخطوة، لكنه قد سأم الخوف وقرر أن يفصح عما بداخله لوالديها، وبالفعل استغل فرصة وجودهما؛ ليُخبرهما عن شعوره تجاه ابنتهما بكل صدق ومباشرة حتى قبل علمها.

بعد فترة انصرف الشاب عنهما، ثم توجهت لوالديها وهي ترى ثغرات
ابتسامتهما مرتسمة على وجهيهما.

سألتهما عن الأمر الذى كان يتحدث فيه ذاك الشاب، فلم يُجيباها ونظرا
لبعضهما فى حبور، كأن العوض يأتى فى وقته المناسب دون أدنى فكرة.

لكنها فهمت مقصدهما، وتذكرت نفس هذه التعبيرات على وجهيهما
حينما فعل باسم نفس الشيء، كانت تتظاهر أنها لم تفهم حتى أخبراها
الأمر كله.

كانت شاردة بعد ما سمعته، تحاول أن تلملم ما قيل بصعوبة من وهل
الدهشة، لم يخطر ببالها قط أن هناك من يجبها لهذا القدر طيلة تلك
المدة، وظهر لها فى الوقت ذاته، صارت مُتسمرة بمكانها، تُعيد الكلام
الذى قيل لها للتو داخل رأسها تعجبت من قدرته التى جعلته يُظهر كل
هذا، قد احمر وجهها كثيراً من الخجل لما قيل.

سُئل أحدهم عن إخفاء الشعور فقال:

"كأنى أضع جمره فى يدي، وأدعى أنها مكعب ثلج".

نظرت كارما من شُرْفة غرفتها بمنزل والدتها وهي تحمل جوالها.

- "كارما لو سمحتِ ممكن تنزلى محتاجك معايا فى مشوار".

تنهدت وقالت: "طيب يا شريف، بس بردو أنا هفضل عند قرارى إننا ننفصل".

أغلقت هاتفها وهى فى صراع بين الرجوع له، وبين الابتعاد عنه والانفصال، هى تشعر بنفس الشعور مثل شريف، هى تشعر أن كل ما فات من عمرها معه ما هو إلا شىء من تعود، ولم يكن حُبًا وما أكد لها هذا أنها بدأت الشعور بمشاعر غريبة كأنها مشاعر حب صادقة ليست مُزيفة.

بعد نصف ساعة، وجدها أمامه واستقبلها بانفراج الأسارير تغمره السعادة، بدأ التحرك بالسيارة وهى لا تنظر له على الإطلاق تُريد الهروب من نظراته قدر الإمكان، حتى أنها لم تتحدث معه طيلة الطريق، حتى وصلا وترجلا من السيارة، ترجلت منها قبل أن يأتى هو ويفتح الباب لها.

أمسك يدها فى حنو وهو يبتسم لها ثم قال بصوت خافت:

"من غيرك أنا ما عنديش حياة ولا صحاب".

سمعت تلك الكلمات ولم تستطع إبداء شعورها بالحبور الذى أرادت أن تطير به لأقصى الأماكن، خاصة أنها تعتاد منه هذه الجملة، ولكن تلك المرة شعرت بصدقها دون المرات السابقة جعلت ملامح وجهها عادية وكأنها لم تتأثر، وهو يقول:

"لما كُنا بنزعل من بعض كُنا دايماً نيجى هنا احنا الاتنين ونفضل قاعدين

ساكتين لحد ما نبص لبعض ونضحك، وكأن ماحصلش حاجة، أنا جايبك النهارده مش عشان أرجعك بالزمن لأن أنا مش عايز علاقتي بيك تبقى هي هي الى كانت زمان، أنا دلوقتي جبتك وأنا ناوي أتكلم بكل الصراحة الى في الدنيا".

حاول أن يمتلك نذري سير من القوة ويخبرها:

"يمكن حبنا ماكانش قوى بالدرجة الى كنت متخيلها، يمكن بردو الى حصل خلانا ندى فرصة لنفسنا نراجع حسابتنا من تاني وأعرف الحب الى بجد، الى حصل دا خلاني أحبك بجد يا كارما، ماكنتش حاسس زمان بنفس إحساس دلوقتي، أكيد مش بدى لنفسى الحق ولا ببرر الى عملته، أنا بعترف إن الى عملته غلط، وخصوصًا أنا يوم ما فكرت في حد كان أختك".

= "لو سمحت ماتتكلمش في الموضوع دا عشان مش عايزة أفكره".

- "خلاص حاضر! حبيبتي احنا كلنا بنغلط وبنتعلم،

بس المرة دى غير أى مرة، الدرس الى اتعلمته على قد ما هو صعب على قد ما خلاني أعرف أحبك بجد ومن قلبي".

ذرفت عيناها في هذا الموقف، وأردفت:

"ما أنا مش قادرة يا شريف!! مش قادرة! مش قادرة أشوفك وأنت رايح بمشاعرك لحد تاني بعد السنين دى كلها، مش قادرة أشوف واحنا كل

يوم ما بنتكلمش سوا غير نادرًا، مش هقدر أستحمل إني ما بقتش أعرف
عنك حاجة أساسًا، ولا إنك تخبي عليا كل حاجة، وفي الآخر إن اتكلمنا
نتخانق مش هي دى الحياة بجد.

وزى ما أتكلمت معايا بصراحة هتكلم أنا كمان زيك، الفترة الي بعدنا
فيها عن بعض شوية كانت بتحسنى إن زمان فيه حاجة ناقصة دايماً في
حياتنا حتى لو كنا مصدقين إننا كنا بنحب بعض والكلام دا كله، مش
عايزة دا يكون نقطى ضعفى".

قام بإزالة دموعها البسيطة بأنامله، ثم ابتسم لها:

"يبقى نبدأ فرصة تانية واحنا طالعين من تجربة عرفتنا إزاي نحب بعض،
وأعرف قيمتك بجد، أرجوك لازم نساعد بعض فى دا، حينا فعلا يستاهل
إننا نتعب عشانه، أنا اتعلمت واستحالة أوصلك لكدا تانى، عارف إن
كلامى ممكن يبقى غريب شوية، بس دا فعلاً، التجربة دى فرقت فى
حياتنا كلنا، سامحيني وخلينى أعوضك عن كل اللي فات".

بدت ثغرات بسمتها على وجهها، وهى تنغمس فى رقة بين وجنتيها، وبادلها
هو الآخر بنفس التعبير وقالت فى ارتياح:

"تعرف إن دى أول مرة أصدقك قوى كدا؟"

- "مش مستغرب، عشان أنا أول مرة أصدق نفسى كدا".

= "مش قادرة أقرر حاجة".

- "وأنا هستنى لآخر العمر".

تجلس كارما مع صديقتها وعد بإحدى المقاهى المفضلة لديهما، وكنا يتحدثان فى أمور كثيرة كعادتهما.

- "دودو، أنتِ إيه حكايته بقالك مُدة كدا متغيرة؟"

= "بصراحة آه ومتلغبطة قوى يا كارما، بس فى نفس الوقت مش عارفة أتصرف".

- "دا ليه يعنى؟!!"

قالت فى شرود وشىء من الضيق:

"أنا مش عارفة أنسى باسم، وفى نفس الوقت مش عارفة أكمل حياتى بشكل طبيعى، مش فاهمة نفسى خالص، مش فكرة حب وكل الكلام دا، بس زى ما تقولى الذكريات فى دماغى مش عارفة أنساها".

- "يا حبيبة قلبى، بلاش تعلقى نفسك بجد للدرجة دى، دى مجرد كانت خطوبة، يعنى على أول الطريق، وبعدين هو خلاص مابقاش موجود، يبقى نوقف حياتنا؟ أكيد لأ."

أنا فاهمة شعورك جدًا وعارفة إحساسك، بس أنتِ كدا بتأذى نفسك دلوقتى وبعدين فى مستقبلك، لو ماعيشتيش حياتك دلوقتى، هتندمى وبعدين هتفضل حاسة إن فيه حاجة ناقصة".

= "تفتكرى؟"

- "أيوه طبعًا، بس أنت حاسة بإيه بالظبط؟"

ثم أردفت وعد في شرود:

"مش قادرة أحدد، مش عايزة أكون فعلاً بضيع حياتى بنفسى، آه الزعل دا شىء طبيعى، بس مش عايزياه يعمينى عن حاجات كتيرة وأضيعها من إيدى، مش عايزة أكون ناتج لاختياراتى الغلط فى حياتى، مش عايزة أكون بجري ورا سراب".

توقفت عن الحديث، واستطردت:

"وفى نفس الوقت مش عارفة أفكر، يمكن فعلاً الخير يكون فى مروان، بس مش عارفة أديله فرصة، ومش عايزة أجرحه بردو".

- "صدقينى يا وعد دا طبيعى إنك تحسى بكدا، بس لو عايزة نصيحتى، إدى له فرصة عشان ماتندميش".

- "هحاول مجد".

عم الصمت الذى كان هو العلامة المميزة بالمكان، وتنحنحت وعد لتقول:

"شكلك عايزة تقولى حاجة!"

"حسيت إن أختى وحشتنى، كان نفسى نبقى قريبين واخوات قوى، أحيانًا

بجس إن الى عملته معاها دا الصح، وأحيانًا بجس إني قسيت عليها جامد، ماعرفش الى عملته صح ولا لأ، بس كل الى أعرفه إنها وحشاني".

= "ماتحمليش نفسك فوق طاقتك خلاص".

عجزت وعد تلك المرة أن تقول شيئًا بشأن هذا الأمر، ولكنها عادة ما تكون ابتسامتها الحانية فيها شفاء للروح، وهى فى الوقت ذاته تشعر بصديقتها، وما يدور بداخلها.

ثم ربتت على ذراع كارما بابتسامة حانية، وبادلتها كارما بنفس الابتسامة، ثم أزاحت وعد يدها عن ذراع صديقتها وغاصت بخيالها وكأن هناك شيئًا يتحدث لها بداخل رأسها ويقول فى حيرة:

"يا ترى أنت حكايتك هتبقى إيه يا مروان؟"

يا من أحببت،

أنت كالغيث الذى حلّ بغتة على أرض خراب لينقذها.

أنت كالصباح الذى أنار دروبى حين فقدت الأمل فى الوصول.

أنت كأريج الورد الجورى الذى انبعث حين انهمرت سحابة اليأس.

تمت



فصلة

للنشر و التوزيع

Fasla Publishing & Distribution

تواصل معنا :

01067000701

E-mail:-Fasla.Pub@Gmail.com

Facebook .Com/Fasla .Pub